

萬 有 文 庫

第 二 集 七 百 種

王 雲 五 主 編

宋 詩 鈔

(四)

呂 留 良 吳 之 振 吳 自 牧 選

李 宣 龔 校

商 務 印 書 館 發 行

宋 詩 鈔

(四)

呂留良 吳之振 吳自牧 選

李宣龔 校

國 學 基 本 叢 書

武仲清江集鈔

孔武仲字常父。臨江新喻人。至聖四十八代孫也。舉進士中甲科。調穀城主簿。教授齊州。爲國子直講。歷祕書正字。校書集賢校理。著作郎。國子司業。論詆王氏。進起居郎。侍講。邇英起居舍人。旋拜中書直學士院。擢給事中。遷禮部侍郎。以寶文閣待制知洪州。改宣州。坐元祐黨奪職。居池州。卒年五十七。與兄文仲弟平仲並有文名。時稱二蘇三孔。元祐文人之盛。大都材致橫闊。而氣魄剛直。故能振靡復古。如三孔者。皆文章之雄也。然文仲恃才。爲蘇氏所使。攻毀程子。晚知懊恨。歐血而沒。君子病之。集藁罕傳。周益公時搜合爲三孔清江集。已不可多得矣。一言不知。令名剝落。爲文人者。每得罪聖賢。不必爲奸邪。而卒不得與于君子。豈獨一文仲哉。作者不可以不慎也。因附其遺詩數首於末。文仲字經父。舉進士官至諫議大夫中書舍人。

馬齧麥

馬齧麥。僕飲冰。北風軒軒搖丘霖。十日吁可驚。南山喜見朝日升。尋陽北岸霜泥薄。窮臘獨爲千里行。五里聊一止。十里復一息。楊柳弄輕黃。已作春顏色。川原入眼雖似快。時節去家還可惜。齧麥不須飽。飲冰勿畏寒。起鞭移擔復五里。帝鄉卽在須臾間。悠哉役夫勉桓桓。征途幾何莫永歎。亦莫悲歌行路難。

兒歸行

竹元珍云。澤州山中暮春之月。有鳥啼曰兒歸者。其聲甚哀。問之鄉民云。昔有里婦愛其子而憎前室之子。欲逐之。未有計。乃於種麻時。熱其半。生其半。使二子分種。曰麻生乃得歸。而誤以熟者與己子。久之所惡之子歸。而已子不返。往視之。則已化爲飛禽。啼曰兒歸。今鄉人以爲種麻之時候。余以謂人之憎愛。藏乎胸中。陰謀所發。乃在分種之際。而心手倒錯。事與願違。朝人暮禽。子母生隔。似有巧者。主張斡旋於冥冥之間。天網雖疎。其應甚密。則夫爲人上而接其下。用心積慮。可不戒哉。又知天之所以垂戒。示迹於人者。殆將使之推類以自廣。非獨此一女子也。乃作詩以記之。

兒歸兒不歸。朝爲子母歡。暮爲禽鳥飛。故居不得返。深林安可依。此身寂寞已如此。我母在家應憶子。子今豈不思其親。空有舊心無舊身。兒歸兒不歸。春已暮。朝多風。夕多雨。山雖有泉隴。無黍兒寒有誰訴。兒饑與誰語。萬物卵翼皆相隨。兒今不得兒子母。兒歸兒不歸。年年三月種麻時。此聲煩且悲。聞昔一母而兩兒。於己所生獨愛之。麻生指作還家期。唯憎者來愛者去。物理返覆不可知。天公豈欲故如此。善惡報敏如墳麓。至今哀怨留空山。長爲鑒戒子母間。豈獨行客愁心顏。兒歸摧痛傷心肝。

車家行

上坂車聲遲。下坂車聲快。遲如鬼語相喧啾。快如溪沙瀉鳴瀨。一車人十捧擁行。江南江北不計程。青天

白日有時住。無人止得車輪聲。晚來驟雨聲濯濯。平曉郊原盡溝壑。方悟車家進退難。不如田家四時樂。
猗猗堂下竹

猗猗堂下竹。我來初萌芽。生意甚蹇薄。纔能出泥沙。狂霖一夕作。霹靂連轟車。回首未幾日。其成何速耶。修然數尺高。秀色蔚以佳。餘陰過盆池。喜躍見魚蛙。乃知地道敏。不待歲月賒。念彼遠遊子。聯翩入京華。勢利勇奔趨。被服爭豪奢。外雖逐喜好。顧眄相陵夸。中乃昏智識。有損無增加。曾竹之不如。徒此草木花。經風已簸落。枯槁良可嗟。而我方涉世。浩渺無津涯。因竹亦自悟。慨歌牕日斜。

與廖開甫自淮南同行赴舉相別五年復相遇於蘄水縣爲詩贈之

來書吾初走夷門。傾蓋得君恨不早。蘭溪駐馬復相逢。二紀飛馳如電埽。惜君憔悴力不任。顧我滄浪髮先髡。憶昔同行氣頗驕。青驄馬快鞍韉好。荒山破屋風豪橫。大澤長堂雪傾倒。高談灑落見天機。健句縱橫瀟腹藁。辛勤始得到京邑。文辭不入春官考。可憐六翻委沙泥。坐看羣仙上蓬島。壯年多難寸心折。勁鏃已衰難破縞。而君施設有餘才。西佐元戎奪城堡。牛刀拂拭試一懸。如引滄溟灌行潦。歸來赴懇天子庭。正欲披腹呈瑰寶。片辭未吐疾先入。藜杖扶行色枯槁。籃輿復指天涯去。長川橫濫聲浩浩。驂騑不日歸王閑。那久低摧臥霜草。

久長驛書事

空堂深深閃燈燭。羣奴鼾眠聲動屋。豆肥草軟馬亦便。嚼美只如蠶上簇。天事由來不可量。初更月出星煌煌。須臾變作霏霏雨。客枕不眠知夜長。

題鮑家鋪

郵亭秣馬朝寒天。雪雲壓山山湧泉。隴頭客饑欲噤口。屋底人閒猶鼾眠。敲門得薪感相濟。征衫如洗輒火然。江南亦有安棲處。却羨郵亭人穩住。

舍轎馬而步

嚴風駕雪霜。吾轎頗溫煖。白日煖郊原。吾馬快馳逐。二者皆得用。翩如雨黃鵠。馬驕倦提策。轎狹厭攣束。何以救斯弊。奔馳有吾足。副之兩革靴。隨以一筇竹。鳧趨上高岡。虎步出平陸。折花得低枝。照影臨深谷。道逢田間叟。時訪以耕牧。北音稍入耳。俚語俄滿腹。行行及前堆。小汗已霏霰。芳草可爲茵。吾眠不須褥。人生忌太佚。終歲居華屋。醉飽耳目昏。輒暖筋骸縮。今吾異於此。千里干微祿。朝隨麀驘騁。夜侶鴻雁宿。戶樞勞乃久。金礦鍛方熟。聊歌以自娛。不作楊朱哭。

送李大夫管勾太平宮居袁州

康定慶曆披羣英。公爲布衣歌太平。熙寧元豐王道興。公作太守逢休明。四十年間走四海。嘯然不肯干公卿。峨峨正議天柱壯。皎皎素節冰壺清。胸中慷慨外間易。年高未見白髮生。罷節巴陵歸意銳。奈何去

就不敢輕馳歸天寵。乞閒散。諸郎惜祿猶屢爭。毅然不與兒女計。飛章丹辰論赤誠。明朝果得琳宮去。匡廬山色遙相迎。玉溪氣象自瀟灑。新磨古鏡當霄橫。修篁萬竿飽霜雪。枯碁一局酒滿觥。時邀賓朋敘野史。間擁雪鶴登巖扃。安排丹鼎夜不寐。邂逅黃金燒可成。未應謝傳入滄海。行見盧敖朝玉京。

代簡答次中見留

詩誇洞庭湖。蓋舉其粗爾。自此稍南行。更有瀟湘水。瀟湘如此流。淺深清見底。吾邑在其旁。桑麻百餘里。民經南巡後。淳龐猶可喜。白酒日相沽。鱸魚夜成市。念方從吏隱。小官不爲恥。先期了賦租。隨時用鞭箠。此外無餘事。看山聊隱几。還作小詩篇。寄聲前御史。御史吾故人。風義今爲偉。超遷未復甚。久仆行復起。但使交期在。不須論遠邇。今夕宿朱僊。相望月明裏。

入關山

輕輿兀兀乘朝暉。漸入山徑行逶迤。昨日喜與山相見。今日得與山相隨。山中老翁迎我笑。借問久矣來何遲。答云王都富且樂。四方車馬皆奔馳。我雖疎慵亦勉強。天恩得邑方南歸。山林市朝不同調。公雖高簡宜無譏。老翁聞語更驩意。爲我煮水燒松枝。山家十錢得升酒。勸我引觴聊沃饑。爲翁一奏白雪曲。翁亦爲我歌紫芝。此聲淡泊極有味。往往世俗無人知。山中之樂有如此。嗟我捨此將焉之。

新安鋪三首

罩罩澗中草。泠泠山崦泉。泉甘而草芳。旁有屋數椽。夕陽漸近西。風起行客山頭望千里。
薄雲斜日亂山川。投得荒亭晚息肩。地僻誰知藏好景。庭前花數折金錢。
簾如秋水憩迴廊。素月分輝百倍涼。山木交加無意緒。故欺殊影到人牀。

宿天池

我思廬山遊。發興自年少。偶來得閒侶。更欲窺衆妙。幽林穿濛籠。青峯上嶮峭。遙看天池路。一線在巖徼。
辛勤得至此。慘寂已西照。雲池桂無根。瞪視心膽掉。暮夜煙雲昏。西巖亦登眺。聖燈稍稍出。弄影何窈窕。
一枝分百點。變態不可料。須臾歸寂滅。何處觀朕兆。僧房得棲宿。爽氣冰毛竅。翻然亦興盡。卻恨歸途寫。
緬懷道隆師。確不奉明詔。似與山間石。慙慙論久要。我今來時迫。繡灰真可笑。明朝指誰谷。裹足登涼驕。
時足瘡未愈。 揩卻壁上名。恐爲高人笑。

尋真觀

武皇車駕東南出。訪道求仙希萬一。屏風九疊雲物清。意恐神仙藏此室。羽章之館締構新。壇場夜夜祈
星辰。蓬萊縹緲不可到。橋山一閉逾千春。詠真之天在旁側。白晝潭心飛霹靂。田收歲美龍亦閒。唯有濟
淪照空碧。誰道尋真是女郎。朝飡松桂夜焚香。明眸綠鬢今何在。意已霞衣侍玉皇。

松上老藤在三聖寺

古木已昂藏。長藤亦奇怪。潛根蒼蘚中。矯尾青雲外。巖巖秋霜剝。悠悠夏景曬。摧殘復長養。鍛鍊成老大。蛇蟠筋脈壯。龍死軀殼在。他時雷破山。大雨灑滂沛。茲松若變化。無乃遭結□。附枝物所患。奪朱古爲戒。何不淬斧斤。誅鋤此蕭艾。

高臺歌

廢地積爲冢。昔曾遊宴來。冢廢無子孫。東家砌成臺。臺雖平方冢雖禿。物理廢興有往復。相逢莫喜亦莫愁。乘興且同臺上游。

賦張芸叟蕃刀

王師前年下靈州。先生奉詔爲參謀。軍書堆案不足道。欲斬名王懸髑髏。官供器械如山積。裝結雖巧體質浮。傳聞蕃刀最可用。買置不惜千金酬。沙河洗湍血痕盡。瑩若一水橫清秋。長庚輝輝奪明月。光景迸溢不可收。軍回倉卒未及試。提挈萬里來荒陬。空齋倒掩閱圖史。深林永日號猩鼯。揮鳴且欲驚暴客。敢議與國平冤讐。夜郎蒙恩放李白。炎嶺得旨還幽求。輕舩共泊長沙岸。幾日對語清湘樓。紅蓮幕中邀客飲。霧雨咫尺迷汀洲。雜花落盡無處覓。官妓遣歸不敢留。清歎未免假外物。共說鐵劍勝倡優。君家所寶世稀有。滿坐傳看驚殊尤。護之太過卻銹澀。頑蘚鬱結纏蒼蚪。橫磨十萬抵虛語。得此已足馳燕幽。今公又應元戎辟。真能寸截鯨鯢不。郗生入幕宜有畫。定遠出塞將封侯。我今喜得隨君去。長江渺渺平天流。

路危或恐逢水怪。尾脊崔嵬當吾舟。頗公一效飲飛勇。爲公椎鼓傾金甌。

張秉叔出紫雲回鑾圖以示坐客因爲賦之

開元太平無兵戎。真人味道希夷中。人間之樂已饒足。唯有青霄未追逐。坐中誰似葉先生。以氣爲糧常辟穀。朝登員嶠夕崑崙。只與神游不要人。忽逢邀攜看月去。縹緲虛空生紫雲。蟾宮竟不容久住。仙藥飄飄送回去。歸來宮漏未移更。甲帳明鈺宛如故。汾水悲歌仙不成。梨園空沒有遺聲。紅塵如海漲朝市。從此無人遊玉京。

祠二廟之明日未得順風呈同行

岳州西祠從古有。控帶洞庭湖之口。前對隱顯明滅之湘山。下接淵淪洶湧之長川。茫茫白沙連絕嶼。淡淡古木蟠蒼煙。昭靈王左安流。右翠帳朱幡擁。前後鋸牙虎視森兩廂。氣骨生獐欲奔走。我來纜舟日已昏。袍韉跪聽祠官言。伏輿進退如法式。四顧詭譎驚心魂。平明結束舟將解。叱吸仍聞北風大。焚香奏酒殊無計。伏渚藏汀姑有待。二王威神世所傳。鈴攝鬼怪賓靈仙。好風相送勢不難。舒卷造化須臾間。波回草動似有意。舉棹開帆卽千里。吟詩賞月岳陽樓。買魚沽酒巴陵市。

廟下候風呈同行

楚水千百源。洞庭爲壯觀。勢居七澤右。地裂荆吳半。而我泛扁舟。飄然一歸鴈。來之豈爲益。去亦未足算。

胡不吹清波。縱發如飛翰。朝辭廟山曲。午泊巴陵岸。況有三面風。迎送俱無間。定非偏薄厚。以掇行旅誦。奈何苦流滯。兀兀晨復旰。采芹朝當蔬。伐竹暮供爨。舟師三十人。餓虎奔芻豢。使之裹糧絕。慮有探囊患。二王東南望。貌像頗輝煥。歌鼓歲無休。香燈夜侵旦。我爲江湖士。乞靈從弱冠。四到祠宮下。霜髯今已粲。王其故舊卹。勿以塗人看。尊師況慈忍。善道陰有贊。王心或未回。師頰固宜緩。杯琰似見許。歸來整櫂慢。

炭步港觀螢

九華之南蘆葦長。流螢夕起不計雙。爛如神仙珠玉闕。青羅掩映千明釭。空江沉沉未見月。近浦穿林起還滅。魚遊鳥宿自不驚。我知此火初無情。

泊趙屯

憶昨省覲趨瀘川。萊衣擁綠方少年。艱難險阻俱未歷。孟浪勇決唯爭先。舟發趙屯猶未飯。有風北起空濛間。掀搖三山欺五岳。巨浪倒潑東南天。千林向人俱頓仆。兩岸過眼真飛鷲。帆檣迴夏河漢底。鷁首俯飲蛟龍淵。跳波濺沫來四面。坐中時得鯉與鱸。妻啼婢訕殊不顧。兀坐正讀逍遙篇。爲言方破萬里浪。不爾捉月爲神仙。江中逢巨石。頗突爲引牽。逡巡水勢亦平緩。幸免肝脛輸烏鳶。暮投彭澤宿荒草。神驚魄顫何能眠。自茲稍悟垂堂戒。韡紋纔起不敢前。矜持太過僅無患。往往所至傷留連。乃知老謀與壯事。心膽殊異難兼全。重來此地畏洶湧。藏舟別浦看漪漣。魚跳鷗下自可喜。何用蛟鰐飲流涎。斜陽依依照草

木夾岸葭茨鋪書氈。兒今弱冠昔何有。昔領無鬢今皓然。二十餘年纔瞬息。時事幾蛻如秋蟬。區區走俗亦何賴。安得尺地巢林泉。

清溪詞

譙門之南溪水長。斜暉倒閃青銅光。下與長江作支股。愁霖漲天江潦黃。江潦黃。入清溪。清溪到底終無泥。還如初出秀山時。

瓜步阻風

昨日焚香謁聖母。青山鞠躬如負弩。但乞天開萬里明。埽去浮雲戢風雨。謂宜言發卽響報。豈知神不聽我語。門前白浪如銀山。江上狂風如怒虎。舩癡艣硬不能拔。未免棲遲傍洲渚。輕盈但愛白鷗飛。顛頓可憐芳草舞。三江五湖歷已盡。勢合平夷反齟齬。上水歌呼下水愁。北舩縈絆南舩去。寄言南舩英雄豪。萬事低昂如桔槔。我當賣劍買牲牢。再掃靈宇陳肩尻。黃金壺樽沃香醪。神喜借以南風高。揚帆拍手笑爾曹。不知流落何江皋。荒洲寂寥聽怒號。

賦碼礮笛弟毅父所藏也。

羌兒吹笛作龍吟。中有太古之純音。伊人已死笛仍在。千古月明江水深。誰知巧匠尋山谷。蹙踏溪雲採明玉。雲容之竹色黯黯。淺紫輕紅花映雨。正聲隱顯初無端。造化推移指法間。黃鐘妍美霜朝暖。無射淒

涼暑月寒。輅車走遍天南北。此笛此聲何處得。輅之湘竹川錦囊。廣坐聊持銜賓客。弘農學士九尺長。頰額山起鬢髯張。從容奏罷陽春曲。氣衰坦腹眠繩牀。由來雅器自有合。不與教坊管絃雜。君不見。開元名臣宋侍中。手揮羯鼓疾如風。

送范中濟侍郎知慶州

平時廣朝中。相見輒歡喜。昂藏八尺身。所負必奇偉。四方欲善敗。軍國盈虛計。叩之如川流。滾滾不知已。天子曰汝能。吾臣鮮其比。而況所設施。粲然在邊鄙。西戎未純一。汝可三軍帥。擒之或縱之。高枕惟爾恃。公拜稽首歸。眉目凜生氣。頑童玩天恩。象養若驕子。欲痛以鞭苔。而畏啼不止。二者不兩全。在所以節制。又如畜狂犬。繫頸不繫尾。收其要害處。進退隨所指。重城徼關。沙漠淨如水。辭別不躊躇。安邊從此始。

江豚詩四言

黑者江豚。白者白暨。狀異名殊。同宅大水。淵有羣魚。掠以肥己。是謂小害。顧有可喜。大川夷平。縞素不起。兩兩出沒。矜其頰鬣。若俛若仰。若躍若跪。舟人相語。驚瀾將作。亟入灣浦。踣檣布筏。俄頃風至。歛山搖岳。浪如車輪。氛霧相薄。舟人燕安。如在城郭。先事而告。昭哉爾功。鱗啗牛馬。頭躡象龍。暴殄天物。安得爾同。於人無害。所欲易充。暴露形體。告人以忠。又多膏油。以助汝工。江湖下貧。機杼以農。鳥鵲知風。商羊識雨。大廈之下。風雨何苦。豈知舟航。方在積險。以爾占天。著蔡之驗。古之報祭。不遺微蟲。孰揚爾烈。登薦蜡宮。

世不爾好。復惟爾惡。我作此歌。爲昭其故。

堤下

堤下人家喧笑語。高揭青帘椎瓦鼓。黃流滾滾經簷甍。一任征夫作船苦。綠榆覆水平如杯。前灣旋放水頭來。深如怒虎著船底。玉石磊砢相喧逐。黃河雖斷隨渠急。舟楫舒遲行旋澀。獨上平堤望遠天。衣裘已畏西風入。

汴河

磬渠斜與昆河接。海遠渠慳幾可涉。狂霖一漲高十尋。迅瀉東來比三峽。崩騰下與淮泗會。清泚亦容伊雒雜。橫空九闕眞垂虹。怒捲千艘如敗葉。砥堪平地看洶湧。何事乘危理舟楫。共夫鵝鶴行天上。遙與谷中相應答。但憂心手一乖迕。巨舶高檣兩摧折。而余進退久安命。揭厲以望初不懼。妻孥亦已慣江湖。笑語猶如泛山陬。鳴弓擊柝驚夜盜。掘茹榜鰕佐晨饅。時登絕逕步榆柳。或面荒陂看鳧鴨。我生東南趣向野。揮弄清溪看茗雪。枕流漱石眞所便。履濁凌險終未愜。觚稜漸喜金闕近。釜甌何憂米鹽乏。渾如海客泛枯槎。繚繞明河望閭闔。

閣下觀峴山圖

峴山巉巖清溪濱。倒影萬丈之瀟淪。往歲嘗有去思吏。熱地尤多高蹈人。少年仕宦頗落魄。時登絕嶺攀

蒼冥幽花美草頗娛目。斷碑刳碣還傷神。曉猿夜鶴輕相別。從此奔走十八春。舊遊不復齒頰掛。方知到骨俱埃塵。麟臺昨日見圖畫。醒若楚客還羈魂。方嫌一幅論萬里。秋江綠水何粼粼。人心與物本無別。正爲利欲相埋湮。神功妙手如喚覺。滿座風月來相親。騎驢徑去自可到。猶愈縹緲西遊秦。剩沾宜城醉其下。夕陽倒載望冠巾。

食冰

冬冰冽冽雖可畏。夏冰皎皎人共喜。休論中使押金盤。荷葉裹來深宮裏。胸煩肺涸聊一蘇。任爾青蠅相趁死。經時不壞已可憐。濟物之功尙如此。人言霜雪比小人。我謂堅冰似君子。

愧魚亭

昔聞魚可羨。今見魚可愧。邂逅臨池處。瀟灑出塵意。秋風八月起江湖。水染紺碧霞綺疎。悠然掉尾波間去。須信人生不及魚。

子瞻畫枯木

寒雲行空亂春華。西風凜凜空吹沙。夫子抱膝若喪魄。誰知巧思中萌芽。敗毫淡墨任揮染。蒼莽菌蠢移龍蛇。略增點綴已成就。止見枯木成槎枒。更無丹青相掩翳。惟有口鼻隨穿呀。往年江湖飽觀畫。或在山隈溪水涯。腹中空洞夜藏魅。巔頂突兀春無花。徑深最宜繫畫舸。日落時復停歸鴉。蘇公早與俗子偶。避

世欲種東陵瓜。窺觀盡得物外趣。移向紙上無毫差。醉中遺落不祕惜。往往流傳藏人家。趙昌丹青最細膩。直與春色爭豪華。公今好尙何太癖。曾載木車出岷巴。輕肥欲與世爲戒。未許木葉勝枯槎。萬物流形若泫露。百歲俄驚眼如車。樹猶如此不長久。人以何者堪矜誇。悠悠坐見死生境。但隨天機無損加。卻笑金城對宮柳。泫然流涕空咨嗟。

高樓行

天悠悠。雲羃羃。半夜微聞奏笙笛。爛彩蹙飛仙。鶴雛戢其翼。高樓百尋。大途東臨紫垣望青都。中山黃封酒百壺。五陵豪來少飲娛。夷門帝家盛遊樂。奔走環觀溢城郭。如今無吏橫索錢。縱飲誰愁家寂寞。

平陽歎

壞雲如山壓齊壘。六軍顏色如灰死。高郎元自解琵琶。萬歲無愁作天子。伯升何曾上青天。濺血遺痕芳草間。長城萬里自推仆。駿馬只馱馮小憐。姦臣百計爲蝨賊。不但妖娥解傾國。熊羆哮鬪蹙平陽。馮妃對鏡嬌權妝。死生契濶不相棄。雙雙刎頸長安市。

歸舍吟

長堤夾天溝。浩蕩東南流。上有騎馬客。枯髯清兩眸。馬後無飛蓋。馬前無鳴騶。進無趨趨謁。退無輕俠遊。攜金入市賣。十鋪不一售。包裹卻歸舍。置之牀一頭。半夜光滿屋。潛知是精鏐。貴物莫賤貨。不如深巷收。

一旦遇知者。堆斗價可求。寄謝路傍子。神珠難闢投。

龜石。

平川洶洶經南國。正練橫拖半天碧。洪瀾巨浪之中央。忽見頽嵬太古石。此石由來幾許時。混元一氣初開闢。神功割破混沌胎。劃落半空隨霹靂。非龜非鼈不可辨。有若神龜見蹤迹。精剛不待媧皇鍊。渾朴寧從巨靈擘。我知神物本天性。推移運轉非人力。當時大禹走天下。驅至九江爲納錫。萬牛攢車載不動。鐵軸崢嶸自堆積。秦皇鞭山移四海。怒視不能移咫尺。至今獨立猶驚人。地志山經不能測。千靈萬狀誰復知。一片堅頑粗可識。昂頭突出翠濤中。跪足橫蹠九泉脈。勁毅縱橫竇穴穿。當心一搭莓苔黑。淵潛不見曳尾狀。日爍猶驚負圖色。青髯剝落向何處。秋草綏綏神露滴。勁健曾支玉女牀。爛斑似點乖龍額。漁翁未網先自駭。靈蓍欲伏安可得。龜鼈縮首不敢近。蝦蟆巡行夜戰惕。歲多大寒百聖伏。圓勁口勢無欹側。風磨霜鍊無日休。髮髻皴痕成兆拆。負才不免刳腸累。至珍惟籍天公惜。灼以炎皇之火精。爨以少昊之金液。神鑽鬼卜不見形。陰陽造化無遺策。大哉龜者物之精。歲久已化爲真形。有時月黑無人夜。繞岸光芒芒自生。下駭深潭怪蜃窟。上應中天玄武星。萬象森森下相向。來決吉凶真僞情。姦狐妖鼠已破膽。山魃野魅見亦驚。波神吞氣不敢喘。四面長瀟鋪席平。吾聞溪老記往歲。半夜風雨來冥冥。剗然曳轉大潭左。百里震驚如雷霆。憎摧折雖萬牀。崔嵬孤高終自靈。吁哉天地至奇物。何爲流落於江城。銅馬猶聞

標漢殿。神羊昔亦馴堯庭。便當推置玉堂上。古貌岌岌無欹傾。姦臣猾豎作狐媚。見之頰面先吞聲。凶荒水旱必可卜。倉卒變怪皆先明。匈奴喪魄萬里外。愴縮不敢窺天兵。龜乎龜乎用不用。壯士與爾同死生。

發王務

曉隨燈火背千家。落盡疎星見遠霞。一餉春聲回宿鳥。半天寒色在啼鴉。臨陂弱柳猶藏葉。當路殘梅已盡花。賴值時光正妍潤。穩看風物到京華。

發蔡州

悠悠清曉歷長陂。楊柳溝塍鴈鷺池。風色著人寒料峭。日光生野暖融怡。鶴歸雲海心空在。鴈度湖天力已疲。客路馳驅元不定。西遊應有再來時。

書事二首

路逢行客向江州。勒馬荒郊爲少留。家事滿懷無紙寫。好將言語付蒼頭。北來煙爨苦淒涼。金竈崢嶸突尾長。滿篋香杭無處用。郵亭一飽待桃榔。

和竹元珍夜雨

帝城塵土熱如湯。喜有殘宵雨送涼。旅枕夢雲縈宋玉。空階詩思感何郎。香迷舊理煙初斷。燈倚輕寒焰不長。明日御溝應更好。一番晴色弄垂楊。

旅枕

旅枕春風底。儵然一夢驚。漏移清禁遠。天人小窗明。桂玉梁園費。山椒楚客情。蕭條過百五。猶有賣花聲。

呈竹元珍

一室蕭然傍禁城。塵埃不到旅懷清。水流紅片知花落。雨浥蒼苔見筍生。感物已憐春寂寞。辭家憶是歲嶢嶢。知君亦有淹留歎。歸夢西隨杜宇聲。

經父云自到京止得一書破懷憂想因寄

萬事嶢嶢不自由。年來書信最綢繆。鴈飛玉塞無多地。人望神都正倚樓。祗恐邊風多浩蕩。故令音驛每遲留。何如款段相隨出。鄉曲長爲馬少遊。

贈程壤

識盡公卿更食貧。蒼髯瘦骨走京塵。高談亦與時多忤。屢中方知術有神。前會渺茫渾不記。遠遊蕭索復相親。疑公別得壺中趣。回首人間二十春。

題報慈寺花藥園

少時隨衆蹂京塵。曾倚朱欄看晚春。二十年間頭半白。方知花木解磨人。

羅港

八節灘頭駐馬蹄。淙淙流水日沉西。歲時久已成陳迹。風景全然似此溪。蘭棹倚洲人競過。籃輿索筆我閒題。桃源仙境今何在。懊惱嬌鶯向暮啼。

過馬鞍山

足歷黃州百疊山。更無平地只岡巒。物皆枯槁非人世。石最崔嵬是馬鞍。畏日流金紅豔豔。亂沙堆雪白漫漫。崎嶇出盡聊休息。喜有松聲六月寒。

君表自西林還城中以詩爲別

天上優遊侍從臣。還鄉晝錦坐生春。不矜富貴知餘事。同訪溪山有故人。方外笑談無畛域。雨餘泉石長精神。西林路口嗟輕別。善護青雲萬里身。

入山三首

冠蓋成陰中路迴。獨攜蓮社道人來。千巖萬壑初相識。分付晴嵐面面開。路出西林興倍長。輕衫短蓋入秋陽。層崖蔽日多清影。深谷迷人有異香。訪古不辭穿絕磴。參禪直爲遍諸方。此身似是遼東鶴。偶逐飛雲到故鄉。十歲不出還可嗟。經旬遍走梵王家。羣山拍手向人笑。方朔今來何晚耶。

黃州

客路深秋一轉蓬。淮天牢落此將窮。城開雲水蒼茫處。人在茅簷掩映中。對岸武昌風月近。千年赤壁是非空。悠悠陳迹慵開口。謾把筠竿伴釣翁。

吳章嶺作

廬山北轉是吳章。巖草紛紛靜有香。洞口流泉似相送。人間天上莫相忘。

晚登庾樓

卻從江漢望江廬。溢口風波日愈疎。滿甕尙留桑落酒。登盤今有武昌魚。斜陽柳色明碕岸。纖月波光溼太虛。鸚鵡洲前弔豪士。重將詞賦爲君書。

蘇子瞻雪堂

古縣東邊仄徑開。先生曾此斲蒿萊。鸞鳳一去應不返。花柳當年皆自栽。畫壁蒼茫留水墨。朱欄剝落長莓苔。鄰翁笑我來何暮。檢點風煙興盡回。

鄂州

綠柳陰陰蔽武昌。汀洲如畫引帆檣。一江見底自秋色。千里無風正夕陽。暫別勝遊渾老大。追思前事只淒涼。賢豪況有遺蹤在。欲買溪山作漫郎。

蕭灑堂

旅平凹凸翦荆榛。畫棟明窗學隱身。政簡琴書聊度日。地閒花木爲留春。一盃濁酒迷今古。五字清吟泣鬼神。暫伴登臨對佳景。衣襟渾覺減埃塵。

湖山亭

縣山峻絕有新亭。公退時來看洞庭。天外微茫二湖合。波心縹渺一峯青。非時爽氣生雲雨。永夜寒光浸斗星。千古登臨增健筆。投文猶可弔湘靈。

五鼓乘風過洞庭湖日高已至廟下

半掩船篷天淡明。飛帆已背岳陽城。飄然一葉乘空度。臥聽銀潢瀉月聲。南津讒澗夜風微。投曉湖靈更發機。想像虛空聞帝樂。逡巡波浪匝天圍。三湘路指平蕪轉。兩舸帆爭白鳥飛。卻上叢祠薦牲酒。荆雲隱隱尙朝暉。

城上亭上

更無人迹逐攀躋。廬岳烏藤手自攜。滄海誰論六月息。茂林今得一枝棲。幽芳滿徑春難老。翠樾聯雲日易西。況有北郊宜曠望。八餘聊此發醯雞。

輶車館

野闊天長入望青。眼中虛豁到鴻冥。偶同楚俗來同樂。下視湘江笑獨醒。風緊水光時蹙練。日斜山影半

迴屏扁舟過此方年少。老矣重來鬢漸星。

湘潭

祿仕飄然寄楚鄉。才能苦短志方強。已栽綠柳如彭澤。況有黃金似櫟陽。風颭湘波天影動。雲來衡岳雨聲長。尙疑卑溼難安處。更起西邊百尺堂。湘潭近有告發金坑者。余作堂於廳西。謂之月堂。

九月二十二日西館雨中作

西館蕭然擁罽裘。渾無桃李似潘侯。路多綠竹遮欄雨。池有殘荷掩映秋。蠻獠謳歌逢樂歲。江湖風景憶扁舟。衣冠到底爲身累。祇慕逍遙寄一丘。

寄范清老

日掛西南有薄輝。稜稜霜氣犯寒衣。不愁斗柄隨春轉。祇怕梅花學雪飛。湘浦波光頻送別。潞城山色屢思歸。高人只在南坡住。好共留錢買釣磯。

湘上

南歸曾泛碧湘船。擊汰臨流似浩然。平野幾枯殘歲草。綠波猶浸舊時天。簿書倥偬嗟巖邑。樽酒歡娛憶少年。尺水片雲今我有。亦當風月爲留連。

寄劉貢甫

秀水先生今傑才。崎嶇山徑滯蓬萊。飛牋岳麓吟秋草。把酒襄陽醉臘梅。東郡政聲無豈弟。南樓風月且徘徊。朝廷選用多英俊。早晚劉郎卽到來。

自實豐倉歸

岳雲成凍把春寒。十里崎嶇倦往還。馬上朔風回繫帶。雪中微酒見開顏。含黃欲坼江邊柳。蘸綠相重水上山。拋掉一官如糞壤。好隨魚舸此中間。

與陳董二君相會於眞州經月甚樂詩寄董陳君兼感存沒

平生交友半成塵。想見當年樂會文。別淚茫茫添海水。愁懷黯黯塞江雲。青衫脫去誰同老。白首追隨尙有君。官暇更將碁子學。他時籌局當功勳。

讀王逢原文奇其才擇甚精錄一編

人喜相知自昔然。況君埋玉未多年。雄文一讀千行淚。青眼相期萬古傳。已掇條枚收美實。更披沙石貯清泉。東齋倒掩無人語。火煖燈明手自編。

次韻和鄧慎思謝劉明復畫道林秋景

鈴齋清話未更端。一掃禪林景趣完。縹渺已裝新殿塔。縈紆仍引外峯巒。冷風有意生空澗。密雪無聲下廣寒。平昔所遊今在眼。淒涼疑是夢中看。

和李時發春日見寄

聞道重湖路未通。悠然身在碧湘中。崎嶇水國猶千里。牢落春花已半空。江浪濺寒侵小睡。岳雲篩雨響疎篷。君詩亦說清幽趣。便覺年來氣味同。

登湘陰北寺江亭

古縣峨新剎。孤亭占上頭。野苔侵坐綠。江水帶天流。絲斷湘靈瑟。蘋荒帝子洲。人寰真似夢。頃刻已千秋。

辭三妃廟

盤空鳥鵲噪叢祠。船上行人半起時。殘月濛濛傾島嶼。南風嫋嫋透旌旗。開帆便欲日千里。別廟仍澆酒一卮。岸芷洲蘭俱可薦。新聲翻入九歌詞。

過洞庭

朝來四境宿雲披。漸放扁舟入渺瀰。漠漠衣襟凌水霧。悠悠簾幕掛天絲。波平自喜看書穩。風輭翻愁出險遲。今夜君山興不淺。登臨應及月明時。

登涵暉亭

常時洲島隔波瀾。故覓君山直上看。罨畫園林春減色。水晶宮闕晝添寒。州城斜引羣峯小。湖而平吞數驛寬。坐久西風響喬木。扁舟思到武陵灘。

登齊山

路出南堤思灑然。烏藤點點破苔圓。山腰仄塞元無路。洞底虛無別有天。六月清風醒客醉。千叢怪石伴僧禪。近人登覽方爲貴。從此匡廬不直錢。

銅陵縣端午日寄兄弟

柳浦移舟帶雨行。奔波南北是平生。忽驚佳節臨端午。還記當年客禁城。丹杏飢盤深簇火。碧醪傾盞釀堆錫。菖蒲角粽俱如舊。何事樽前醉不成。寄經甫

南北飄然各轉蓬。佳辰無路笑言同。銅壺縣冷更微雨。白鵲樓高來遠風。粽剝雪膚明席上。酒傾玉骨映盃中。區區羈旅無歎笑。遙相華堂屢一烘。寄季毅

清涼寺

白寺荒灣略艤舟。携筇來作上方遊。何年巧匠開山骨。自古精兵聚石頭。故壘無人空向久。高堂問話凜生秋。雲庵快望窮千里。一借澄江洗客憂。

繫舟長蘆作

夜泊長蘆星滿川。晚來吳楚氣昏然。雲雷相會還成雨。江海交流獨艤船。廢室與人喧白浪。荒村何處起青煙。文書滿眼從拋棄。卻倚蒲團學坐禪。

宮詞二首

十頃西池碧近天。春深調馬教龍船。至尊勤政歡嬉少。企望變輿又七年。
雲霧猊香錦繡帷。千官重列序賓儀。欲知湛露零蕭處。盡在天杯側勸時。

草石寺寺有潘閔題壁。權德輿晏坐記。

高士去已久。餘蹤猶可知。竹陰侵晏坐。山影在平池。塵蝕參軍墨。苔侵相國碑。漫尋瀟灑趣。俯仰愜心期。

惜竹井引

東齋有竹數竿。翠蔚可喜。其旁衆笋附生。漫益深茂。最後出者尤若奇特。無不應意。解籜未盡。而爲老兵手折之。悲夫。以干雲蔽日之勢。而摧於牕戶之下。以凌霜冒雪之姿。而失於俄頃之間。環步往來。悽愴良久。不能忘情。旣而自譬解。以爲陰陽之化育。天地所覆載。孰非假妄。自四肢百骸。外至耳目所接諸物。若器皿。若室屋。親愛之聚。輿馬之隨。孰能固守而終全之。其會合出於暫然。至於離散壞熄。此理終在。何獨一竹可傷。而介然於懷乎。乃頗能自遣。而有役兵之罪。然復一到其下。則初心還起。不能平也。余真大惑者歟。抑物之難得而可愛。當然者也。姑置其說。寓之以詩。

老蘚墻陰夕照間。何人折我翠琅玕。卽之綠葉隨塵化。猶有低枝帶露殘。不放雲稍侵蔽雪。因嗟世故足波瀾。故園未乏篔簹品。十頃繁陰六月寒。

贈夢符朝議玉溪在夢符宅後。

人笑公衣不浣濯。我憚公心霜雪明。青山仕宦有真忝。白首鄉閭無惡聲。相逢回首又再歲。暫去還來觀太平。何事南歸太果決。蕭然遠作玉溪生。

送望聖監南嶽廟

還鄉同赴紫宸朝。笑語從容慰寂寥。白髮侵凌今滿鑑。青春羈旅舊連鑣。易江小隱西園在。湘浦新除道路遙。老境不堪論契濶。東風官柳亂堤橋。

遊凝祥池同晁無咎作

平時念江國。此地愜幽情。楊柳繁無路。鳧鷖遠有聲。郊原斜日下。襟袂好風生。把酒須拚醉。還家下隔城。

遊洪福寺

清晨戒童僕。馬匹出皇州。欲探逍遙趣。因成爛熳遊。藤蘿回晝暝。雲雨送春愁。傍近緋桃塢。尋春亦少留。

遊州南同文潛作

峩峩宮殿列仙居。深水方圓氣象殊。萬里舟舩會京洛。幾人詩酒到蓬壺。日斜清弄來幽谷。風定鶯紅滿綠蕪。語罷恍然真夢幻。不應天色有江湖。

館中桃花

蓬壺深絕鑣芳菲。初見仙桃第一枝。天近自應風景別。春長莫恨化工遲。相重朱戶人稀到。半掩香苞蝶未知。想像江南今盛發。亦經頻雨稍離披。

次韻瀛倅鄧慎思見寄

官是麟臺卻佐州。蓬瀛俱稱列仙游。憶分曉色趨天闕。想對春風倚郡樓。書付塞鴻應易到。人如隴水正分流。江湖未有歸耕處。何日相逢說旅愁。

試院書事呈子駿明敘

憶初懷詔下天街。紅燭相隨御史來。場屋喜遵新定格。朝廷思見已成材。誅鋤險異歸平坦。洗濯英華出草萊。文藻諸生皆足用。更期儒行比騫回。

館中夏日

珍簟舒明玉。涼牕納碧天。殿樓傳遠鼓。宮井取深泉。竹籟風頻脫。榴房晚更鮮。卻驚非故國。五月未聞蟬。

直舍新闢西牕二首

推倒西牆平日功。暑天饒作一牕風。人間豈有炎涼隔。只在施爲向背中。幾歲榴花蔽曲隈。繁陰初逼坐中來。西鄰小檻如圖畫。偷入簾帷次第開。

送芸老通判

御史連章乞此行。制書優遣副專城。京都豈乏翱翔處。忠義先期去就明。祖帳盃盤留晚色。關山草木動秋聲。西州莫作經年計。早晚君王召賈生。

蛤蜊

去年曾賦蛤蜊篇。旅館霜高月正圓。舊舍朋從今好在。新時節物故依然。棲身未厭泥沙穩。爽口還充鼎俎鮮。適意四方無不可。苦思鱸膾未應賢。

次韻李端叔見贈

君才瀟灑應時流。久滯寧非命壓頭。昨見河南推賈誼。行聞天子召吾丘。已無痛飲觀風味。猶有新詩講報投。京洛塵沙著人甚。清涼高爽憶宣州。

寄會稽丞趙振道

龜峯琬琰翠成堆。軒檻前當秀色開。此地登臨比圖畫。與君談笑繼樽壘。傳聞佳景無時乏。依舊清江不斷來。今日關河隔千里。相逢何處少徘徊。

聞袁思正卒于宿州

書舸西河載酒回。東籬持菊待君來。何知頃刻成千古。不及從容共一杯。羈旅夢魂難際接。平生交分但悲哀。中年萬事長心惡。何處愁眉得暫開。

苦寒

晨風獵獵卷書堂。坐愛松筠耐雪霜。歲律崢嶸催暮景。時光宛轉逼新陽。金卮滿引顏雖解。石火深籠焰不長。安得仙家卻寒術。吸吞霞氣赤城傍。

介之會徐氏家飲薄暮不歸爲詩招之

金鞍駿馬照朱門。樂會高張晉楚軍。狂客浩歌翻白雪。豔姬醉舞轉紅裙。花光灼爍筵前錦。酒韻氤氳蓋上雲。爭似竹牕風月夜。青燈殘茗細論文。

題介之小閣

畫簾初卷碧山低。面面青藍翠拂衣。秋水暮天長一色。渚鷗沙鴈或雙飛。煙霞逗眼光相亂。松竹敲風韻更微。卻笑屈原顛顛甚。漁歌何苦淚交揮。

江上

萬里長江一葉舟。客心蕭索已驚秋。亂霞影照山根寺。落日光翻水面樓。淺浦耀金知躍鯉。前灘點雪見棲鷗。少年壯氣悲寥廓。未忍滄江下釣鉤。

夜歸口占示同行者

一天星月明如畫。萬樹杉篁吟夏秋。隱約棹歌聞別浦。青燐漁火見孤舟。身居簡冊三冬學。心入滄溟萬

宋詩鈔初集

單遊髣髴重陽正明日與君攜酒豫登樓。

文仲清江集鈔

秋月

孤枕夜何永。破窗秋已寒。雨聲衝夢斷。霜氣襲衣單。利劍摧鋒鏑。蒼鷗縮羽翰。平生衝斗氣。變作淚洑瀾。
次錢穆父新涼可喜

霜飈結新寒。草木起餘怨。翩翩前庭葉。追逐已千萬。斜陽背西壁。迤邐落藤蔓。安得金滿堂。聊換酒家券。追隨雙鴻鵠。擺脫舊籠圈。胡爲汗流赭。日與蠅爭飴。常恐計不就。更以詩屢勸。江湖秋水高。百尺風帆健。何當開竹溪。玉腕互酌獻。左手持蟹螯。平昔固有願。

四月三十日慈孝寺山亭席上口占送子敦都運待制赴河北

送客城南寺。蕭然雲泉秋。客意在萬里。聊作須臾游。昨夜過新雨。清風滿梁州。簪裳合俊彥。河圖並天球。古來功名人。未就不肯休。譬如鑿空使。尙致安石榴。矧今南畝氓。往往東西流。君能安輯之。千倉與萬軸。將至南都途中感舊二首寄錢穆父

北風吹雪滿皇州。攜手同爲落魄遊。一作雲漢路歧騰萬里。江湖塵土積千憂。世情共逐飛蓬轉。人事都如激浪流。只待清談慰愁病。月明幾夜促歸舟。

萬萬星霜七換年。故人已上碧雲天。書憑去鴈雖無便。路出名都亦有緣。秋晚樓臺風作雪。雨餘碕岸柳生煙。應煩北道開樽俎。又費公庖幾萬錢。

次韻穆父見戲

當年同望赭袍光。萬事爭先落彩銜。一別已經陵谷變。再來不覺路歧長。黃金久壓腰間重。白筆纔容柱下藏。惟願山林息枹鼓。免教鷓鴣嚇鴛鴦。余家近被穿窬累夕。鄰居擒盜者叫呼達旦。未嘗獲安寢也。持此以乞憐於京尹。

平仲清江集鈔

孔平仲字毅父

一作義

武仲之弟。登進士第。呂公著薦爲祕書丞。集賢校理。出爲江東轉運判官。提點江
湖鑄錢京西刑獄。紹聖中。以元祐黨人。屢譴詔。惠英三州。徽宗召爲戶部金部郎中。提舉永興路刑獄。
帥鄜延環慶黨論再起。罷。主管景靈宮。卒。平仲長於史學。工詞藻。故詩尤夭矯流麗。奄有二仲。

發儀真寄常父兄

卯角同出處。中路稍差池。往事如一夢。新年生白髭。小官仍齟齬。異國更羈縲。長時恨隔濶。旣見少開眉。
朝共壚邊飲。暮同窗下碁。一日復一日。眷眷不忍離。今茲解舟去。豈爲赴同期。久住恐相瀾。蕭然生事微。
欲將眼中淚。一灑別時衣。諸緒正牢落。勿令心重悲。融怡和笑語。恂悅迷東西。甘言戒婢子。循髮祝阿宜。
憤憤情懷惡。正同中酒時。晚泊蘆荻岸。江天雲四垂。高城已不見。春雨更如絲。

二十二日大風發長蘆

張帆風尙小。出口勢愈急。扁舟已中流。前後無所及。側看岸旋轉。白浪若山岌。礫砮時有聲。百罇水爭入。
危檣聽欲折。柁柄脫操執。我有常病妻。素羸多不粒。及茲益憤亂。臥喘氣吸吸。婢姥半北人。茲險未嘗習。
蒼皇面深墨。嘔噦皆膽汁。可憐兒女輩。往往相聚泣。出門強指揮。飛沫濺衣濕。江豚踊吾前。獼獼作人立。

意如驚吾幟。出沒相百十。呼神擲楮泉。祈佛啓經襲。是時正月尾。於節甫驚蟄。雲氣作冥晦。氣候變寒澁。日中僅得止。性命危若拾。紛然方寸亂。魂幹久不集。官期幸未迫。安用苦汲汲。官兵勇貪程。一震當少戢。何如彼居民。生不出井邑。吾田雖曠瘠。飭粥粗可給。勞生默自慨。茅舍行且葺。

讀江淹集

煌煌一正錦。爛爛五色筆。始如何處得。悵此夢中失。淹也雖善文。葳蕤少筋骨。譬人氣不深。往往多奄忽。晚年既富貴。外學仍老佛。豈非有所怠。寢使天才屈。奈何不自尤。祕怪疑鬼物。我有十丈舟。風期駕溟渤。襄叢口東皇。擘浪窺月窟。唯覺倦或止。視此頗自栗。

鑄錢行

三更趨役抵昏休。寒呻暑吟神鬼愁。從來鼓鑄知多少。銅沙疊就城南道。錢成水運入京師。朝輸暮給苦不支。海內如今半爲監。農持斗粟卻空歸。

呈范清老

范子愛高臥。家政付兒孫。將身比瞑目。達理吾所尊。前日過所居。蔓草深閉門。范子欠伸起。性寡笑與言。相與尋幽寺。復將坐前軒。斜陽滿庭下。不厭鳥雀喧。擘雲青山秀。經雨野水渾。念此景清曠。非君誰與論。少年一傾蓋。白首義彌敦。頽然各忘返。明月照黃昏。

曹亭三絕句

外看江水長。裏見荷花發。廬阜收白雲。南浦浸明月。
漾舟荷花裏。艤棹綠楊陰。卻上曹亭望。山高江水深。
登臨常患遠。游覽不能繼。此景對門牆。篋輿日三四。

夜入監中

欹枕汗如洗。出門已更深。長風萬里至。河漢清人心。芙蓉有佳氣。楊柳搖疎陰。秋聲繁促織。月色動棲禽。
落魄衣忘帶。逍遙髮懶簪。聽從涼冷入。一快直千金。

七月六日作

隔江見雨來。尤苦風太疾。蓬蓬宇宙中。掀攪若無物。百川水倒流。瓦石亦飛越。濃雲最輕浮。暫聚非永結。
隨吹東西揚。散漫頗倉卒。竟無點滴惠。初勢不可遏。正昏露青天。方曠見白日。但增塵土高。益使水泉竭。
農夫憂歲事。悵望眼流血。蛟龍不能神。卷尾藏窟穴。空餘鳥雀噪。庭戶晚更熱。深夜氣稍蘇。林端挂明月。
暇日至家園

仕宦吾已知。退休不如早。九江園地勝。萬箇竹色好。每到必裴回。翛然寄懷抱。于此築亭臺。于彼植花草。
傍嶺更栽松。引池將溉稻。經營各有處。何日室遂考。薄田方待歲。一雨洗枯槁。指穀以易泉。橐囊助傾倒。

茅茨若粗完。世路迹可埽。南山多白雲。臨望娛我老。

城東作

九江非吾土。久寓忘羈棲。丘墳之所宅。舍此亦安歸。錢官最閒暇。因得治其私。松楸鬱在望。時復至郊圻。駕言上東原。藹藹晨露晞。草木新過雨。秀色可療飢。念此道傍民。散居在山蹊。新秋百物熟。入城各有攜。芋迸紫卵壯。蕘抽紅笋肥。爨香憶烹鯉。稻白想流匙。養生無不有。美味仍及時。此土遂可老。行當結茅茨。雲水有深約。塵埃無盡期。人生適意耳。富貴亦何爲。

月夜

平生最好月。况此秋夜闌。長風送蕩漾。浩露洗團圓。仰頭視虛空。光采如可餐。星辰斂芒角。河漢收波瀾。更無微雲翳。挂此白玉盤。六合靜皎皎。萬水涼珊珊。爲爾廢昏臥。裴回更漏殘。更登高處望。歷歷見湖山。爽氣集冰雪。清心生羽翰。便欲御冷然。因之遊廣寒。一臨天池水。沐浴隨飛仙。

出城一首

驅馬出北門。秋色滿平臯。泄雲弄微陰。寒日照我袍。遵塗升復降。控縱亦已勞。落松被徑軟。青蒿倚崖高。南顧臨大江。厲風蔚波濤。蛟龍正鬪強。舟楫未易操。亦有沂洄人。揚帆氣方豪。覆舟諒由險。豈曰命所遭。

九日獨登曹亭

重陽不見菊。節物愈凋零。性復不嗜飲。對酒只如醒。秋堂靜便臥。既起思殊清。登高未免俗。亦不造林垌。屋西連郡郭。木末乃曹亭。杖藜只獨往。坐對南山青。蕭瑟西風高。泱泱滯雨晴。斷雲見天色。殘潦知地形。遙峯落照斂。別浦暝煙生。歸鳥向村急。孤舟當渡橫。此時有佳興。乃惡聞人聲。况令預尊俎。而使聽竽笙。嗟吾趣尙僻。取笑世上英。豈宜濫簪紱。但可老柴荆。

堂前阜筴樹

堂前阜筴樹。落葉已如積。籬上牽牛花。青青照秋色。四序都幾何。推遷半陳跡。晝短夜益長。晴薄陰易得。浮雲忽以興。慘慘風自北。便有挾纊心。人誰顧絺綌。飢蚊爾何爲。乃欲長肉食。翼翅不能舉。自此且衰息。

朱君以建昌霜橘見寄報以蛤蜊

贈我以海昏清霜之橘。報君以淮南紫脣之蛤。橘膚軟美中更甜。蛤體堅頑口長合。開花結子幸採摘。沒水藏泥豈斲得。二物同時有不同。賦形與性由天公。請君下筯聊一飽。莫索殊璣向此中。

夜坐庵前

人定烏棲息。庵前聊倚欄。裴回明月上。正在脩篁端。清影冰玉碎。疎音環佩寒。翛然耳目靜。覺此宇宙寬。人生甘物役。汨沒紅塵間。宴坐得俄頃。境幽心已閒。諒能長無事。自可駐朱顏。所以學道人。類多隱深山。

杜令無隱亭賞梅

梅生要孤高。故在城顛上。臘過已多時。花寒猶未放。正前乃廬山。積雪十萬丈。開樽□崢嶸。酒面已遲上。直須玉蕊十分開。洗盡煙嵐春氣回。請君埽地更招客。爲君□花卷大白。

晚興

春雪弄微陰。晚色連細雨。阜角茅已長。瑞香花欲吐。雖寒亦料峭。稍霽卽和煦。園林擬杖策。芳物行可數。上元作

春來霧雨久不收。上元三日月如秋。傾城娛樂競沽酒。舊歲豐登仍足油。樓前燈山燒荻火。光影動搖桑落州。太守憑高列歌吹。游人哄笑觀俳優。銅盤貯煤插烏帽。從兵小史斥下樓。侍觴行食皆官妓。目眙不言語。或偷短長赤白皆莫校。但取一笑餘何求。譬如飲酒且爲樂。不問甘苦醉卽休。歸來統如打五鼓。春寒慘慘吹駝裘。羣兒嬉戲尙未寢。更看紫姑花滿頭。

送張天覺

車上不須舞。途窮不須泣。萬事儵忽如疾風。莫以君車輕戴笠。愛君清如玉立。愛君直如朱弦急。膽肝磊落貯星斗。意氣軒騰脫羈縻。聖明天子聚羣材。下至椽棧猶收拾。況君屢薄青雲飛。暫爾低田豈長蟄。我亦區區有心者。海水期君更注浥。蕭蕭江路澀。煙濛客帆濕。惜君又作千里行。欲別還留手重執。

詩贈王從善

廣庭試羣材。俊筆馳短晷。鎖廳爭第一。乃後二三子。騎龍失頭角。十載困泥滓。泛舟自淮南。得邑窮楚尾。江上始相逢。清名久吾耳。油然睹顏色。悅澤已可喜。博學有淵源。高談見根柢。有如萬斛鐘。久叩聲益起。如君豈易得。蹭蹬乃在此。械樸析爲薪。奈何遺杞梓。我本世畸人。儂焉頑似鄙。一官傍松楸。自足勝朱紫。功名已灰心。藜藿思沒齒。欲結方外游。徜徉訪雲水。聞君亦有意。不戀五斗米。笑指廬山高。論交從此始。

春暄大旱率企援筆

去歲有閏既苦寒。今年春早亦太暄。清明寒食在二月。禁火正如揮箠天。桃花零落牡丹發。漠漠江頭吹柳綿。細蟲打牕夜如雨。潤氣蒸礎朝生泉。卷簾闌向迎風坐。微褥去屏思簾眠。勸君用心慎倉卒。萬事轉易如車旋。安知明日不凜冽。莫以炎涼隨目前。

送謝仲規致仕

公年五十餘。鬚髯黑如漆。朝廷方進用。未是挂冠日。又非力不任。數以身自乞。人疑徇虛名。今也踐其實。蕭然巢許姿。臭腐視冕紱。東南富人材。卿相近間出。急流能勇退。千古未有一。賢哉謝夫子。趣尙真不屈。騰裝嶺外遠。歸棹江邊疾。故鄉何日到。清暑坐華室。荔包雜紅紫。茶品分甲乙。歲時會親賓。左右列圖帙。回頭煙瘴地。揮手風波窟。天將勞以生。乃獨取閒佚。觀公眉宇秀。凜凜有道骨。當爲地上仙。不是籠中物。我亦素有心。賤貧嗟汨沒。鴻鵠羽翼成。高飛脫羅罽。鷓鴣未有巢。側目空自失。短章健公決。行且營葦蓬。

曹亭獨登

問我當何之。曹亭蒼木外。江湖水方漲。曠闊吾所愛。微風撼晚色。爽氣回秋籟。楊柳隱官堤。芙蓉接公廡。白雲依山起。點綴若圖繪。何須招客遊。清興自無輩。落日更憑欄。下看飛鳥背。

晨出郡南

日未去山更青。湖既闊風自生。垂楊弄疎影。啼鳥曳殘聲。江城晚色懷抱爽。况在白龍堤上行。

夏旱

元豐四年夏六月。旱風揚塵日流血。高田已白低田乾。陂池行車井泉竭。多稼如雲欲成就。天胡不仁忍斷絕。雷聲隆隆電搖幟。雨竟無成空混熱。如聞大河決北方。目極千里波濤黃。我願蛟龍卷此水。灑落東南救焦死。又聞戎瀘方用兵。戰車甲馬穿雲行。安得疏江擁三峽。餘波未流灌百城。分枝引派入南畝。盡使枯槁得復生。志大心勞竟何補。仰視雲漢高溟溟。吾徒祿食固可飽。更願眼前無餓莩。

述鷗

水濱老父忘機關。醉眠古石紅蕖間。緣波蕩漾意不動。白雲往來心與閒。有鷗素熟翁如此。命侶呼儔就翁喜。相親飲啄少畏避。自浮自沉不驚起。漁人窺之卽謀取。手攜羅網來翁所。羣鷗瞥見皆遠逝。千里翻翻一回顧。鷗不薄翁勿疑。避禍未萌真見機。漁人羅網不在側。敢辭旦夕從翁嬉。

乞巧

衆人喜乞巧。我以巧爲愛。言巧多欺佞。行巧爲邪柔。學巧競穿穴。文巧多彫鏤。巧不令如此。宜吾之恥求。我欲守拙性。浩然鎮輕浮。盡望衆巧門。化以孔與周。此志尙未遂。感激在初秋。南顧問牛女。女實能巧不。使紙甚費

家貧何所費。使紙如使水。親交或見遺。自買不知幾。置之几案間。數軸俄空矣。作字本不工。學書非不喜。不知何故盡。疑若有神鬼。若云隨置郵。性復懶牋啓。間或強爲之。皆出不得已。橫斜若蹠脚。齟齬如鴈齒。數易僅能成。紛紛多廢委。敍致失輕重。畏慎防觸抵。往往已緘封。時時又刪洗。遂令巾衍竭。大半或緣此。昔無楮先生。云自蔡倫始。假令行竹簡。禿野未供使。人生有知慧。不若愚且鄙。古來取卿相。未必皆經史。誰教識點畫。空耗五斗米。咄嗟爲此詩。又是一張紙。

送朱君旣德安宰罷任還

尋陽五邑誰善政。歷陵令尹朱爲姓。孜孜常以民存心。四境安虞吏無橫。吾愛其人頗真率。笑語談諧喜譏評。山有猛虎藜藿長。人得朋友衣冠正。當時文學推第一。闊步青雲乃蹊徑。大賢百里固非地。赤子三年且無病。如君才智可自達。今歸朝廷惟所應。君臣昔以譬壘篋。吉甫文武陛下聖。當陳半策縮萬金。翻六翻凌風勁。江邊鍾官老鑄錢。坐髀已消窮且暝。倘君富貴不通書。當念行藏素非佞。

寄子由

晨興悲風鳴。霜霰集我屋。忽驚歲云晚。日月疾轉轂。穴蟲知天時。閉戶各潛伏。而我亦勞止。擾擾尙馳逐。宵征戴星出。暮飯多見燭。灰塵彫鬚眉。銅臭蝕肌肉。念當投劾去。牽繫五斗粟。豈無數畝田。亦有千箇竹。平生羨爲農。水旱憂不足。空效烏雀飢。啾唧如聚哭。內顧復遲回。行藏類羝觸。長卿著犢鼻。揚子投天祿。岷峨能生賢。獨不主爲福。如君乃棲棲。似我宜碌碌。連山積雪壯。霽色明羣玉。對此想清標。凜然疑在目。安得兩翅長。高峯逐黃鶴。飛去墮君前。綢繆論心曲。

元豐四年十二月大雪郡侯送酒

平明大雪風怒嗥。屋上卷來亭下高。更深更密皆能到。所在紛紛如雨毛。堆牀壓案埽復聚。取筆欲書冰折毫。鬚眉沾白催我老。自頸以下類擁袍。此時只好閉門坐。右手把酒左持螯。奈何嶮嶮據聽事。千兵踏籍泥如糟。強登曹亭要望遠。紙傘掣手不可操。黑陰遮眼鋪水墨。寒氣刮耳投兵刀。飢腸及午尙未飯。更搜詩句無乃勞。幸有使君憐寂寞。亟使兵廚分凍醪。余雖不飲爲一酬。兩頰生春紅勝桃。醉眼瞢騰視天地。蝶蠃螟蠶輕二毫。勿令小暖氣便壯。自笑世間皆我曹。

宵興

我眠何由安。擊鼓中夜起。出門若秉燭。月色照千里。屋瓦微有光。紛紛雪正委。清寒薄駝裘。六合氣如水。

既歸整燈火。危坐閱書史。羸僮拭眼睫。待我色不喜。問之強應對。固以噤口齒。金壺澀冰漸。城上更屢死。戍兵飽且昏。汗漫睡方美。援桴雖賤事。其實關衆耳。奈何司晨夕。倒錯一至此。惟有赤幘雞。嚶嚶鳴不已。

十二月二十五日大雪

前時大雪風擾之。有無厚薄皆不齊。今朝大雪無風色。下隰高原總盈尺。由來此物本陰氣。偏近黃昏落尤劇。斜縈碎委百千態。不是天上誰做得。錚錚鳴霰已三日。厭坐北牕聞滴瀝。自非猛下意不醒。半夜一天星斗白。漫漫玉琢人世界。蹂踐成泥真可惜。呼童梯屋器貯之。猶得煎茶待嘉客。

詠道上松

長松高落落。積雪白皚皚。鱗鬣凍且僵。鬱結久不開。觀其纏壓意。直使同枯荄。鴈帶寒光去。烏傳春信來。微陽入直幹。生意忽已回。豁若醉初醒。整頓出塵埃。秀色媚山腹。孤標摩斗魁。時至自當復。安得長摧頽。若非根本壯。何能異草萊。

狂犬

吾家有狂犬。其走如脫兔。撐突盤盂翻。搜爬堂廡汗。逢人吠不止。雞噪猫且怒。固難在家庭。只可守村墅。不見已半年。意謂少懲懼。昨日至城東。搖尾喜若赴。銜衣復抱膝。屢叱不肯去。一躍數尺高。其強乃如故。豈惟性則然。汝分亦天賦。未聞有驂駟。蹄嚙棄中路。安敢攜汝歸。重令兒女怖。

子明碁戰兩敗輸張寓墨并蒙見許夏間出篋中所藏以相示詩索所負且堅元約

平生性好墨。以此爲晝夜。陳玄爾何爲。能使我心化。四方購殊品。十倍酬善價。江南號第一。易水乃其亞。古錦綴爲囊。香羅裁作帕。精粗校白黑。情僞攷眞詐。欣然趣自得。其樂勝書畫。英英清河公。風格繼王謝。語舊則鄉邦。論親乃姻婭。前時偶休澣。亟之城南舍。所嗜與我同。奇蓄頗自詫。奕秋約籌局。張遇賭龍麝。貪多而務得。廉遜或不暇。鈔刀施一割。驚足效十駕。決勝有如兵。必爭還似射。黑雲半離披。玉馬全蹂躪。初鳴已驚人。再鼓遂定霸。物情矜俊捷。天幸蒙假借。功成不自高。垂首甘褻罵。子明每碁敗。語則褻。但當償所負。然諾重嵩華。彎弓既有獲。豈不願鴟炙。滌硯竢見臨。倒屣出相迓。陵尊且犯貴。此罪在不赦。更許觀篋中。前期指朱夏。

寒食郊外

涔涔雨沉城。浩浩泥沒轍。四山氣如蒸。萬里天欲雪。我時出郊坰。山徑屢曲折。雖懷顛沛憂。亦有觀覽悅。幽花媚林薄。粲粲生意發。紅紫相後先。各自有時節。長松困冰雪。顛顛終不屈。及今翠天嬌。騰拔見筋骨。陰陽有代謝。物性安可奪。請視大塊中。紛紛盡毫末。興衰若鱗次。今古猶市閱。只此晦與晴。變態亦俄忽。歸路日已煬。披襟滌初熱。

余比見管勾太平觀劉朝奉見嫌太盛。教以一食之法。自用有效。因以告子由。且進先者後欲。

之說。蒙示長篇。竊服高致。謹再用元韻和寄。

廬山九江南。勝隱類王屋。中有劉先生。逃榮棄朱轂。我嘗問持養。次第蒙攝伏。操心要常存。尤戒忌追逐。教人啖火棗。喻世指風燭。一從屏晚膳。已覺失頤肉。諒能早如此。盡自有餘粟。寢甘無復夢。行健不須竹。萃地涌清波。漱飲每充足。當使百靈朝。如聞九蟲哭。欲塵亦遂埽。由味方有觸。甘肥自煎熬。其毒甚回祿。願公亦淡薄。同享秀眉福。丈夫貴決烈。安得猶碌碌。淘沙始見金。推石方逢玉。所以老氏言。爲腹不爲目。未能便仙去。輕舉隨白鶴。且保臨老年。眼明腰不曲。

常甫招客望海亭

蓬萊釀酒酒已成。賀家池上新採菱。紫衣侍立烏帽走。吾兄招客望海亭。歸來爲我道客語。出沒帆檣俱可數。醉中遙指北山下。云此白處乃海浦。入山迤邐數百山。客居乃在一山顛。雖非陽侯所窟宅。風濤湧洞已拍天。餘山亦有人雜居。山無桑麻只捕魚。海中百怪所會聚。海馬海人并海驢。或如七十之老翁。或如三尺之侏儒。手足口眼莫不見。鞭磔盡作人號呼。千艘競造石首脯。雨聲颯颯魚來初。截波一網千萬尾。棹歌喜噪翻蓬壺。垂釣忽挂綠鸚鵡。探石仍得真珊瑚。晚晴蜃結綵霞閣。夜黑龍呈明月珠。紅漣紫液碧澗澗。頃刻變態世所無。我聞此景若在眼。便欲駕舶尋天吳。昔時管寧亦避地。吾祖嘆息思乘桴。我今何爲不可往。誰能俛首甘區區。平時此亭景最美。自謂清曠更無比。一聞客語心坐馳。卻上望海汙潢耳。

嗟哉好惡隨所遷。世間萬事多如此。

官松

我行九江南。曠野園空山。道傍何所有。高松立巒岏。藏標隱雲霧。秀氣凌岡巒。橫鶩卻與走。怪狀千萬端。中有清風發。能令朱夏寒。流金五六月。方苦行路難。騎者欲顛沛。負者面如丹。氣息幾斷絕。至此方少寬。消渴飲甘露。涸轍投長瀾。迺知古人意。爲惠無窮年。亦有被剪伐。行列頗不完。豈非風雷變。或者盜賊繁。土人對我歎。云有縣長官。爲政猛於虎。下令如走丸。取此爲宮室。將以資晏歡。良工操斧斤。睥睨長林間。擇其最高大。餘者棄不觀。千夫擁一柱。九年力回旋。至今空恨悲。泣淚尙未乾。彼令誠何心。緩急述後先。毫末至合抱。忍以頃刻殘。萬衆所庇賴。易爲一身安。居上恬莫問。在下畏不言。世事類若斯。嗚呼一摧肝。

越州飛來山

物之體性重。惟有石最堅。迴風捲黃沙。直下萬丈淵。如何崔嵬山。乃解飛青天。瑯琊趨會稽。道里固甚懸。想當初來時。詭異可得言。豈非巨靈掣。或謂秦帝鞭。雷公挾電母。鄰霍相後先。夸蛾負崖腳。六丁撮其顛。北斗借神兵。虎豹下九關。海王驅魚送。百里聞腥羶。悲號與懍喘。灑汗成流川。呼雲以自蔽。日月不得宣。棲鳥失其巢。哀哀啼白猿。草木困擺撼。枝葉半不全。置之秦望陰。百怪散□煙。有龍走不轍。化爲錦色鱗。攢身入竅穴。噴出清冷泉。都人駭相報。平地見巍然。旣來亦能去。惟恐復騰騫。浮屠鎮其上。副以屋蟬聯。

朝吟諸佛經。暮講西方禪。以此相繫縛。羈孤幾千年。我聞已有日。今朝始攀緣。高堂置美酒。遠目凌孤鳶。老僧爲我說。指畫當我前。是否難致詰。且進黃金船。

秋夜舟中

昨夜強風萬弩過。舟中側聽披衣坐。秋來已覺陰氣繁。晨興更見波濤大。衰梧弱柳不足數。脩篁摧折幾百箇。飛廉鬱然方用事。一威能令萬物挫。人言風怒未渠央。我觀暴忽勢不長。會見平川淨如鏡。刀魚鳴櫓過錢塘。

和常父望吳亭

深灣謂無風。試向江頭望。混混過新潮。峩峩起層浪。前驤復後踊。極力不相讓。踏落皆有聲。擺觸頗用壯。游龍出鬢鬣。怒馬軒頸項。紛綸白雪外。疊去不知向。勢將銀漢接。高與海門抗。吳城挂水墨。越估增怛悵。我欲絕橫流。忠信固可仗。丈夫七尺軀。魚腹豈易葬。紉懷馮河戒。艤棹未敢忘。夜夢大樽浮。東行視溟漲。入宮謁陽侯。舉袂揖伍相。問其孰呼吸。乃使此倔強。謝云天所爲。茲語吾恐妄。卻欲詰蒼蒼。無梯不能上。

遊六和寺

同尋六和寺。去旁蒼崖行。崢嶸石林氣。灑灑流水鳴。見此俗慮滅。入門心更清。盤空到窈窕。小憩山前亭。天晴脩竹外。颯有風雨聲。僧云金魚池。近日秋雨足。餘波落青壁。散作雪色瀑。徐興視其流。登高穿屈曲。

忽逢白練飛。碎點濺珠玉。清冷振毛髮。蕭灑盪心腹。金魚在何處。演漾戲平淥。鱗鬣老愈黃。點漆作雙目。憶爲兒童時。嘗戲此池旁。聞人說金魚。已謂百歲強。今踰二十年。僧死草木荒。此魚尙無恙。纖質不改常。謂魚非靈物。安得擅久長。四海波浪高。三江網羅密。長鯨裹明珠。幽暗無白日。我疑龍變化。就此溪中逸。紛綸乾坤爭。浩蕩風霆出。何如守一泓。無得亦無失。

戲張子厚

子厚誇善碁。益我以五黑。其初示之羸。良久出半策。波衝與席卷。揉攘見敗北。我師如玄雲。汗漫滿八極。子厚若殘雪。點點無幾白。是時秋風高。萬里鷹隼擊。鷓鴣伏深枝。願視頗喪魄。勒銘亭碑陰。所以詫碁客。泛漣水

日出

漣漪二十里。淡淡得我性。微風不復搖。天水相與淨。秋容入崖柳。晚色依漁艇。髣髴會稽遊。南湖似明鏡。

仲冬十一月。我行赴高密。路出東海上。晨起駭初日。騰騰若車輪。只向平地出。較於昔所見。得此十之七。蟾蜍尙弄影。皎皎橫參畢。輝光一迸散。夜氣埽若失。扶桑想可到。俗慮苦難訖。壯觀曾未厭。側歎流景疾。

早行此篇文鑑所載稱經父詩。據孔氏遺稿。乃殺父作。遺稿殺父親筆。當以爲是。

客輿謂已旦。出視見落月。瘦馬入荒陂。霜花重如雪。海風吹萬里。兩耳凍幾脫。歲晏已苦寒。近北尤凜冽。

況當清曉行。迺此原野闊。笠飛帶繞頸。指強不能結。農家煙火微。炙手粗可熱。豈能迂我留。而就苟且活。仰頭視四方。夜氣亦漸豁。苦心待正晝。白日想不闕。

夢錫惠墨答以蜀茶

墨者□自黑。黑者墨之宜。所以陳玄號。聞之于退之。近世工頗拙。所巧惟見欺。摹成古鼎篆。團作革靴皮。揮毫見慘淡。色比突中煤。誰最畜佳品。鄭君真好奇。贈我以所貴。有不讓金犀。堅如雷公石。端若大禹圭。研磨出深黝。落紙光陸離。較之囊中舊。相去乃雲泥。辱君此賜固已厚。何以報之乏瓊玖。不如投君以蒼好。君心蒼茶人罕有。建谿龍鳳想厭多。越上槍旗不禁久。我收蜀茗亦可飲。得我峨眉高太守。人情或少爲珍。心若喜之當適口。更憐此物來處遠。三峽驚波如電卷。江湖重覆千萬里。淮海浩蕩漣漪淺。舍舟登陸尙相隨。今以答君非不腆。開緘碾潑試一嘗。尤稱君家銅葉盞。

夜聚楊節之祕校麻廚

雲亂海天低。風吹馬耳破。黃昏訪主人。同向幽齋坐。談資綠酒長。歡敵紅裙座。倒載夜深歸。雪花如掌大。止謁宣聖廟者

高密古名城。其地近闕里。絃歌聲相聞。往往重夫子。學宮雖荒涼。廟貌頗嚴偉。上元施燈燭。下俗奠醪醴。高焚百和香。競爇黃金紙。所求乃福祥。此事最鄙俚。朝廷謹庠序。五路茲焉始。建宮以主之。不肖實當此。

澆敝皆埽除。安可循舊軌。丁寧戒閹人。來者悉禁止。嘗聞諸魯論。丘之禱久矣。生也既無求。沒豈享淫祀。夜亭甚清虛。古栢自風起。悅之以其道。吾祖當亦喜。

讀莊子

損此以錙銖。益我以千金。豈足爲輕重。徒能勞爾心。覆彼以狐貉。蒙此以絺綌。豈足爲厚薄。徒能損卿德。南山有鷲鳥。睥睨天地秋。有意橫八極。固非守一丘。老鷗嚇腐鼠。安可施于此。鷓鴣尙不屑。況非鷓鴣比。夢錫楊節之孫昌齡見過小飲

夢錫更時事。恢然君子儒。節之瓊樹枝。秀氣發扶疎。昌齡出相家。謙謹乃繩樞。三人于交游。得一固有餘。日暮俱訪我。止駕共躊躇。四天忽陰沉。風聲若江湖。寒色尙可畏。促膝同附爐。高密酒雖貴。爲君開一壺。拳栗自東越。殷榴從上都。羹烹歷山蕈。膾斫淮溝魚。鮮蛤實海錯。肥羊非市屠。後食淮南蓴。此皆比所無。主人不敢愛。且以爲賓娛。夢錫飲中豪。節之亦其徒。昌齡稍姦黠。我勸勢頗篋。左手扼其肩。右手進觥盃。勉強爲我盡。淋漓滿衣裾。醉坐各忘去。蓬燭已見跼。幽談入鬼怪。巧諛相歌歛。勿言輕此樂。此樂勝笙竽。明朝酒醒後。相對禮如初。

收家書

早承會稽信。晚接清江使。兩地千里餘。尺書同日至。旣知骨肉安。復得鄰里事。丁寧問兒女。委瑣及奴婢。

開包視封題。親故各有寄。牛狸與黃雀。路遠不易致。東人罕曾識。專享無所遺。豈徒抵萬金。鼓腹快異味。
春天。

春天酣酣睡最美。日轉花陰猶未起。須臾夢覺聞風聲。波濤翻空千萬里。出門四望氣慘淡。寒色射人如潑水。旋見大雪落交加。向晚綏綏尙不止。遊絲柳絮復何有。百鳥卷舌愁欲死。陰陽變化固有漸。乃何暴忽有如此。清江野客心傷悲。寂寞無言對桃李。

觀舞

宴館簇金絲。繡茵呈舞旋。雲鬢應節低。蓮步隨歌轉。勢多體不犯。妙絕乃習貫。含笑有餘情。小揖更微盼。

城南

密州三月猶有寒。地平更在大海上。昨朝雨止氣已晴。今日繁陰北風壯。城南蹙水傍城流。幾處垂楊繫小舟。傳聞寂寂無車馬。紅杏夭桃各自稠。

送夢錫往齊州

望君之行車。既遠目亦收。惟有隨君心。千里不能休。我兄在歷城。相別歲已周。昔問月三四。東西交置郵。豈如一相見。君今涉其州。爲我道亡恙。深言致綢繆。先馳魂夢往。迎子鵲山頭。

晚出

空城烏欲棲。漸夕收寒暑。槐葉綠生風。椿花落如雨。出門何所適。有口不敢語。披豁向青天。望銷雲一縷。
常父寄半夏

齊州多半夏。採自鵲山陽。纍纍圓且白。千里遠寄將。新婦初解包。諸子喜若狂。皆云已法製。無滑可以嘗。大兒強占據。端坐斥四旁。次女出其腋。一攫已半亡。小女作蟹行。乳媪代與攘。分頭各咀嚼。方愛有所忘。須臾被辛螫。棄餘不復藏。競以手捫舌。啼噪滿中堂。父至笑且驚。亟使啖以薑。中宵方稍定。久此燈燭光。大鈞播萬物。不擇窟與良。虎掌出深谷。鳶頭蔽高岡。春草善殺魚。野葛挽人腸。各以類自蕃。敢問孰主張。水玉名雖佳。神農錄之方。其外則皎潔。其中慕堅剛。奈何蘊毒性。入口有所傷。老兄好服食。似此亦可防。急難我輩事。感惕成此章。

惜別爲從道作

嘗聞直諒冠三友。自古才難非特今。今世脅肩事諂笑。君獨苦口工規箴。我常從之求過失。箕踞慢罵猶甘心。其言未必俱中理。披沙往往逢黃金。今將去矣誰復嗣。已覺別恨凌秋陰。胸中抖擻宜一盡。留作更允相思深。

送從道

去年風雪攪天暗。君馬區區之海涯。今年苦寒又訪別。正是去年行役時。信陽雖遠重來得。小桃常探春

消息如今官滿去不返。又見花開誰記憶。乾坤浩蕩歸無鄉。歲月崢嶸老相逼。一官奔走隨所使。後期會合知南北。篇詩惜別人少和。須知此別真可惜。黃髯半醉舌若蜚。它日樽前無此客。

出城

駐馬河之西。送車皆已返。郊原人漸少。風物秋將晚。身如獨鳥輕。意與青山遠。

迷途

吹燈治行裝。戴月卽前路。深村苦多岐。乃使行者悞。東西皆可往。曲折何所遇。泥中虎鬪跡。草木新封墓。陰雲忽以興。四顧增恐懼。及今亦難咎。初失在跬步。林木杳崢嶸。丘原莽回互。雖聞叱牛聲。欲問不知處。

遇雨

客行日暮飢且渴。況值漫山雨未絕。蜀黍林中氣慘淡。黃牛岡頭路曲折。狂風亂掣紙傘飛。瘦馬屢拜油裳裂。記得默齋端坐時。唯愛霏霏洗煩熱。

呈夢錫

妻孥能相期。每出必遽還。如其歸稍晚。必謁鄭推官。

又

與君來往半歲餘。三日不見已爲疎。入門褫帶不相揖。下馬且復休僕夫。形骸禮數不足問。但論肝鬲之

何如。昨朝萬事俱撥置。與子齋中同負爐。去時苦寒風冒雪。歸路清輝踏霜月。但取樽前笑語歡。豈知門外陰晴別。

韓大夫城

大夫今安在。唯有廢城存。流水抱沙曲。依依楊柳村。居者五六家。荆榛深閉門。青青麥壠直。藹藹桑枝繁。牛羊任所適。僮稚更不喧。啼鳥靜逾遠。落花風自翻。昔稱老農賤。吾意堇人尊。謀身莽無定。太息視乾坤。

青州作

京東地平夷。自古四戰國。九州此居三。山海在封域。北趨京洛近。南卷江淮直。富饒足魚鹽。飽煖徧牟麥。英雄欲飛騰。假此爲羽翼。隆準蹙秦亡。金螭伺唐隙。方今不憂此。所重只西北。兵防最寡少。主帥失銓擇。蒿萊蔽城隍。繡澀滿戈戟。慢爲盜之資。忽者禍所植。吾視士大夫。赳赳半雄特。歌謠尙慷慨。闕達本多匿。腹心宜先安。豫備乃長策。衆方頌太平。我乃虞盜賊。雖言亦誰聽。痛哭損肝鬲。

又寄夢錫

自君臥漳濱。我意恍若疾。無人與笑言。兀兀守一室。當寢或不寢。當食或不食。有思氣填膺。可駭幾戰栗。想君端在家。比我乃安逸。妻孥以嬉戲。簿領久閣筆。南城趨北城。道路無所隔。我豈無僕馬。子不見賓客。哦亭足清風。林木助蕭瑟。葵花無數開。蓮葉亦已出。起來定何時。幸會能幾日。今已鬻白醪。待子歡促膝。

寄王達夫高密令

高城已吹角。月暗星河落。與子語不休。青燈同寂寞。平明車馬去。忽忽一飯相邀不得同。交情世契兩皆厚。東望白雲千萬重。

晚集城樓

高樓百尺脩木尾。面對南山翠相倚。凭欄談笑青雲裏。秋標摩空日色死。海風蕭蕭東萬里。吹襟洗髻清如水。下視黃埃濁波起。車馬紛紜只螻蟻。

陰山七騎

青氈作帽黑藥靴。進退颯颯生風沙。胡歌胡舞兩跪拜。問胡何爲乃至此。象胡之人假爲之。朱顏的皜秀兩眉。手操弓矢仰視天。如見飛雁馳平川。主稱此樂直萬錢。坐客競飲黃金船。世人見識無百年。追歡取快貴目前。當時披髮祭于野。自非辛有誰知者。

君住

君住水西我水東。東岸波生西岸風。哀哉中截錦繡段。上襦下裳各一半。小星隆隆怒且鳴。前驅貪狼後攙搶。何如盡遣收芒角。惟放當天皓月行。

雞冠

我初種雞冠。其小乃毫芒。曾未得幾時。忽已過我長。根株既猥大。枝葉亦開張。吐花凌朝曦。生意殊未央。陰風自西來。慘淡驅清霜。一夜忽變故。葉萎花已黃。當此繁盛時。爲爾償壺觴。及今乃腐草。好玩安可常。呼童盡剪拔。昔恐踐踏傷。庭除稍曠闊。耳目加清涼。竹枝久蒙蔽。迥立獨蒼蒼。

月三章

夜如何其。月在隅。問行何爲。乃躊躇。海波壓輪不得驅。中庭有客心不樂。欲挽玉兔鞭蟾蜍。夜如何其。月正美。起視萬物如明水。山魃避人鬼火死。中庭有客立不移。何暇眼力看箕尾。夜如何其。月落愁。光輝奄奄星益稠。白雲擁漢波不流。中庭有客心不樂。放志萬里誰能收。

代小子廣孫寄翁翁

爹爹來密州。再歲得兩子。牙兒秀且厚。鄭鄭已生齒。翁翁尙未見。既見相歡喜。廣孫讀書多。寫字輒兩紙。三三足精神。大安能步履。翁翁雖舊識。伎倆非昔比。何時得團聚。盡使羅拜跪。婆婆到輦下。翁翁在省裏。大婆八十五。寢膳近何似。爹爹與妳妳。無日不思爾。每到時節佳。或對飲食美。一一俱上心。歸期常屈指。昨日又開爐。連天北風起。飲闌卻蕭條。舉目數千里。

詠無核紅柿

林中有丹果。壓枝一何稠。爲柿已軟美。嗟爾骨亦柔。風霜變顏色。雨露如膏油。大哉造化心。于爾何綢繆。

荆筐載趨市。價賤良易求。剖心無所有。入口頗相投。爲栗外屈強。老者所不收。爲棗中亦剛。飼兒戟其喉。衆言咀嚼快。惟爾無所憂。排羅置前列。圓熟當高秋。且以悅一時。長久豈暇謀。咄哉潰爛速。棄擲將誰尤。

寄從道

憶初撫掌笑。嘗謂子猿獠。斑然武而文。譏罵舌若刀。髭黃喉骨結。內敏見秋毫。論官則甚微。意氣一何高。今思乃麟鳳。百十未易遭。子行白日靜。回首常蕭騷。聞子在定州。深山坐披毛。何如東海上。萬疊觀波濤。不見歲再晚。北風方怒嗥。圍燒奏美酒。思子持蟹螯。

食桃

剪彼十圍木。架此百尺梁。十圍不加大。百尺不加長。胡爲被錦繡。空爾飾文章。根斷膚已剝。至朽不復昌。一作榮。食桃棄其核。下與糞壤藏。一作井。雨露之所濡。發生乃微芒。回首枝榦大。冉冉出我牆。開花又結子。意態何煌煌。

日月

月行一何速。暫上青山還復落。衆星厥弛不肯休。參橫畢直爭頭角。日行比月更疾馳。一日一夜遶天圍。光輝所燭萬里同。墻邊炙背快老翁。

孤鴈

空城夜已寂。一鴈度雲端。汀洲亦可止。何不怯霜寒。豈非防暗禍。驚矯失自安。孤音訴明月。天高路漫漫。以鶉置懷袖。比汝乏羽翰。蒙恩傍溫暖。豈念宵征難。

食梨

東方早寒雪霜摯。新梨十月已滿市。削成黃蠟圓且長。味甘寒冷體有香。芳尊命友先衆果。百十磊砢升君堂。贈君玉壺曾冰之皓潔。副以金莖皓露之清涼。奈何撥火取煨栗。梨雖至美或不嘗。顰眉三嚙手摩腹。謂此發病爲第一。奪之兒口錫止哭。君不記南方無此物。五更酒渴喚水時。思此千里莫致之。及今乃以多見賤。南方橘柚東方梨。

十月二十一日夜

統統有如打兩鼓。星河漫漫參在戶。百鳥已棲人不行。西南洶洶有異聲。有若鬼神移山嶽。又如戰敗百萬兵。出門望見乃火起。椽落瓦裂咫尺鳴。問之相去一里間。紅光爍爍侵天明。長煙涌波月魄死。其間有物如撒星。是時久旱水泉竭。高屋一燎如毛翎。小兒但知聚看笑。不知擾擾人縱橫。皇皇奔走最可念。耿耿不寢心飛驚。明朝出視火起處。焦木頽垣不知數。白頭老姥啼向天。歎息之聲滿行路。

會食

學宮不置酒。相聚惟一飯。公家事何多。客至日已晚。乘飢騁大嚼。美惡寧復揀。僕夫無所餘。顧我色不滿。

潑茶旋煎湯。就火自烘盞。從容共談讌。熟視笑而睨。昌齡豈其慍。策馬獨先返。

集于昌齡之舍

初筵悄無語。良久歡意發。就爐自溫盃。覺此飲量闊。既觀舞袖垂。又聽歌聲闋。醉心□紛紜。醉眼成恍惚。勿輕栢直狗。所負尙可悅。當年入績事。今日逼華髮。愈令坐客心。感歎惜時節。夜長更恐曉。起挽青天月。兄長舟次會稽。以十月九日發書。清江親故。以此日遣使。仍以十一月十二日同到。去歲會稽書。清江人亦同日到。嘗有詩記其事。

清江在何處。限以龍王大。孤磅浪之險阻。鄱陽彭蠡淮海之波濤。會稽在何處。錢塘江邊風浪惡。金山寺下龍鼉驕。大冬雪霜道路塞。飢年往往多盜賊。如何兩處發書日月同。至此亦不差頃刻。開緘讀訖更反復。兩處久不通消息。丁寧勞問若相見。滿堂歡喜動顏色。枝間鵲噪今幾日。摠報平安豈非吉。年年歲晏享異味。牛狸黃雀并金橘。從容進僕問鄉閭。歸心倏起成蕭瑟。

舟行卻回

清晨移舟出沙鬣。宿氛卷盡天如洗。日高五丈行十里。白雲之中黑雲起。回舟急趨舊泊處。四山沉沉日色死。逆風颯颯初尙微。浪頭已高白參差。又聞西南崩崖陷。谷有異聲。大風橫擊波如陵。操舟之子雖習貫。掣柁才開又投岸。有如磁石引針去。時時颭撲愁中斷。長篙勁艣不易勝。僅得入口如再生。迴望後舟

尙出沒。使人淚落肝膽驚。昨日廟中奠旨酒。巫語甚吉許我行。奈何中路輒反覆。欺誕何者爲神明。豈非風者天號令。必欲逆知非汝能。浪傳消息得醉飽。萬一猶足爲威靈。

觀暴

怒雷殷殷西南天。黑氣一抹如長煙。鯨噓鼉噫蛟吐涎。龍呼其儔相後先。散爲飛雲蓋蜿蜒。以尾卷海灑百川。河泊乃在坎底眠。震驚掉動憂不全。白浪湧起高于船。岡馳隰舞山回旋。崩衝擺落蔚高竊。聲勢烈烈孰使然。須臾寂靜又改前。餘氛倚漢猶青玄。小鰕奮頭如自賢。神龍歸宮魚出泉。

太平

長江卷波作沙色。中有數頃如潑墨。是爲望夫之高山。沉沉影落江心黑。操篙下探不見底。側行牽挽難爲力。疾風爲我西北來。打鼓張帆何快哉。百夫呼噪絕水府。心膽壯敵山崔嵬。須臾已入大信口。回聽怒浪聲如雷。姑孰堂前溪水清。扁舟夜泊已三更。微微雨過有秋意。漠漠雲開對月明。

觀牛渡江

荷篋而騎彼牧童。驅牛亂流江水中。徐行不復用鞭箠。毋當其前犢後從。濁波沄沄出頭角。見者往往疑蛟龍。牛身千鈞水不測。步步乃與丘陵同。天機自然有所解。物理如此誰能窮。君不見。軋犖山腹垂至膝。一馬不能載其躬。帝前每作胡旋舞。翩翩頸捷如旋風。

太平

溪行曲入四五里。乃見州城大如斗。人煙疎少白日靜。風物澄明新雨後。古來豪俊多在此。悵望千秋一回首。謝家青山空自高。李白扁舟復何有。

于將軍

長安遣兵百勝強。意氣何有漢中王。七軍之心俱猛鷲。虎兕插翼將翱翔。睥睨荆益可席卷。白帝城高如堵墻。秣馬蓐食朝欲戰。雷聲殷殷山之陽。沉陰苦雨十餘日。漢水溢出高騰驤。蒼黃不暇治步伍。攀緣蹙踏半死傷。計窮豈不欲奔走。四望如海皆茫茫。鼉鳴魚躍尙恐懼。萬一敵至誰敢當。遙觀大船載旗鼓。聞說乃是關雲長。蒙衝直繞長堤下。勁弩強弓無敵者。雖有鐵騎何所施。排空白浪如奔馬。將軍拱手就紮縛。咋舌無聲而深赭。捷書一日到錦城。隻輪不返皆西行。將軍疇昔負朋友。若此昌豨猶得生。循環報復雖天意。壯士所惜惟功名。曹瞞相知三十年。臨危不及龐明賢。歸來頭白已顛顛。泣涕頓首尤可憐。高陵畫像何詭譎。乃令慚痛入九泉。涪水之師勇冠世。英雄成敗皆偶然。

紫髯將軍

華容女子哭幽囚。吉利如虎入荊州。縛其孤雛斂貔貅。長驅水步八十萬。欲獵干吳吳主憂。羣臣勸迎同一說。拔刀斫案心膽裂。揆彼之量豈我容。開門納狼計何拙。魯家狂兒策最長。倡而和者有周郎。區區黃

蓋乃乞降。龍幡遮火燒赤壁。東南風急天絳色。江中戰舸岸上營。煙焰飛騰半焚溺。雷鼓大進聲滿川。輕銳迫逐皆崩奔。紫髯將軍更歡喜。曹公座翅不得騫。子布元表何齷齪。成敗之決在一言。君不見甘露寶鼎間。典午受禪吳猶存。青蓋入洛雖可惜。猶勝俛首臣老賊。

武宗

武宗惟雄俊。有臣委用專。德裕才略大。感恩罄所宣。是時巖廊上。六合氣可吞。論兵決勝負。萬里在目前。一平回鶻兇。再洗上黨昏。楊弁不知時。迺敢盜大原。豈信明光甲。遣人斬其元。廷謀昧知幾。唯有君相然。成立三大功。慷慨在一言。風霆運不測。日月朗高懸。李唐勢已去。至此岌復纏。外內已息兵。崇卑定乾坤。遂令河北師。弭耳如孤豚。事書史冊上。讀之快心魂。千載若信宿。凜凜風烈存。世人多說劍。不見斫伐痕。玩弄及自傷。何用飾瓊瑤。迂哉賈生餌。果爾房琯奔。施爲貴實效。距止銜空文。

奉天行

蒼蒼行露出苑門。孤城偪仄不可存。賊兵之來若風雨。頃刻城下皆雲屯。紛紛矢石蔽空黑。天子垂泣對將軍。將軍提筆書滿背。城中白丁久奪氣。草車之焚雖已矣。雲橋百尺虹霓起。下瞰城中笑飲酒。乾陵赭袍擁朱紫。朔方大將來赴急。彷徨中路不敢入。豺狼合從堪慟哭。翠華崎嶇又巡蜀。聖神文武何至此。堂上有人面如鬼。

天門山

惟天莽蒼蒼。乃立此門闕。山本如城廓。剖鑿中斷裂。兩峯競秀倚。千古勢相戛。大江方口來。逼束不得洩。瀦爲無底深。散作萬頃闊。想當割據時。閉固孰敢發。夕陽坐荒亭。詩思摹峭拔。清晨放舟出。回首見呀豁。西涼尙局促。壯觀心頗闕。安得呼化工。努力更一堰。

靈璧東

明珠大貝玉玲瓏。美人營營出深宮。清臚一盼失英雄。羽觴行酒樂未終。胡陵殺氣迴飛鴻。投杯擲筯自挽弓。麾兵大戰靈璧東。血流爭波入海紅。何爲羈孤鐵馬中。搗沙折木天北風。突圍而出追失蹤。四五年間蛇作龍。

遊子吟

遠遊如飛蓬。漂泊天之涯。不及百尺樓。繫在垂楊堤。琉璃爲鍾玉爲竽。繁絃促管花陰下。青春此樂輸幾人。客身皇皇一羸馬。

汴堤行

長堤杳杳如絲直。隱以金椎密無跡。當年何人種綠榆。千里分陰送行客。波間交語舩上下。馬頭一別人南北。日輪西人鳥不飛。從古舟車無斷時。

書驛舍壁

巍巍使館開華堂。行人舊題詩滿牆。去年讀之多好語。今歲重尋在何處。驛吏卻忘官長來。墜以赤白漫青灰。銀鈞錯落應手沒。當時嘲諠誰爲才。嗚呼萬事祇如此。古人豪強安在哉。寄語征途往還客。不如揮手落金石。金石雖堅有時滅。君不聞海波成田淮水絕。

蝴蝶行

蝴蝶飛渡河來。河北花已落。河南花正開。盈盈採花女。撲打還家去。推身飛入粉奩中。芳草綿綿舊時路。

枯柳

嵌枯路傍柳。種插從何年。枯條不可見。人立何巋然。輕脆豈耐久。心腹俱空穿。上無一鳥巢。下繫萬里船。想見方濃時。飛花舞青天。行人多攀折。慘淡駐征鞭。今也傲突兀。東西過誰憐。陋質非焦桐。難試朱絲絃。英華餘歲許。白蟻爭回旋。雷公飛火試一照。深處恐有乖龍眠。

車班班

車班班。入幽關。馬蕭蕭。渡渭橋。關下遊人。不相識。橋邊美酒。留行客。海闊天高。雲滿空。風吹日暮。還南北。

落花

嶺南冬深。花照灼。比至春初。花已落。乘閒攜酒。到西園。鳥散蜂歸。春寂寞。江南此際。春如何。紅杏海棠。開

正多歸期不及春風日。猶見池塘著綠荷。

送客到江亭

春江碧波渺天去。兩岸紅桃落如雨。主人到此送行人。落日留連會歌舞。渡頭楊柳正依依。拂水搖風千萬絲。看看亦整東歸棹。誰折長條贈我歸。

寄鄒蹇叔

西園春深百草長。殘花紛紛綠葉光。蜂歸蝶散情已薄。獨我遶樹行如狂。亟令沽酒藉地飲。臥嗅落蕊傾金觴。醉來意氣頗脫略。睥睨天地如毫芒。狂歌大笑誰對值。山猿谷鳥啼斜陽。卻思高陽舊徒侶。安得飛至坐我旁。登城引望不可見。雲峯古木徒蒼蒼。

南卒

坐食者南卒。驕與子弟俱。負甲則俯僂。荷戈不能趨。嘈然金鼓鳴。氣駭失所圖。固無一技良。徒有七尺軀。吾聞孫子教。弱女成武夫。吾欲練汝輩。使之虓虎如。奈何天子詔。苦禁蓄兵書。軍旅非索習。壯士心踟蹰。羣蠻屢騷動。主將復佐除。有急何以報。思之可驚吁。

春日行

鸞啼花笑清明天。黃金買酒斗十千。良時恣意一酩酊。醉倒扶起南堂眠。須臾更深殘酒醒。明月當窻風

氣冷閒愁萬緒從中來。幾欲長號淚如綆。

造王館公第馬上作

濯濯春容在柳稍。野梅相壓吐香苞。日邊明晦雲無定。雨後寒暄氣欲交。抱蕊懸蟲猶帶繭。銜枝飛鳥已營巢。高懷不愛三公府。白水青山滿近郊。

呈館公

礮溪莘野亦初閒。去逐功名遂不還。豈有太平辭將相。卻來高臥對湖山。冥心真出三千界。注想長虛第一班。踽踽朱門舊時客。冒寒衝雨到郊關。

元子發龍圖以程公詠三園詩見示亦成一篇

名園有一已堪誇。勝事三園屬一家。杖策可游緣近宅。得春最久爲多花。人居玉府真仙格。地占錢塘最物華。見說江湖堂更好。煙波情興浩無涯。

和常父

平生苦厭家爲累。今日應如痛定人。羣婢喧譁寧復有。孤燈蕭灑自相親。溫尋簡策評三豕。點綴文章學受辛。誰謂丹楓會愁客。深秋清思滿江濱。

題夏大初丈高居

入門已可愛。庭戶覆清陰。更有池臺邃。相連花木深。山川供隱几。風月伴抽簪。七十鬚渾黑。知公但養心。

西軒

新作朱門向水開。雖臨行路少塵埃。久藏勝境因人發。盡放青山入坐來。樹影轉簷碁未散。荷香飄枕夢初回。晚年事事皆疎懶。賴得閒官養不才。

夏晝

落花寧是穢。啼鳥不爲喧。野水從侵道。青山任塞門。吏身閒似隱。官舍靜於村。開卷何嘗讀。風來只自翻。

種花口號

幽居裝景要多般。帶雨移花便得看。禁奈久長顏色好。繞堦更使種雞冠。蜀葵萱草陳根在。金鳳雞冠著地栽。併作暑天庭戶景。深叢時見一花開。

次韻王通叟

春生湘浦卽當還。窮覽雲山得據鞍。灑落文章終不俗。從容談笑尙能歡。千金駿馬將辭主。一曲胡琴遂掩棺。世事相因古如此。誰知魯國累邯鄲。

夏日甘寢

迴風動水葉。細雨溼蛛絲。心下無閒事。人間有此時。微涼紗半卷。幽夢角徐吹。此興惟吾解。兒曹莫使知。

晚興

驟雨行荷葉。嘈嘈如語言。高齋正薄暮。宴坐不知喧。極靜開心地。新涼入髻根。交遊何用絕。目罕到吾門。

寄康林

北音融結本輕清。欲學含糊想未能。晚節絃歌應自笑。終朝薄領更相仍。九江土壤多卑濕。三伏雲氛正鬱蒸。宴坐知君無暑氣。風標自敵玉壺冰。

送吳全甫中舍倅無爲

海沂歌舞待王祥。喜得淮南一道堂。軍號無爲已閒暇。地連秋浦更清涼。進趨黽勉心應懶。退食優游策最長。我住廬山欲招隱。爲君先去種松篁。

霽夜

寂歷簾櫳深夜明。睡迴清夢戍牆鈴。狂風送雨已何處。淡月籠雲猶未醒。早有秋聲隨墮葉。獨將涼意伴流螢。明朝準擬南軒望。洗出廬山萬丈青。

禾熟

百里西風禾黍香。鳴泉落竇穀登場。老牛粗了耕耘債。鬻草坡頭臥夕陽。

深夜

閒寂方深夜。清涼別一天。臨風但獨立。愛月不成眠。戍漏傳聲小。庭柯轉影圓。露寒侵背側。移榻近堂前。
和朱君況卜居

吾身當老此園中。世路崎嶇幾萬重。且飽稻粱隨鴈鷺。盡將雲雨付蛟龍。求閒有志終須得。招隱何人肯見從。且爲莆田朱處士。比鄰先種七株松。

睡起

睡起西風掠鬢輕。蕭然庭院晚寒生。浮雲便作飛鴻意。細雨仍兼落葉聲。物不求餘隨處足。事如能省卽心清。山林朝市皆相似。何必崎嶇隱釣耕。

送郎祖仁奉禮

碧落聲華蓋世高。哀烏才業亦時豪。靈淵自出駒千里。丹穴今看鳳一毛。方略從容能處事。精神灑落見揮毫。東行想足資清興。江上秋風捲怒濤。

次韻孫享甫見寄

進多齟齬退爲安。未省乘軒勝抱關。半世青衫貧爲祿。新秋明鏡老催顏。紛紛江上風吹葉。莫莫淮南雨暗山。欲和佳篇寄相憶。韻嚴詞峭不容攀。

唐林夫累惠書字法絕精以詩補之

每承勞問意何窮。尤喜眞行學頗工。蕭散正如君子性。頡頏兼得古人風。曾經廷諍毫端直。自有家藏硯色紅。雅稱玉堂詞翰手。枉留山邑簿書中。

至城南別祖仁未歸約文之不至

送客柳亭晚。倚欄秋雨酣。風煙滿湖上。景物似江南。蕭灑憐神俊。從容憶手談。老來心易折。離緒已難堪。

對菊有懷郎祖仁

庭下金齡菊。花開已十分。多情能惠我。對景獨思君。秀色三秋好。清香一室聞。扁舟今夜雨。何處宿江雲。

寓興

薄寒初著袂衣裳。日景中分不短長。池館虛明開水石。園林搖落受風霜。黃花滿檻金鈴秀。白酒盈樽玉液香。未老不須雲母粉。且教絃筚奏清商。

知郡大博臨宴公宇詩以爲謝唐林夫在席

眷深賢守已忘形。肯屈旌旗到小亭。坐有嘉賓仙骨秀。門無俗客暮山青。薦樽施遣供蔬甲。秉燭相隨看菊齡。欲識主人書館淡。短檠燈火漆函經。

至城東作

地形磅礴接匡廬。曠野人煙乍有無。棲畝稻粱方待穫。識家雞犬各隨呼。農耕半嶺如僧衲。牧跨羸牛似

畫圖官守投閒省墳柏。滿林霜露涕霑濡。

出郭二十里。依山八九家。茅岡風卷燒。土井雨推沙。凍蝶依殘菊。幽禽立臥槎。路邊桃李木。猶發小春花。

西齋冬夕

平生疎野得江湖。歲暮西齋擁一爐。雨滴空塔如自語。風吹長木更相呼。世間寵辱收碁局。樓上光陰入酒壺。近日睡時全少夢。攀緣狂想自知無。

冬夕卽席作

燭滴緋桃淚。香蟠春蚓灰。酒花隨煖聚。酥蕊帶寒開。自有清歌送。惟愁畫角催。隔簾疑曉色。雪壓數枝梅。

小庵初成奉酬元師

伐竹誅茅挂織蒲。半規小榻一方爐。不隨健鶻摩空去。且免窮猿失木呼。自有琴書增道氣。別開世界在仙壺。幽人欲到知何意。若說真庵彼豈無。

口占

東皇旌節下蓬壺。一夕芳菲徧海隅。紅破露花將引蝶。綠深煙柳已藏烏。異鄉旅食頻年久。故國風光此日殊。常是登高牽望眼。醉吟今喜在江湖。

寄常父

紅蓮綠水本優游。清絕東南七寶州。見說新書亦多事。每聞公檄少歸休。少年共計駒千里。末路堪嗟貉一丘。正是江邊桃李月。雞鳴度曲寄離憂。

春晚遣興

紛紛柳絮入簾飛。正是酴醾花發時。斷送日長惟有睡。留連春去可無詩。狂鞭迸筍偏當戶。綠葉成陰巧覆墀。百舌聲中立良久。翛然□髻任風吹。

上巳飲於湖上

城南春已老。湖上雨初晴。草作忘憂綠。風爲解慍清。楊花輕欲下。菱葉細方生。酒影低雲木。歌聲伴畫鶯。賞心殘蕊在。幽曲小舟橫。卻笑蘭亭會。吟詩半不成。

寄題蕭文照閣

虛明敞高閣。清淺對方塘。軒冕忘懷久。江湖寓興長。紅蕖開細雨。白鳥下殘陽。不挂人間事。逍遙自一鄉。

與張子明飲湖亭

小艇衝湖過。幽亭枕水虛。風來荷氣外。人在木陰餘。濕印□新酒。長菱簇貫魚。遙看鶴歸處。便是謫仙居。

初伏夜坐

露坐已侵夜。炎威猶未收。何言百蟲噪。無故一星流。苦渴須漿解。微涼以扇求。頰冰是今日。堆玉想神州。

送馬朝請使廣西

海水揚波今合清。秋風千里使華行。言皆有道非徒發。事若無心更不生。談笑從容懷遠俗。琴書蕭灑寄高情。佇聞靜勝諸蠻服。何必樓船十萬兵。

八月十六日翫月

團團冰鏡吐清輝。今夜何如昨夜時。只恐月光無好惡。自憐人意有盈虧。風摩露洗非常潔。地闊天高是處宜。百尺曹亭吾獨有。更教玉篴倚欄吹。

蘇子由寄題小庵詩用元韻和

官身粗應三錢府。吏隱聊開一草庵。擁砌幽篁從月映。覆簷喬木與天參。畏人自比藏頭雉。老世今同作蝨蠶。豈獨忘言兼閉息。舌津晨漱不勝甘。

冬晝作

霜陰收欲盡。斑駁意初晴。漸喜山將出。只愁雲更生。鳥窺晡後屋。雞唱午間城。灰折紅爐火。微煎傍耳鳴。

冬曉

城上猶吹角。官廳已罷更。粗疎知我性。懶惰亦人情。入被嚴霜冷。橫窗半月明。翻身更甘寢。雞唱第三聲。

四日羣集於景德寺

冷鐸殘香僧舍開。斜風細雨坐中來。使君豈是憎歌舞。自出胡琴送酒杯。
是日督鐵使者錢公在焉。著令禁樂公家有妾善胡琴。彈以娛賓。

馬上口占

澗底泉初動。山頭雪尙深。凍條桑破眼。燒地草抽心。搖落殊非昔。芳菲想自今。浮雲多意思。已解作春陰。

和經父寄張績

解縱梟鷂啄鳳皇。天心似此亦難詳。但知斬馬憑孤劍。豈爲推車避太行。得者折腰猶下列。失之垂翅合南翔。不如長揖塵埃去。同老消遙物外鄉。

半通官職萬人才。卷蓄經綸未得開。鸞鳳託巢雖枳棘。神仙定籍已蓬萊。但存漆室葵心在。莫學荆山玉淚哀。倚伏萬端寧有定。寒翁失馬尙歸來。

和經父登黃鶴樓

複靄重沙望不窮。坐收千里一樽中。天邊江漢波濤闊。地下神仙窟宅通。窓影偷來溢浦白。簷光飛入沔城紅。豁然已盡登臨興。雲閣章亭謾在東。

選官圖口號

環合官圖展。觀呼象子圓。飛騰隨八赤。推折在雙玄。已貴翻投裔。將薨卻上天。須臾文換武。俄頃後馳先。

錯雜賢愚品。偏頗造化權。望移情欲脫。患失膽俱懸。慍色觀三已。豪情待九遷。寧知卽罷局。榮辱兩茫然。

次韻和常父發越州

北堂相送出城西。忍見臨分獨自歸。日暮荒村一回首。秋風吹涕各霑衣。水通鑑曲行將盡。山似稽陰認卻非。薄宦牽攀不得已。此心何以報春暉。

題清斯堂

河流與淮接。於此一堂成。水色已可愛。主人心更清。魚潛晚日靜。柳落秋空明。本自無塵土。何須歌濯纓。

送登州太守出城馬上作

匆匆送客出城闔。霜意方高日漸曛。青嶂倚空先有雪。黃沙匝地半和雲。旌旗明滅隨車遠。鼓角悲涼隔水聞。正是無憀一回首。兩行白馬映紅裙。

適值劉從道供奉往信陽鎮用前韻送之

君馬匆匆赴信陽。雖云同郡似它方。村沙卷盡黃昏日。海水吹成半夜霜。別恨不須青草色。歸期當及小桃香。閒官冷局遙相望。兩覺迢迢歲月長。君約春中還城下。

夢錫同遊賀園題詩云誰知清淡者冬月亦登臨

寒景崢嶸歲已深。誰知清淡亦登臨。雨吹廢館苔添暈。霜落空城樹減陰。向曉旋留題葉句。隔年先有探

花心相期紅藥濃。開日一醉東風費萬金。

新作書室夢錫示詩羨其清坐

新闢西垣小室成。開編靜得古人情。崢嶸老柏寒尤健。窈窕幽窓雪更明。我愧濫巾居此地。君能傾蓋似平生。篤詩何必深相羨。淥水芙蓉豈不清。

次韻和常父

臥龍當日醉吟身。冷落天涯一旅人。早夕思親增悵望。嘯歌懷古更愁辛。角吹海上千山月。草入江南萬里春。欲去尙留心未決。夢魂長在越溪濱。

寄常父

繚繞龍山半俯陰。春來漂泊阻登臨。蓬萊閣下花多少。清曠亭前水淺深。暮靄漫天迷望目。東風絕海送歸心。新詩亦有思家意。應記當年共醉吟。

登賀園高亭

東武名園數賀家。更於高處望春華。深紅淺白知多少。直到南山盡是花。

晝眠呈夢錫

百忙之際一閒身。更有高眠可詫君。春入四支濃似酒。風吹孤夢亂如雲。諸生弦誦何妨靜。滿席圖書不

廢勤向晚欠伸徐出戶。落花簾外自紛紛。

兄長寄五詩依韻和寄詩各有所懷

憶昔西尋山下園。芙蓉香裏醉頽然。幽篁迸筍無餘地。老木交陰不計年。徹幕旋迎秦望雨。汎杯旁引鑑湖泉。舊游寂寞今誰到。應有秋苔長綠錢。懷西園。

昔同訪客到山陰。馬上相隨不廢吟。平視溪流綠煙遠。回看府宅白雲深。紛紛落塵陪高宴。豔豔浮蛆勸滿斟。賓主如今各分散。詩成長詠作吳音。懷山陰館謂沈司封。

蓬萊彼此一閒身。把酒臨風送晚春。城邑萬家供氣象。湖山千里助精神。深林鳥語留連客。野逕花香著莫人。今日天涯共悵悵。歸心夜夜轉車輪。懷蓬萊閣。

憶昔幽尋到井儀。繁花落盡綠陰時。雲迷步武多相失。風入襟懷只自知。金斗倒垂交勸飲。玉蟾分面各題詩。淋浪醉墨留西壁。好事於今刻作碑。懷井儀堂。

昔尋小飲到王家。早出歸時逼晚衙。勝奕高亭弄紋局。攝芳深徑採新茶。竹邊雲過陰相到。蓬外風來氣益嘉。夜坐西堂有餘興。解醒更進一銀瓜。懷王家小隱莊。莊有勝奕亭攝芳徑。

六月五日

灑汗通宵已廢眠。起來猶覺眼生煙。黃埃滾滾人行地。赤氣騰騰日出天。紈扇急揮風亦熱。銀餅空掛井

無泉。狂心於此思霜雪。安得師文扣羽絃。

西行

繚繞西行入亂山。白雲深處據征鞍。薔花著雨相爭秀。棗頰迎陽一半丹。執掌未能逃物役。乾坤何處託身安。芭臺東響情無限。那更秋風作暮寒。

荆林館

古木森然滿驛庭。繁陰凌亂月分明。千枝萬葉誰拘管。攪作秋風一片聲。

次韻和張道濟長老立秋後作

萬里悄然若有霜。南山秋色兩蒼蒼。已經晚雨驅除熱。更得西風斷送涼。瀚海人空雲弄白。吳江波闊葉吹黃。知君昨夜書帷夢。半在親庭半在鄉。君蘇人親仰秦。

飲夢錫官舍出文君西子小小畫真

西子蘇小卓文君。畫筆相傳窈窕真。雖有金珠并粉黛。恨無笑語與精神。一樽美酒留連客。千載香魂著莫人。醉眼恍然迷不覺。自慚心地尙埃塵。

走筆

種竹禁當雪。栽花準擬春。詩書最閒局。寢食自由身。潮外音題數。齊州問訊頻。郵筒煩郡縣。此外不干人。

觸目方多事。棲身獨此堂。窗迎先得日。簷送曉留霜。散漫皆書帙。逍遙或道裝。墻東雖可隱。林下未能忘。

折柳亭

楊柳已藏鴉。高亭望物華。平常送送客。此日自離家。別酒杯何滿。征途日欲斜。醉行三十里。春思滿顰花。

里伏驛

去家一日已思家。浩渺歸期未有涯。滿眼春風最多恨。無言似笑小桃花。

和常父見寄

濟南風物稱閒官。兄弟偕遊意益歡。幽圃水聲從地涌。畫橋山色逼人寒。別來夢想猶相接。它處塵埃不足觀。寂寞東齋又經夏。落花新葉共誰看。

銀河詠

江湖有客臥孤城。每見銀河眼亦明。萬里長風吹不斷。一番微雨洗尤清。星辰白石參差亂。雲氣飛梁倏忽生。織女東西波浪隔。夜寒天闊不勝情。

學舍

簿領如焚處處忙。日華偏向此中長。吟餘林表孤雲改。夢覺牕間小雨涼。珮玉上趨承斗極。棹歌深入釣滄浪。何如瀟灑詩書局。不在山林不廟堂。

風雨有秋色率然成小詩呈道濟長官

學館人歸靜若山。久陰海濕上衣冠。酣酣雨意牽愁遠。颯颯秋聲吹夢寒。竹笋解包堆屋角。蓼花抽穗出墻端。此時最憶吳江上。千頃煙波一釣竿。

游田氏池亭

磅礴青山入望長。古城東下見回塘。雲陰更雜梧桐影。野氣仍連菡萏香。久處塵埃思浣濯。忽逢虛曠自清涼。主人華髮能談笑。猶撫歸鞍恨夕陽。

熙寧口號

日坐明堂講太平。時聞深詔下青冥。數重遣使詢新法。四面興師剪不庭。萬戶康寧五穀豐。江淮相接至山東。須知錫福由京邑。天子新成太一宮。祗因雨落久紛紛。砥礪廉隅自聖君。能使普天無賄賂。此風曠古未嘗聞。近聞寇盜理戈戈。庫吏輸金入太籩。百鍊剛刀斫西夏。萬鈞強弩射單于。百姓命懸三尺法。千秋誰恤兩端情。近聞崇尚刑名學。陛下之心乃好生。

新霜

皎皎寒月白。清晨霜滿林。萌芽至今日。肅殺爾何心。入水成冰暈。迷天作雪陰。自茲開火閣。卻坐小牕深。

十月旦懷夢錫

去歲紅爐郡中起。芙蓉幕下醉相邀。今年兩事俱蕭索。白日孤城轉寂寥。緣飾新茶烹下鳳。咨嗟名畫展蒼鷗。長篇蒿出依然在。千里思君不可招。

寄板橋卜進之主簿

以才牽挽自由身。歲暮無家寄海濱。擾擾滿前人一把。紛紛趨事抱千鈞。風掀駝島波聲壯。雲倚蓬山雪意新。回首高城已搖落。菊花羞逼小陽春。

寄蕭虛中

平川摻袂屢星霜。楚尾畿東各一鄉。安得便風傳訊問。只應明月共輝光。茅齋夜出猶能記。古觀秋吟最不忘。近日詩成無和者。思君才俊似青楊。

有感時夢錫尋醫而思求免官

去歲城門坐徹晚。前年火閣飯連宵。當時已是嫌羈束。今日那堪轉寂寥。綠水紅蓮非舊客。清風明月想同寮。不知比我離高密。誰向長亭拗柳條。

陳宗聖縣丞往登州問有所幹以此託之

北望登州馬匹馳。駝裘孤扇任風吹。才聞使者方相委。事屬公家不敢辭。聚落蕭條宿山縣。波濤浩蕩瞰

天池煩君一上蓬萊閣。歸說扶桑日出時。

郡集

旋徹銀杯泛海螺。故人相遇樂如何。東西合作雙雙舞。工拙分爲一一歌。吹角共驚冬晷短。添爐更覺晚寒多。不須苦鍊登州語。大抵東音唯與阿。

寓目

倏此年華晚。蕭然學館幽。常閒心卻悶。極靜景多愁。葉走堂階響。雲依殿吻浮。黃茅日西下。戲犬在城頭。

題老杜集

七月鷓鴣乃至此。語言闊大復瑰奇。直侔造物并包體。不作諸家細碎詩。吏部徒能歎光燄。翰林何敢望藩籬。讀罷還看有餘味。令人心服是吾師。

集于昌齡之舍

一醉昏昏萬不知。黃昏促席夜深歸。明朝唯見家人說。昨夜歸時雪滿衣。

寄內

試說途中景。方知別後心。行人日暮少。風雪亂山深。

郭公

枉渚潮初落平岡日又西。蘆叢深處泊。惟有郭公啼。

芙蓉堂

芙蓉堂下花如錦。記得當年此泊舟。今日重來皆蔓草。水紅無數強排秋。

弄水亭

弄水垂吾手。圓波觸石堤。夜深翻斗極。秋霽把虹霓。鳥泛閒相得。煙生望稍迷。問源思杖策。人指白雲西。

趙屯寺

崎嶇自牛徑。蕭灑得僧房。壞壁題名滿。幽軒背日涼。澗花時委地。鄰竹稍過墻。歸路風猶緊。垂楊作意狂。

至盱眙作

郵亭繫馬日西斜。卻向盱眙望白沙。春色淡中惟有柳。曉風狂過已無花。古人出處真難一。語道窮通未可涯。白水黃梁不須具。呼奴挈榼取流霞。

發青陽驛

悠悠驅馬汴河灣。幾處郵亭略解鞍。春盡榆錢堆狹路。曉陰花雨作輕寒。山川相背圖中畫。日月雙移坂上丸。行役漸多身漸老。詩題聊寄旅程難。

入亳州界

羸糧樸被望都門。路出符離日未曛。清汴橫飛天上浪。方塘穩鎖鏡中雲。淮南風物多相似。江上音書久不聞。寄語北山姑待我。莫因西去勒移文。

榆錢

鏤雪裁綃箇箇圓。日斜風定穩如穿。憑誰細與東君說。買住青春費幾錢。

廢廟

靈宇何年置。荒臺漸欲平。丹青多泯滅。苔蘚太分明。棟宇非難復。威靈想不行。長林相蔽翳。惟有暮鴉鳴。

雍丘驛作

京塵漠漠稍侵衣。秣馬雍丘日未西。驛舍蕭然無與語。透牆閒覓故人題。

蹇叔以登亭有感示予因以答之

何處登臨可極觀。危軒隱在碧雲端。千年古樹少春態。一片江天帶暮寒。人似神仙君自好。心如鐵石我難干。花紅柳綠休多語。且把詩書子細看。

清夜

夜久景逾清。行吟到小亭。梨花帶明月。銀漢淡疎星。渡水漁歌遠。巡山鬼火青。此時塵慮息。豁若醉初醒。

偶書

經歲留南戍。頻時思故邦。青山又薄暮。斜日滿西牕。遺憤詩千首。迷愁酒百缸。何緣幸免去。歸棹破長江。

哦亭。

點陰花芽撥草根。深春終日在東園。煙筠冉冉陰相亂。燕雀啾啾語自繁。倚伏萬端寧有定。是非一致亦何言。誰能伴我哦亭上。爛熳同斟濁酒樽。

南陽集鈔

韓維字持國。開封雍丘人。父億參知政事。維受蔭入官。父沒閉門不仕。歐陽修薦爲檢討。知太常禮院。出判涇州。英宗免喪除同修起居注。侍遷英進。知制誥。知通進銀臺引。神宗初除龍圖閣直學士。充羣牧使。出知襄州。許州。入爲學士。承旨。會其兄絳入相。出知河陽。知許州。提舉嵩山崇福宮。召兼侍讀。加大學士。拜門下侍郎。出知汝州。以太子少傅致仕。轉少師。紹聖中坐元祐黨。安置均州。元符元年卒。年八十二。徽宗初追復舊官。維同時唱和者爲聖俞。永叔。其深遠不及聖俞。溫潤不及永叔。然古淡疎暢。故足爲兩家之鼓吹也。醖醑絕句。在集中不足數。而世盛稱之。古今豈有定論哉。

講武池和師厚

滄池擬溟渤。莽漾豁厚地。自吾神祖爲氣象。固宜爾。六合昔未一。教戰出精銳。至尊降黃屋。慘淡乘金氣。凌波飛百艘。撇烈若鶻翅。揚旌萬旅譟。伐鼓九淵沸。其行速天旋。其止甚陰閉。信乎王者師。足以服睚異。邇來承平久。地與兵革廢。秋風長蒲葦。爛熳失洲沚。惟見金明上。結構銷繡綺。春遊駐天蹕。萬國奉燕喜。鏗鑼鼓鐘響。雜遝羽旄美。豈惟與民樂。施及魚鳥細。宏哉艱難業。愉快逮萬世。

答蘇子美見寄

暮春游京洛。適與夫子遘。衣焦未及展。挈酒且相就。佳林延涼飈。廣廈蔭清晝。浩然塵慮醒。坐看天骨秀。殷勤述平昔。感歎道艱疚。談辭足端倪。懷抱去蒙覆。志願始云獲。暌攜遽然又。君舟旣南馳。我馬亦東走。還譙寡儔侶。孤學日以陋。高風邈難親。離抱曷其救。得君別後詩。滿紙字騰驟。汪洋莫知極。精密不可糅。峻巖山岳停。奔放江海漏。伏讀晝夜并。文義僅通透。有如享太牢。繼以金石侑。惟君抱雄才。文字乃兼副。要當被金甲。獨立諸將右。指揮神武師。爲國縛狂寇。獻俘天子庭。功以鍾鼎鏤。勉哉俟其時。此論講已舊。

送趙員外之官憲州

仲扶岷峨秀。弱歲儒其冠。讀書覩前古。飽見萬事端。行已去畦町。爲文鄙彫剜。應舉二十載。不免瓢與箪。西游秦函谷。崆峒上巉岏。卻視關塞廣。有如掌中丸。攻守勢所利。浩然入窺觀。是歲羌事作。賊兵犯鄜丹。君懷濟時略。忠憤激肺肝。上書伏兩觀。音辭若琅玕。臣策儻見用。坐令虜氣殫。天子壯其語。且使位以官。黃綬繫腰下。行行不遑安。炎天風塵多。遠道車馬單。餞觴不親酌。曷致朋友懽。今茲塞垣將。所在麾旄攢。孰能謀而毅。孰能正以寬。孰用賞不信。孰爲刑不殘。諒非專達任。易以奇畫干。庶幾成大功。展子凌霄翰。願我頑鈍者。託契歲屢寒。贈言非所工。當否聊一看。

答王詹叔見寄

詹叔好古者。卓立自旣冠。有如騏驥兒。一縱不可絆。近聞治周易。顛倒爻象象。此書號精微。義與天地貫。

吾知子之道。不止今所歎。新詩溢巾幅。見寄警庸懦。噴薄百丈泉。峭絕萬仞岸。感激氣爲振。把誦手屢盥。陰風吹寒城。歲暮雲物換。丈夫及壯時。功烈當照爛。無爲但默默。飽食大驅幹。爲報乏瓊玖。君其取章斷。立春觀杖牛。

清霜涼初曙。高門肅無譁。行樹迎初日。微風轉高牙。茲辰亦何辰。見此氣候嘉。有司謹春事。象牛告田家。微和被廣陌。纓弁揚蕤葩。伐鼓衆樂興。刻刻綵杖加。盛儀適云已。觀者何紛拏。因思古聖人。時儆在不差。禮實久已廢。所重存其華。吾非魯觀賓。胡爲亦咨嗟。

魯恭太師廟

善政邈無跡。其流在民心。君看魯太師。廟食猶至今。豈如文俗士。朱墨坐浮沉。趨營止目前。不顧患害深。去漢餘千載。此弊竟相尋。我行道祠下。感激爲悲吟。不見田雉馴。啼鴉空滿林。

晚步

愛此霽景佳。捨舟步高岸。夕陽照渡口。急急水紋亂。霜鷗田間鳴。沙鳥波上散。登臨豈非美。當軫別後嘆。舟中夜坐。

晴霜落波底。斗柄插堤外。扁舟燈火明。樽酒夜相對。臨歡意暫遣。念離心已痲。篙師喜冰拆。理檝事晨邁。別後作。

朔風吹驚鴻。行列先後先。蒼蒼雪壓船。齒齒冰着岸。離馬聲正悲。別臉淚猶泫。卻望攜手處。危檣映林見。
送王氏兄弟

抱疾伏田里。晨昏結煩憂。如彼衣上垢。歲久不可漱。忽聞車馬音。來過吾廬幽。相見一長慟。悲風爲遲留。
張燈具餐飯。涕泗稍復收。南堂夜相對。油然破離愁。雖無盈樽酒。清論代獻酬。高篇璨成誦。翰寫殊不休。
娑娑雙鳳凰。舞光彩色浮。忽然變瑰怪。風霆拔金蚪。傾聽魄已悸。何暇測其由。君家門閥大。先世勤令猷。
晉公典冊文。太尉廊廟謀。子孫今多才。信矣陰德流。還轅欲何語。贈子詩聿脩。

讀杜子美詩

寒燈熠熠宵漏長。顛倒圖史形勞傷。取觀杜詩盡累紙。坐覺神氣來洋洋。高言大義經比重。往往變化安
能常。壯哉起我不暇寐。滿坐歎息喧中堂。唐之詩人以百數。羅列衆製何煌煌。太陽垂光燭萬物。星宿安
得舒其芒。讀之踊躍精膽張。徑欲追躡忘愚狂。徘徊攬筆不得下。元氣混浩神無方。

覽梅聖俞詩編

夙昔誦佳句。跂予慕高風。何意憂艱餘。邂逅此相逢。君初應府辟。捧檄來自東。引車窮簷下。眷然顧微躬。
姿表穆以秀。純德信內充。乃知文章作。中與性情通。煌煌新詩章。垂光照昏蒙。啓櫝挹荆璞。引筵撞景鐘。
高篇屢云闕。遠思殊未終。譬如巧琴師。哀彈發絲桐。中有冲淡意。要以心志窮。顧惟昧者聽。莫辨徵與宮。

安得牙曠手提耳發其聰。

西墅

城居不爲愜。言適西陂岡。雀噪野堂靜。雞鳴春日長。書棚落幽蠹。佛幔掩餘香。釋子廬巖至。清談殊未央。

對雨思蘇子美

五月陰盛暑不效。飛雲日夕起嵩少。回風颯颯吹暮寒。翠竹黃蕉雨聲鬧。北軒孤坐默有念。人生會合那可料。昔與子美比里閭。是月秋近足霖潦。吾徒無事數相過。日策疲馬度深淖。升君之堂伏君几。果餌羅列亦稍稍。開樽得酒味已醉。輔以諧謔聊可酬。長歌激烈或孤起。大論紛紜時一譟。颯然夜氣變淒栗。連披短褐曳顛倒。且欣主人同氣類。安問鄰家厭呼笑。而今相望各千里。跼促有如魚在罩。人生此樂不易得。世事榮辱何足校。行當結侶候春水。一訪洞庭湖上棹。

和三哥入山

巢由沒已久。風迹曠不嗣。長嘯箕穎間。悲風肅然至。傳聞龍山下。茅屋架三四。中有隱者棲。讀書樂仁義。飽觀人事變。深鉤易象祕。耕田給衣食。鄉里霑賑遺。呦呦山鹿羣。摩撫馴不畏。乃知至仁心。足以通異類。聲名自馳擊。我心晏無累。寤寐想斯人。安得同所致。

從道損鼻乞移山藥

弱歲抱衰病。好讀神農經。雜然衆藥品。恊識性與形。商餘巖谷間。厥產芝木菁。山家乘冬採。氣烈味亦并。常思負籠往。斷此地氣靈。近聞山旁縣。移本來公庭。石泉尙含潤。溪風有餘清。想象春叢敷。燁燁揚華英。駢羅良可佳。疲薺宜見矜。安得畦畹餘。種食羽翼生。

答崔象之見謝之作

陰風吹沙走長衢。方駕往過君之廬。主人好事樂閑尙。揖我謂我非俗儒。欣然開館掃塵榻。語論清簡發不虛。投冠釋帶聊自放。安用俗禮空囚拘。分朋四座鬪巧奕。聊以勝負爲歡娛。呼兒稍稍出珍玩。瓊器礪礪承枯株。持竿拂壁似有重。最後乃挂雙海圖。云昔武皇恃威壯。驅石塞海怪可吁。鞭笞鬼神各就事。簸弄旗幟翻以舒。魚龍驚逃波浪惡。左右出沒揚牙鬚。但憐物類頗幽怪。畫手安辨曹與吳。北軒卻下步小徑。竹深桂淨何縈紆。我來方冬氣凜冽。已愛翠色侵衣裾。卽看春風撼芽甲。定見紅紫相欹扶。乘閑取醉更何適。主人勿遽嫌喧呼。

送孔先生還山

先生樂道者。於世淡無欲。高風自絕人。正行不違俗。竭來城闕游。不受塵事觸。日久望林壑。駕言反幽築。家臨滢水陽。路轉春山曲。東風吹百花。紅紫滿巖谷。蠶桑事未起。農里得徵逐。社酒濁易求。山蔬晴可斲。幽尋月吐嶺。高臥日照屋。應念塵中人。胡爲自羈跼。

送謝師直歸馬上作

送客西郭門。適與佳賞遇。雜花被原野。南盡遠目注。樸樸亂朱紛。濛濛疑白霧。林下風正柔。繁香不飛去。日長人意閑。歸騎款不遽。陶然行且歌。良愜靜者素。卻念陌上人。春愁紛似絮。

新植西軒

誰謂我圃隘。栽插向盈畝。鑿軒西臨兌。規地北占酉。陽條散繁柔。怒甲擎故朽。封培童僕勞。窺看孩稚走。雖非觀游盛。要是吾廬有。壤疏人力薄。開發定遲後。所賴春風意。與物無薄厚。居閑日蕭散。對此自成偶。問吾何所爲。卦象觀六九。問誰之與處。達者二三友。爲生昧機利。於事寡營取。但願花常好。酌我樽中酒。

鋤園

上天浩無私。衆草同一榮。青青十步間。薰臭相雜并。卉藥數不多。十百其品名。蔓者善緣附。結陰在高蔓。脩竹雖自立。已復困纏縈。其餘叢與株。蕪沒不自呈。陰蟲穴其下。日夜百種鳴。紛然亂耳眼。我意初不平。朝鋤忽以靜。暮雨且復生。自念疲病者。莫與地力爭。盛衰固物理。安用勞我形。

孔先生以僊長老山水略錄見約同遊作詩答之

羣峰羅立青巉巖。中有佛廟名香嚴。飛泉洶涌出峰後。四時激射喧蒼巖。跳珠噴雪幾百丈。下注坎險鏗爲三。援蘿頰瞰石底淨。明鏡光溢青瑤函。淙流四走渠與竇。左右吞嚙何其饒。緣源散討不知極。但見洞

穴爭嵌嵌攀藤直上出雲背。巖戶閉遂疑神緘。仰窺陰洞看懸乳。白龍垂鬚正鬢鬢。或疑如蓋覆宛宛。或散如指長摻摻。有臺高下且十數。如以勢位相臨監。平鋪老蘚柔可坐。誰藉綠罽遺不拈。北山之石何瑣碎。形制一一如鑄錢。叩之清越諸谷應。不意此地聞韶咸。已霜桂樹垂凍壁。未臘梅蘂輝晴嵐。浮屠曰僂好事者。奄有勝跡窮搜探。書之遠寄龍山下。云此僅止存都凡。先生以本來示我。謂我所好同甘鹹。相期歷覽在他歲。事高意篤非予堪。人生蕭散不易得。常苦世累爲羈銜。吾徒幸當治平日。況又無事於牽貪。便須巾車不可後。願以几杖從君南。

西園

西園日修整。竹樹相綴屬。春華雖未敷。氣象鬱函蓄。密雨昏遠林。輕寒旁修竹。於此隱几坐。物我同一目。弟妹四五人。時來問幽獨。我云憂與樂。在志所追逐。無厭萬鍾慊。有道一簞足。置是不須議。春醪滿罇淥。

治圃

久雨地氣泄。百草日以滋。勃然翳我圃。積葍不可治。遂令蕭艾質。唐突蘭蕙姿。鴻鵠不肯下。跳蛙恃而嬉。長林困纏繞。蘿蔓鬱四垂。青雲避蒙密。白日爲蔽虧。久與人跡絕。陰有物怪窺。涉秋月旣仲。雍人事芟夷。援斧一揮拂。榛蕪爲之披。俯憐蟻穴亂。坐聽蟲響移。濯濯行樹色。涓涓佳菊枝。涼風自西來。衆葉光參差。墻堵豁已去。南亭見華榭。卻下走直道。無復蛇虺疑。維此時嘉期。飲射之所施。□□失前穢。放懷得新怡。

如昔漢初定。禮法壞不支。叔孫刻秦弊。樹茅絕其儀。皇皇天子庭。一旦羅尊卑。表位肅以整。衣冠紛陸離。圃也不足道。拔邪亦由斯。作詩試永歌。憤涕下交頤。

游城南雙塔院

軻峨郭南門。臺殿壓長路。青林四面合。飛鳥不得度。房掩僧獨禪。庭喧鷓正哺。高蘿走蒼栢。丹花下垂布。中園饒佳果。結子滿朝露。久從城邑居。樂與清境遇。坐聽百禽響。日晏不忍去。微雨西北來。颯爽動林莽。歸鞅一回首。孤利屹當午。終期濯涼風。杖策縱高步。

同陳太丞遊龍興寺經藏院

空堂洒寒水。碧楸涼漠漠。高眠得珍簟。委棄巾與屨。薰風穆然來。殿角鳴金鐸。清香有時間。幽鳥無聲落。論詩愛平淡。語道造沖寞。非吾方外友。誰當共茲樂。

和晏相公湖上遇雨

公堂日多暇。薄暮遊清池。孤雲從西來。若與飛蓋期。急雨亂荷芰。紅綠左右披。沙禽帶溼起。簇簇守前坻。煙樹晦空曲。蟬聲寂無遺。殘炎一洗濯。霽景開林西。禽飛還清波。蟬噪復故枝。晚槿揚朱華。秋草含碧滋。篙舟出堤去。微風滿平漪。卷幔極悵望。正見隗與箕。舉酒無塵情。慨然起遐思。永懷古先訓。默蹈通介宜。乃知賢哲心。所得非遊嬉。

答曼叔見寄

日君同里閭。杖履數相過。靡爲不吾咨。有倡必君和。春風南陌遊。炎月北窗臥。貪從德義樂。不覺歲月破。而君宦遊者。動足落羈瑣。襄城雖近邑。去局有重坐。子來誠獨難。我往義當果。時天雨方霽。綠樹垂穠穰。策馬望城郭。青山映煙火。解衣塵慮清。垂箔月華墮。怜君九品賤。志尙勇不挫。乃云曹事簡。經史日自課。出詩且百篇。語法就平安。相別不滿歲。美譽亦已播。顧慙糠粃姿。幾不見揚簸。投章匪云報。亦用警庸懦。

答象之謝惠黃精之什

仙經著靈藥。茲品上不刊。服之歲月久。衰羸反童顏。巖居有幽子。乘時斲蒼山。溪泉濯之潔。秋陽暴而乾。九蒸達晨夜。候火不敢安。持之落城市。誰復着眼看。富貴異所嗜。口腹窮甘酸。貧賤固不暇。錐刀乃其干。坐使至靈物。委棄同草菅。惟君冲曠士。敦然守高閑。食之易爲力。天和中自完。故以此爲饋。其容幾一簞。報我三百言。浩浩馳波瀾。何以喻珍重。如獲不死丹。方當煩燠時。把玩毛骨寒。它年靈氣成。與子驂雙鸞。

奉和象之夜飲之什

淫陰泄爲雨。十日瀉不停。蓬蒿長四壁。濁潦流縱橫。嗷嗷鶴羣游。閣閣蛙亂鳴。端居積幽抱。沈鬱久未平。是時甫幾望。月魄嚮已盈。浮雲失四顧。孤輪午亭亭。微風濯炎熱。衣巾凜餘清。起我不暇懶。逍遙步前庭。煩憂忽以去。曠如出幽囹。顧謂汝妻子。速具煎炮烹。同里四五人。予期得邀迎。隨時具蔬果。飮飯甘與青。

雖無水陸珍。亦足侑盃觥。所期在乘興。豈問多品名。諸君於我厚。匪貌實以情。從容談笑間。蕩不見府城。看來必虛反。觴至無留行。豈惟清言勝。或以善謔并。高風揖巢許。曠論齊殤彭。不知軒冕貴。直以道義榮。置身豈非德。撫事臨若驚。上天作陰沴。降水災吾氓。茫茫野郊外。浩若翻滄溟。垣廬隨波盡。稼穡安有成。所聞此害廣。郡國多所更。吾君急病民。定見寬稅征。困廩無蓋藏。何以活鰥嫠。我曾不是恤。方以口腹營。念始昔從學。潛心於六經。頗知聖人道。要在及蒼生。胡爲取自足。而不推其贏。頑然度歲月。如鼃守坳泓。中而復自思。此其義所寧。聖朝盛搜拔。列位羅羣英。晨興朝國門。冠蓋多於星。呈材必夔稷。抗議皆顛閔。雙鳧與乘鴈。未足關重輕。奈何不知量。欲以愚自呈。退之亦有云。其猶進豨苓。不如且飲酒。茲事未易平。

同曼叔遊高陽山

久聞高陽勝。近在汝州側。跂予三年望。我願今卒獲。煙雲函兩山。臺殿開半壁。解鞍高林下。仰視怯登陟。蒼松盤老枝。矯矯入簷隙。微風韻其上。落耳寒惻惻。枇杷兩高樹。中國所未識。葉間青實駢。大與蜀土敵。我來暮春後。花草已狼藉。不見躑躅紅。西巖向人碧。出門步榛蒼。微逕不可索。援蘿下幽澗。剝蘚題蒼石。鳥啼無定音。虎鬪有遺迹。石臺平挺挺。野竹瘦歷歷。主人尉下邑。奔走因符檄。喜我蕭散人。幽奇共搜剔。息陰時一憩。貪勝還自力。歸時山氣冷。草露溼遊屐。舉手謝峰巒。高秋復來覲。

同曼叔遊菩提寺

高城如破崖。寺帶喬木古。禪房掩清晝。佛畫剝寒雨。荒池野蔓合。濁水佳蓮吐。蕭條聯騎遊。淡薄對僧語。秋風日夕好。勝事從此數。

遊漢高帝祠

平橋架荒塹。東上大岡尾。岡頭古木合。有廟蔭其底。攝衣陞殿墀。龍顏儼當几。蝙蝠畫帳喧。鼠嚙珠旒墜。不知誰來祀。狼藉樽與篋。殘碑壓鼈背。上有太和字。去此數百載。文剝失所次。伊人昔經構。視漢猶視彼。徘徊懷古意。日暮悲風裏。

朝發靈樹寄曼叔師厚

朝發雲樹東。曠野陰氣積。驅馬入草間。左右號鶴鷁。重雲黝玄幕。孤月隱白壁。欹危涉塗淖。轉側緣溝脉。涼風滿川陸。眺覽多所適。卻想會合樂。轉首已成昔。諸君豪俊士。經訓飽搜擿。上下古與今。抗論堅莫敵。顧我處其間。傾聽但跼蹐。校士豈所當。直以氣類得。譬如禮天壇。圭璧奠且植。陶匏以其質。並列不爲惑。論心見表襮。吐口出白黑。朝案每共飲。夜牀仍抵蹠。嘲諧間一發。清笑高啞啞。自謂得如此。至死無厭斲。敢於百里間。而憚轡與策。因詩謝所思。酬篇無我默。

滄城

駸駸二三騎。南並橫山去。山窮遠川出。始見滄陽樹。荒城蘿葛合。表裏無寸土。但聞烏啼聲。不見烏啼處。

呼兒開棘扉。掃榻坐茅廡。清泉給盥濯。涼風生仰俯。濁醪稍似佳。山菓來近圃。始酌薰然和。中飲淡無慮。案頭伏羲經。編絕幾見補。先生發其微。大義談四五。紛攘自諸家。簡易獨太古。形骸非我有。冠帶尙誰取。道存固匪外。兩致默與語。是時季春望。山月夕已吐。清光出深竹。葉上露如雨。寒侵毛骨生。思有煙霞舉。卻念人世間。紛紛何足數。

晚過象之葆光亭步月

浮沉閭里間。放志謝維繫。行貪月色靜。歸犯霜華溼。寒鼓出城重。飛星過樓急。卻想竹庭下。主人猶獨立。曉出郊過方秀才舍飲

浮雲散朝陰。初日動晴煦。行隨風葉遠。去傍田家路。人閑無遽色。馬緩有安步。遙識主人舍。青帘出霜樹。送寧極還山

晨冰結車轍。朔野風正厲。君行良亦勤。正與苦寒值。超然出門去。曾不顧我議。譬如雲飛鴻。勢不受維繫。開籠恣其往。萬里在展翅。場功十月畢。田家足幽事。兒童樵牧歸。荆扉寂已閉。燃薪燭茅屋。並坐姪與弟。自愛村醪熟。或以山鹿饋。凍蔬斲青黃。寒藥煮根柢。從容溫飽間。萬事一無累。嗟予不得往。注目雲接地。答曼叔見謝穎橋相過之什時寧極先生同往

穎川今古賢豪多。後生繼者爲誰何。吾交曼叔少挺出。力自樹立非由它。潛心直欲到聖處。論議不避況

與軻讀書下筆知所趣。崇樹蘭茝遺蒿莪。軒昂頭角事高大。肯與世俗同其波。一從得官坐山縣。有如鷲鳥着網羅。朝符暮檄困奔走。尙畏官長來誅訶。時時矯首塵埃下。窺覩風月偷吟哦。我憐軼才就羈絆。歲一往視無蹉跎。扁舟遠放汝水岸。濁酒暮醉高陽阿。前時捧牒來穎上。謹視斂糴譏姦訛。官曹寂寞古寺冷。況值朔雪飛傿傿。馳書里中二三友。固要以義當予過。星言整駕夕已至。霜橋晚度冰峩峩。燃薪暖我煩飲我。斟酌肺腑調鹽醎。傾壺舉觴紛左右。客飽而笑君顏醜。危然正論中法義。豆籩羅列陳象犧。嘲排乘醉忽以發。馱如鑿水放九河。哀絃孤引四坐寂。繼以簫笛相諧和。先生久與人迹絕。心如止水形枯柯。忽驚此樂非外獎。不覺撫手促而歌。歸銜絡馬屢見奪。欲去未忍還婆娑。空堂想見別後意。一燈夜守陳編哦。興來落紙成大句。勢欲李杜相凌摩。緘題見寄邀以和。大江洶湧難爲沱。短篇澀訥非所報。爲我揮筆芟煩苛。

南溪

長林拂雲根。一逕絕城腹。荆扉帶翠樾。斗下地愈束。清溪自南來。勢抵北崖曲。清平水流漫。東去入脩竹。境幽百物遂。魚鳥得所欲。況依仁者居。不與鈎彈觸。有如佳賓至。相與娛聽矚。鳥飛鳴我傍。魚泳出深淥。薄暮登前岡。四顧山在目。雨滋春稼繁。風動野花馥。達人樂天性。不待外物足。遂令茲地勝。久不事營築。願我指崖下。秋當結茆屋。渠波環古臺。輦石坐幽澳。霜前復來觀。兔肥山酒熟。

陪寧極回馬上作

我有龍陽約。垂駕輒復停。念與高士期。不宜後其行。春風三月尾。澗谷花草明。尋花踏幽草。南出山脚青。婆婆一古樹。是曰先生庭。館我茅簷下。山瓢日夕傾。摘林釘朱實。掘竹羞紫萌。朝聽谷禽響。夜對山月清。高論簡以正。疎懷淡無營。徒知服深遠。難用一善名。維也少頑鈍。幾爲世網嬰。一親德義遊。頗見外物輕。門牆儻可依。他時來執經。

答公懿以屢游薛園見詒

抱痾積閑縱。世味頗能淡。惟於山水娛。自謂老不厭。況茲伊洛間。久畜游賞念。幽扉深隱竹。小約度平塹。解鞍庇清陰。拂席見殘豔。長溪自南流。小閣忽東瞰。游人坐兀兀。鳴鳥來泛泛。蟹潛石穴幽。魚泳柳根暗。川童或羣嬉。林女有孤覘。醉觴豈留行。吟筆靡停占。臨歡興何長。遵事迹猶暫。伊予志巖壑。偶官祿石甌。要須三徑足。歸跡便可斂。買林接婆婆。鑿澗分澗澗。田廬常閉門。野艇時放纜。聊書平生懷。特爲異時驗。

寶應寺

林巒若無路。鍾磬時出谷。鑿石排僧龕。研金畫佛屋。日沒上方夕。明燈滿雲木。

利涉塔院院有呂文穆讀書堂利涉法師塔

許公讀書地。塵像一來拂。門掩僧不歸。簷低鷺飛出。高人不可見。石塔鎮寒骨。

盧溪虛搆讀書處

伊人沒已久。溪溜亦如綫。淳氣揖老僧。清陰坐春院。始悟入山深。幽林鳥聲變。

西溪

我從南嶺來。引轡下雲木。不知溪流處。但見翠滿谷。涼葉覆山泉。脩篁翳茆屋。

答原甫試墨見詒

金壺道人丸法墨。持賣都城人莫識。君先得之寫大句。光與目彩相吞蝕。句精墨妙氣怒豪。意欲斬鯨連巨鼈。鯨鼈天地兩微物。何足辱吾鈎與刀。丈夫卷舒固有道。願君少安無草草。都城不獨墨好酒亦好。安得不飲自枯槁。

和原甫去年對雪思梅今年對梅思雪

中州寒燠與南異。常恨梅花開不早。今年朔雪冬不飛。臘月繁英似南好。君憐芳物感時節。愁見高風凍雲掃。苦嗟十九不稱意。徒自令人顏色老。雪遲梅早非我力。會使金樽日傾倒。

奉同原甫槐陰行

天門觀闕雙凌霞。下有馳道開平沙。高槐左右覆朱棧。綠陰翠氣相蒙遮。朝回巨雲下寶騎。游散掣電奔香車。我慙太學官況冷。旦暮出此驅疲駟。清風吹涼南就局。炎日轉景東還家。昏然百事不知省。空復春

葉零秋華。

和沖卿晚秋過金明池

聞君西郊行。正值秋風晚。清霜卷枯荷。碧玉瑩池面。浮空結脩梁。涌波抗華殿。雲煙渺淨色。覽望一蕭散。緬思暮春際。都人盛嬉燕。連帷錯繡綺。方車駑金鈿。填填鼓鐘響。耳目厭譁眩。乃令塵囂辭。而有清曠戀。達人冥至理。喧寂無異觀。偶然乘化往。何適非汗漫。吾知禦寇游。所樂在觀變。

和永叔小飲懷同州江十學士

翰林文章伯。好古名一世。家無金璧儲。所寶書與器。北堂冬日明。有朋聯騎至。新樽布几案。二鼎屹先置。大鼎葛所銘。小鼎澤而粹。坐恐至神物。光怪發非次。羣賢刻金石。墨本來四裔。紛穰羅卷軸。指擿辨分隸。其中石贊藏。家法非一二。精莊與飄逸。兩自有餘意。興來輒長歌。歡至遂沉醉。顏飢足簞瓢。韓飲尙文字。乃知內可樂。不必鐘鼓貴。溫溫江馮翊。茲理久所詣。賦詩多雅言。嗜酒見淳氣。歲晏不在席。使我長嘆喟。

奉同原甫賦澄心堂紙

江南國土未破前。澄心名紙世已傳。高堂久傾不復見。誰謂此物猶依然。當時萬杵搗雲葉。鋪出几案滑且堅。剡溪藤骨不足數。蜀江玉屑誰復憐。君臣嬉燕盛文采。駢章儷曲鬪巧儼。一朝零落隨散地。中原篋笥生光鮮。君安得此尙百幅。題以大句先羣賢。羣賢落筆富精麗。瓊瑤寶玦相鈎聯。嗟予材力豈當敵。雖

欲強賦何能妍，耽獨玩物古所戒。崇尚浮藻政豈先，江南可哀紙可惜。後有觀者存吾篇。

同勝之明叔游東郊

仲冬景氣佳，曠然思遠涉。晨遵大堤去，寒日在馬鬣。浮屠紅塵外，樓殿煥層疊。地遐景幽閑，瑤碧秀林葉。清香時出箔，餘經尙委笈。躋閣眺遠陂，浮陽來暉暉。花枝亦已柔，行見春露浥。久耽田野樂，況與賢俊接。逍遙永日暇，塵事不過睫。昔人重時晷，所志樹勳業。慨予胡不然，空陋無所挾。詩情朝生腸，酒氣暮醺頰。陶陶大化內，得此自爲愜。諸君能我從，游履方屢躡。

次韻和平甫同介甫當世過飲見招

炎風得秋亦已涼，喜抱塵策羅南窗。策中古人不可見，獨詠君子予心降。高文大論日傾吐，響快有類鐘應撞。卻嗟吾儕多暇日，一作俚謠一作暴謔何其哢。驅車正得我所念，起具肴蔌陳杯缸。自憐愚戇接豪邁，弊履乃與華冕雙。聖經王道有本末，刺挹醇粹揮其尨。須臾上下今與古，武庫攬攬千矛鏜。疑懷滯義一開豁，有如暗室來明缸。馮侯抗議亦殊健，短鈎長脰相撐撐。介卿後至語閑暇，偃載戈甲韜旌幢。弱弓枉矢尙何用，久已束手甘避逢。是時君有山陽役，扁舟已具河之缸。朝吟淮山翠撲撲，夜夢楚水鳴淙淙。軒然欲去坐所惜，文字雅正姿信恠。行年三十不得飽，況有薦道登朝邦。遂令奔放不自斂，欲旅漁釣終湖江。朝廷搜賢無遠近，北盡塞漠南嶺瀧。如君才大齒且壯，安可推亮而居龐。來詩云·孔明·功名得時看樹

立。豈若都尉眉空虜。

和吳九王二十八雪詩

方冬氣潛溫。得晚陰始重。狂隨風力翻。怒若雲面涌。中微玉霏屑。後盛毛紛毳。寒光動城闕。甘滋入田壟。鵬鷺海水飛。驥憤鹽車罽。縈樓巧作層。覆道高成甬。羣方破昏霧。萬物被光寵。塗歌涵太和。送賀仰高拱。判官坐丞華。賦詩掩垂隴。貂裘擁宵談。金盃落晨捧。此與吾不薄。君門旦當踵。

答曼叔客居見詒兼簡里中諸君

少乏經世才。引分甘自置。不意田野姿。尙爲軒冕寄。三年太學館。飽食無所議。京都多賢豪。出入許陪廁。時從騎省吟。或就步兵醉。低回衆人內。自謂處身智。耽耽祕書府。實待才俊地。乃昏落其間。衆口沸嘲詈。茫如觸駭機。狂顧不知避。忽逢故人來。一道平生志。歸心西南飛。勁疾霜後鷺。遠慙龍陽隱。寧極處士近愧葆光吏。象之官不去里葆光所居亭名。詩以謝諸君。顛冥非我事。

南堂對竹懷江十鄰幾

端居無所聊。稍覆治文字。南堂冬日明。窗戶暖可喜。圖書羅滿前。意覽不由次。聊收靜者趣。以亂憂人思。亭亭當軒竹。使我長歎喟。封植苦不早。顏色頗顛頓。勁節亮不改。虛心如有遲。緬懷江夫子。循道久不試。邈然高簡姿。不受世俗累。一官才復進。左譎良何亟。德義我所珍。軒冕安能貴。長嘯汝水濱。濁醪日自釀。

效陶有新篇。

君詩多效陶潛。

翼孔著高議。

君著春秋左氏傳論。

絃琴坐虛室。默與古人值。顯晦一其心。淡然天淳粹。思

之不可見。暑謝寒已摯。諒非對此君。茲懷何由慰。

和子華兄晏王道損公宇

濟濟高燕會。衆賓且喜樂。方冬氣常溫。是日寒始若。愁雲際平林。垂見雪花落。四座喜相顧。有引必虛爵。中堂豈非佳。東圃羅帟幄。當亭列射格。抗的明灼灼。彫弓既出。張勁矢各在握。主人揖讓興。客以次序作。目喘綵樹移。心傾鳴鼓數。笑言何謔失。儀節亦稱媿。酒酣事頗變。極口縱談諠。失令固有罰。出語輒見酌。平生愛疎放。論議鄙齷齪。歡來一狂散。豈顧醒後怍。詩人亦有言。善戲不爲虐。所賴衆君子。闊達見表襮。還家遂酩酊。豈復記鳴柝。

送李寺丞宰藍田李久閑居

君誠巖壑徒。出宰亦山縣。尙喜終南峰。蒼翠不去眼。春風吹征車。千里度瀟灑。到日勝事繁。花光老秦甸。

又和楊之美家琵琶妓

楊君好古天下無。自信獨與常人殊。勤身所營世或棄。反眼不顧我以趨。彼其察物類有道。能取精妙遺其麤。官卑俸薄不自結。買童教樂收圖書。客來呼童理絃索。滿面狼籍施鉛朱。樽前一聽啄木奏。能使四坐改觀爲歡娛。有時陳書出衆畫。羅列卷軸長短俱。破緜壞紙抹漆黑。筆墨僅辨絲毫餘。補裝斷綻搜尺

寸。分別品目窮錙銖。以茲爲玩不知老。自適其適誠吾徒。豈無高門華屋貯。妖麗中挂瑤圃崑崙圖。青紅采錯亂人目。珠玉磊落燹其軀。苟非絕藝與奇迹。楊君視之皆蔑如。楊君好古天下無。

遺吳冲卿大饗碑文

蒼碑剝龍螭。突兀古殿側。世變文字異。歲久苔蘚蝕。諒非好事者。塵土未嘗拭。我來仰首看。百過不自息。曩者魏方盛。帝丕託威德。馳驅百萬衆。南指斗牛域。誓將殄氛祲。飲馬長江邑。翠華鬱回翔。高會誇故國。肅肅環珮響。煌煌羽旄飾。鼓鍾何鏗鏘。淮漢爲震仄。罷饗示得意。摛文永鐫勒。從臣梁孟皇。隸法當世特。奉詔無與讓。淋漓奮其墨。爾來幾千歲。卓卓見筋力。端莊九鼎重。勁挺羣珪植。威儀商山老。氣象漢庭直。惟昔銘枸戈。先儒固難迹。況我蔽陋極。視此空歎惜。常恐日磨滅。不辨點與畫。呼工模於紙。一掃見白黑。緘包比瓊瑤。把玩廢寢食。于時大經九。有詔講謬忒。刊之太學中。爲後代法式。冲卿邦家彥。學問古今積。辭端海鯨運。筆力霜鷲擊。况茲服儒官。洒翰固其職。楷模所流傳。歷世動千百。自非體法正。徒使觀者惑。厥初篆草隸。根本君已極。聊持釘張翫。庶以參得失。

飲聖俞西軒

歡常以飲合。歡意則非外。今吾二三子。共此西軒會。主人吾儒秀。言與二雅配。酒行倡大論。文字略瑣碎。上言評人物。要當本諸內。下言譏爲學。不以滿自槩。唐之衆詩人。區別各異派。一經君子評。斂鑿音棄作棄秕。

構予曰吾聖俞名足通後代。答我文如韓。尙有六經在。況吾何所立。聞譽若抱蠹。聖俞善誘掖。斯語不無佩。戒意欲令吾曹。事業進以大。我雖頑無能。聞此亦健快。呼觴滿自引。不畏坐客怪。歸來書短篇。聊以記所佩。

答賀中道燈夕見詒

春風揭屋沙激窗。兀然孤坐如植杠。酒昏兩眸澀不視。案上書策徒攓攓。獨待高篇恣哦詠。頓覺精銳還軀腔。前時官家不禁夜。九衢豔豔燒明缸。綵山插天衆樂振。游人肩摩車轂撞。君於此時守經籍。直欲行業純不尨。想初嘉句落紙際。筆下袞袞來長江。我今散懶世味薄。惟於靜者心爲降。江翁蕭閑梅老淡。文字酬酢交矛鏜。恨無奇麗與鬪角。日策疲馬參其雙。能來相從不憚數。與子賦詩傾酒缸。

和如晦遊臨淄園示元明

平津開館大道西。桃夭杏姪通園蹊。東風入林朱白動。次第裝遍枝高低。紅梅最好花正盛。我時往看歸。仍攜爾來風雨就零謝。忍見踏盡隨春泥。廣文先生厭閑冷。投書結伴散馬蹄。主人同僚相門出。未肯朝暮甘鹽齏。歡然握手喜迎候。促具並走子與妻。插芳咀甘不知去。歸舍已見雞在栖。坐揮大句鄙凡近。脫落塵迹登天梯。不因時節自娛放。頗置白黑爲愁悽。我昏如此漫不省。何異車鼓樂鸚鷕。長安綠酒春正美。與子一醉萬事齊。

答和叔城東尋春

尋春之何許。乃在城東隅。東隅信佳處。名園間精廬。時屬積雪霽。田壤墳以蘇。雍容二三騎。並轡徐厥驅。僕童怪且議。寒野安所娛。不知陽和氣。泱泱于空虛。仰視孤刹起。突兀疑神扶。其下萬華屋。碧瓦魚鱗鋪。南行歷亭館。近接棟與櫺。陰草含碧色。陽條散紅腴。周覽氣象嘉。高步形跡舒。提攜上樽酒。饌不過魚蔬。爲奉豈非薄。歡至自有餘。卻思九衢上。車馬何區區。紅塵塞兩眼。勢利各有趨。雖欲求暇逸。何能幸須臾。君勿輕此樂。此樂未易圖。

招景仁飲

紅薇花拆萱草丹。萬鈴嘉菊重臺蓮。問公此時胡不飲。樂有至理須鑽研。后夔已遠師曠死。寂寞千載無其傳。公窮天數索聖作。坐使綠鬢成華顛。屠龍絕藝豈世用。儀鳳至業非公專。洛陽有客金石堅。持議不屈難鑊鑄。園收獨樂會真率。以勞效佚寧非偏。古稱兩忘化於道。此理豈不曠且然。折花持酒待公醉。樂至無聲方得全。

次韻和君實寄景仁

予年行七十。惟日就志昏。雖高鴻鵠舉。尙困雞鶩喧。壯心久已摧。弱羽不得翻。每誦少游言。顧慙下澤轅。蜀公有高志。謝事久杜門。擾擾世俗務。不復挂口論。羣經雜圖史。擁坐如周垣。上談千載故。速若水注盆。

客來必命酒。左右拱諸孫。雖無歌舞歡。自喜談笑溫。仰高顧吾私。有類羝觸藩。尙期蓬華完。亦有桑榆存。近觀敕子詩。尤見朋義敦。卜居近吾廬。指日駕君轡。構堂始云基。築圃亦已樊。前知會合期。不慘離索魂。想像入第初。親賓燕華樽。談高一理會。體王百疾奔。共完天純粹。豈識世詐諛。方笑司馬翁。獨樂守空園。

獨樂·君
實園名·

寄秦川馬從事

往歲游西謁。季長隴雲秦。樹勝風光分。題紅葉蠻牋。膩對舉流霞。綵袖香。宴洽翠娥連。象榻夜寒嬌。鳳泥銀簧未知早晚重。攜手惆悵而今鬢已蒼。

春霽憶洛陽

少年結客洛陽時。閑傍東風駐馬蹄。山色遠饒潘岳宅。波光輕撼窈娘堤。花繁到處紅如堵。酒好尋常醉似泥。賴有金臺舊知己。應憐魂斷虎牢西。

春朝

燕語聞多日。蠶眠過幾宵。花深不辨蝶。柳暗欲迷橋。便面金環重。障泥玉勒驕。黃公酒壚上。誰貫阮孚貂。

晚春

春暉東去月收弦。卻拂凝埃敞北軒。幾曲雲屏空白晝。一簾花雨自黃昏。庭蕪碧合陰蟲息。牕樹紅稀鬪

雀喧細憶舊歡都入夢。習家池上子山園。

象之以山藥見贈

龍山有游客。贈藥滿筠籠。葉漬沙泉碧。苗分石竇紅。斲應侵曉露。來喜及春風。卻笑丹砂遠。辛勤勾漏翁。

飲方君舍晚歸

慘淡秋原思。歸鞍暮向城。野風吹酒散。寒日上衣明。躑躅樵兒聚。喧呼獵騎輕。村醪處處熟。准擬數來行。

自靜教院晚步溪上

雪盡岡頭路。風和臘後天。人安閑淡內。鳥下寂寥前。凍水晴初浪。荒城晚自煙。西橋車馬急。歸意向留連。

同化光陪寧極之滢陽城

不踏南溪路。于今五換春。能來再聯騎。還是舊遊人。置酒真乘興。談經或入神。歡餘不無愧。林壑未還身。

之石橋是日風陰異常

聞說西橋水樹間。不辭驅馬涉風煙。疎籬老屋臨官道。瘦棘荒茅蔽石田。欲下鳴鷓盤木末。遠來驚雉落山前。瓢中幸有村醪美。不怕春寒雨滿川。

過邵先生居

竹塢斜開逕。茅簷半卷書。幽閑入高臥。淡薄見平居。亂水隨籬引。殘花不掃除。因君勤高興。回首想吾廬。

寶奎殿前花樹子去年與宋中道同賦今復答宋詩

長條飛動不依欄。淡粉濃朱巧作團。無語不辭終日立。有情曾是隔年看。春羅試舞衣新換。古錦藏詩墨未乾。我爲愁多悲節物。欲酬佳句淚霑翰。

和子華兄同永叔飲三班官舍兼約明日飲永叔家

視草名臣潤色才。玉墀晨退共徘徊。朝廷無事文書省。臺閣相歡笑語開。少厭賡酬停落筆。旋尋歌舞約銜盃。廣文主簿官閑冷。不是詩情豈合來。

謁象之同諸君步之東禪院

二年憔悴走京塵。匹馬歸來訪四鄰。足滑舊諳城下徑。眼明重見里中人。青蔬不沒荒畦雪。翠栢常留野殿春。風物自如人事改。夕陽衰淚落衣巾。

奉和喬年館宿

蓬萊仙構斗魁旁。遞直初登漢署郎。雲向城頭收暝色。月從樓角放寒光。行看砌菊嗟殘豔。坐對書芸襲暗香。景物過清渾不寐。素經讎罷得新章。時喬年校醫書

寄題蘇子美滄浪亭

聞君買宅洞庭傍。白水千畦插稻秧。生事已能枝伏臘。歲華全得屬文章。騫飛靈鳳知何暮。蟠蟄蛟龍未

可量。莫以江山足清尚。便收才業傲虞唐。

寒食出郊

都門氣象雨餘佳。壓盡風塵見草芽。日薄風和近郊路。朱紅粉白遠林花。堤間獨去嬾珊女。柳下相逢纏轆車。絲鬢未催樽酒在。不須辛苦問年華。

城西

繡鞅金羈十里塵。共傳恩詔樂芳辰。千重翠木開珍囿。百尺朱樓壓寶津。御柳初長遮雉雉。宮花未識駭遊人。自憐窮僻看山眼。來對天池禁籟春。

送劉景元觀察守襄陽

荊州太守駕朱轡。寶筆題詩出御前。應厭笙歌消暇日。欲將才業效當年。千章翠木雲間寺。百丈清江雪後船。看取古來良吏迹。蒼碑突兀峴山巔。

和伯壽祕監

曾陪道論接清歡。屈指如今四十年。不用笙歌娛上客。直將風月待高眠。黃花一醉猶能否。白首相逢是偶然。便欲投官結閑伴。家山況與碧嵩連。

題卞大夫翠陰亭

新得亭名號翠陰。軒窗環合盡青林。定知野客先回顧。何處山禽自好音。池面有蓮風氣馥。城根多竹月華深。明年便作歸來計。應許攜樽與抱琴。

和太素同看梅花寄子華

寒林凍卉誰觀者。繁豔清香自得之。天賦好花如有待。日尋幽徑不知疲。未逢驛使空懷遠。猶喜山翁亦好奇。昔歲一觴今一詠。共陶真意不爲私。

樂道示長句輒次韻

光陰不覺成陳迹。事變何嘗有定期。身外閑愁無自入。飲中歡興未全衰。編排暑後新投酒。點檢秋來合唱辭。更欲邀君浮畫舫。藕花菱蔓滿西池。

和詹叔遊廬山見寄

香爐峰色壓羣山。仰眺頻欹使者冠。江面煙波搖紫翠。佛宮金碧照晴寒。密藏幽谷梅千樹。散走鳴泉竹萬竿。今日頓驚塵慮盡。一章佳句雪中看。

和朱主簿遊園

白首昏昏度歲年。忽聞春至便開顏。溪頭凍水晴初漲。竹下名園晝不關。旋得歌辭教妓唱。遠尋梅豔喚人攀。如今尙有官拘束。解組歸來始是閑。

登湖光亭

雪盡塵消徑露沙。公家池館似山家。翠痕滿地初生草。紅氣通林未放花。匣岸平波清照鴈。壓城危榭斗回鴉。自慚白首猶圭組。此地年年賞物華。

公時遺石榴

高冠趨尹君方椽。成都促席迎賓我已翁。河交態不忘平日厚。歌聲猶似少年工。映階露菊秋吟苦。盈筥霜榴歲問通。每與東鄰話知舊。白頭強健幾人同。景仁

登城樓呈子華

麥苗黃熟稻苗青。餉婦耘夫笑語聲。樓上清風簾箔靜。田間白水鷺鷗輕。展親會集從容樂。娛老謳吟放曠情。羽孽漸消民食足。更無餘事計虧成。

又和子華

沉陰消盡見春和。初放扁舟泝綠波。水際踏青憐日暖。林間舉白爲花多。狂從田婦窺籬看。醉任家童刮鼓歌。年少縱歡饒點檢。老懷終不挂誰何。

同化光飲象之家

又從鄰舍客。來折主人花。游處當年似。悲傷老去加。興長歌易放。情密語無譁。歸路生殘月。春風醉袂斜。

和謝主簿遊西湖

雲陰開剝日光穿。和氣隨風近酒船。湖面波清渾見底。樓頭山碧自生煙。興長不忍回孤棹。歌懶才能逐緩絃。因子樽前話歸計。醉魂先到峴山邊。

景仁招況之聞用歌舞望門而反作詩戲之

一夜嚴風結素波。盍簪寧避曉寒多。范滂攬轡方清俗。墨子回車豈惡歌。雲外雁寒驚歲晚。林間鴉語弄春和。知君不久承寬詔。始奈紅裙綠酒何。

襄柑分惠景仁以詩將之

荊州解綬十經春。迴夢青林遶漢濱。霜氣輕寒催紺實。渚波餘潤作甘津。僧園採掇寧論數。客路奔馳竟占新。雪意垂收高會缺。分金聊助席間珍。

和三兄游湖

竹陰迴抱柳陰敷。石色青青潤不枯。暫到已驚風力勁。更清須待月輪孤。波涵天影迷高下。雲覆山光變有無。暑退疾清人意健。縱吟狂醉是良圖。

和景仁元夕

月上朱樓角。風搖翠篠層。傳聲迴步輦。滿目爛行燈。簫鼓千門沸。弓刀萬馬騰。詩翁懷盛事。眉雪慘霜稜。

禁戶千通鼓。天街萬點燈。懷君瑩如玉。驅馬不嫌冰。樂事看流俗。狂游記舊朋。回思真夢幻。不待訪林僧。

謝堯夫寄新酒

故人一別兩重陽。每欲從之道路長。有客忽傳龍坂至。開樽如對馬軍營。嘗怪杜詩曰。洗盡開營對馬軍。及得錦屏山題名。有寄酒者。然後燿然。定將瓊液都爲色。疑有金英密借香。卻笑當年彭澤令。籬邊終日歎空觴。陶靖節云。秋菊盈園。而時醪靡至。

和謝厚卿載酒見過

應爲閑門境太清。固攜歌管逐雙旌。酒逢歡後寧論量。語到真時不屬情。木葉吟風千籟作。菊叢含雨萬珠明。知公几案常豐暇。詩思如泉日夜生。

謝到水仙二本

黃中秀外幹虛通。此花外白。中黃。莖幹虛通如葱。本生武當山谷間。土人謂之天蔥。乃喜嘉名近帝聰。密葉暗傳深夜露。殘花猶及早春風。拒霜已失芙蓉豔。出水難留菡萏紅。多謝使君憐寂寞。許教綽約伴仙翁。

觀安公亭戲呈觀文主人

十五年來此地行。白頭重到不勝情。梅寒未放黃金葉。冰綻初流碧玉聲。憔悴霜松如有訴。庵前一松枯。漚之。汲水。漚。呼園。紛披風竹似相迎。紅裙散後歌音絕。海鶴塔前時一鳴。風流瀟灑。二俱不惡。

寓展江亭謝堯夫寄酒及花

措枉我先違陞石均勞公已下堤沙已欣晚歲逢良友更喜高秋見好花
旨酒芳新來似水危亭清絕至如家三杯舉白歌相和忘卻風前兩鬢華

哭蘇子美三首

未起蛟龍臥俄纏鵬鳥悲寢門號故友總帳哭孤兒業履歸輿議銘文絕愧辭
滄浪亭下路長負故人期

予與子美有滄浪之約今則已焉

魄動書流創子美去冬與予書云誠通夢告悲者且而得訃音人生要有盡君沒竟何施白日空

塵几春風自酒卮旅魂歸未得藁葬近要離

才大終爲累冤深豈復論幾年流落恨千里寂寥魂功業初懷負風流秀句存英靈邈無所灑淚望闔門

和晏相公湖上四首

霧霽山高牖天寒水落沙試披深岸草往往見黃花

穫水登紅稻篙舟割紫菱盃盤見秋物江海思飛騰

風枝挂危葉飛動夕陽中莫遣兒童撼留看著露紅

折葦隨風色枯荷盡雨聲平波極眼淨好放畫船行

答師厚夜歸客舍見詒

幽居直欲學忘言。忍對賢豪遂默然。談到精微夜寥閨。秋風時下竹窗前。

和晏相公湖上十月九日

斷橋孤嶼寒光外。短檝輕舟斜照中。未必江湖能勝此。野棠梨葉赤如楓。

謝送妃子園荔枝

年年驛使走紅塵。貢入驪宮色尙新。妃子園名猶未改。一籠丹實寄閑人。

酴醿花

細萼繁英次第開。攀條盡日未能回。不如醉臥春風底。時使清香拂面來。

城西書事五首

蔬畦遶茆屋。林下轆轤遲。霜蔓已除架。風瓢空挂籬。
朱果繁霜後。甘甜半自零。忽驚林色曙。零落見殘星。
犬吠村墟改。人移井臼空。誰家收栗罷。林腳有遺蓬。
松陰不可憩。冷冽恐飛霜。時有高風過。乾花落石牀。
野竹濛荒塹。寒花亂廢墟。秋郊足幽事。直欲帶經鉏。

徐祕校過池上見訪留二絕句依韻

樽酒浮多蟻，舟蓬覆似蝸。
折楊爭貫鯉，編竹自撈蝦。
憐君此休駕，長日坐傾斜。
山雨催行酒，林煙候煮茶。

洛城雜詩五首

分從柳外揚鞭去，同作花前載酒行。
題得新詩無處寄，維英飛絮滿春城。
楊寺丞持詩見尋不遇

洗馬澗邊芳樹密，欄干仍在碧流西。
香檀亂拍朱絃急，應有遊人醉欲迷。
洗馬澗

上東門外春三月，桑葉陰陰覆菜花。
密竹亂流行逕絕，桔槔鳴處是人家。
上東門外

無數長條亂曉風，誰將紫錦覆春叢。
殘英點落青苔面，獨倚朱欄細雨中。
府署紫錦帶花

櫻桃園裏鳴禽亂，獬豸池邊積草多。
七十年前繁盛地，曲蹊深隧見張羅。
會節

惜酴醿

天意再三珍雅豔，花中最後吐奇香。
狂風莫掃殘花盡，留與佳人貯絳囊。

陪晏相公遊韓王水磴園

行遍洛川南北岸，自憐探賞頗窮幽。
不知物外清閑境，只在韓王水磴頭。

出留守府之東游李相園趙令竹林觀楚家桂樹子去歲數從元獻公爲此行作三絕句以道

悲愴之意

府東朱戶昔嘗開。日日從公選勝來。游履吟毫成故事。斷松飛溜有餘哀。
李家池上朱櫻熟。趙令林中錦籜春。更欲題詩論舊賞。自慙非是絕絃人。
曾陪樽酒詠芳叢。今日遲留意不同。公詩云。更作丹花滿煙。葉。欲令佳客剩遲留。紅萼似知人慘淡。亂隨清淚落春風。

西城

暖風和日著人來。細柳高榆抱逕回。我爲傷春足悲恨。不禁驅馬上愁臺。右愁臺

太皇太后閣

鏤成寶字題宮戶。剪出名花趁御筵。人世不知春色早。忽驚歌吹下中天。

太后閣

金花鏤勝隨春燕。綵杖縈絲逐土牛。迎得韶華入中禁。和風次第遍神州。
綵杖朝來散玉京。綺窗新網結初晴。靜呼宮女教調曲。閑引皇孫看學行。

皇后閣

紫蘭紅蓼簇春盤。曉逐金壺下太官。朝遍三宮歸已晚。日華明麗雪消殘。

夫人閣

漸暖正常挑菜日。輕陰漸變養花天。君王勤政稀游幸。院院相過理筦絃。
宮娃拂曉已催班。拜謝春幡列御前。不待東風報花信。紅酥綵縷鬪芳妍。

醪醖

平生爲愛此香濃。仰面常迎落架風。每至春歸有遺恨。典刑猶在酒盃中。

戲示程正叔范彝叟時正叔自洛中過訪

曲肱飲水程夫子。宴坐燒香范使君。顧我未能忘外樂。綠樽紅芰對朝曛。

曲肱飲水。宴坐燒香。一作閉門燒香。

朝曛。一作斜曛。

卞仲謀八老會

同榜同僚同里客。斑毛素髮入華筵。三盃耳熱歌聲發。猶喜歡情似少年。

展江亭海棠四首

占盡人間麗與華。白頭判得醉流霞。誰將法錦翻新樣。紅綠裝成遍地花。

昔年曾到蜀江頭。絕豔牽心幾十秋。今日欄邊見顏色。夢魂不復過西州。

紅糝裝條嫋嫋長。人間不合有天香。此花無香千觴未足酬佳麗。回首東風更斷腸。

又避寒風與暖曦。年年長此探花期。如今太守尤珍愛。只許官娃戴一枝。

和杜孝錫展江亭三首

斜日低雲動水光。偶尋佳處閱羣芳。城闌不隔和風度。吹過千花百草香。驚鷺飛鳴避畫橈。游人笑語過朱橋。買家園裏花應謝。綠遍牆頭野杏稍。世情未免歌紅粉。道韻無妨寄白雲。歸路看花應更好。林間明月涌金盆。

和微之飲楊路分家聽琵琶

酒熟梅香臘後天。春鶯巧囀忽常筵。共嗤白傅辛勤甚。萬喚千呼始上船。朱絃四十昔嘗聞。藝不論多貴絕倫。少損新聲放平淡。免教醉殺白頭人。是夕微之劇飲。歡甚。

再和堯夫同前

教得新聲十二絃。每逢嘉客便開筵。春湖水綠花爭發。好引紅粧上畫船。遇酒逢歌觸處春。白頭相視若天倫。須知丞相官儀重。不及琳宮自在人。

閑居思湖上

遠泛每思隨鴈鷺。深居半是避杯觥。官閑日永無餘事。臥聽朱絃教曲成。

庵中睡起五頌寄海印

窗間日射寒松影。枕上風傳過雁聲。夢境覺來元一際。不勞脣齒話無生。

四山標韻出風塵。高下雖殊一色均。爲我終朝談實相。參差庭栢敞精神。
刻竹紉絲雖短長。誰教曲折號宮商。自從眠處知消息。終日笙歌是道場。
飯後西堂百步行。困來合眼是無營。從生至老非他物。道著如今已是情。
火衰水劣病餘身。未散虛空一聚塵。更欲強招年少客。折花同賞夢中春。

臨川詩鈔

王安石字介甫臨川人。後居金陵。亦號半山。登進士上第。簽書淮南判官。再調知鄞縣。通判舒州。召試館職。不就。用爲羣牧判官。知常州。移提點江東刑獄。嘉祐三年。入爲度支判官。俄直集賢院。明年。同修起居注。知制誥。糾察在京刑獄。以母憂去。終英宗世。召不起。神宗爲太子時。聞其名。卽位。命知江寧府。數月。召爲翰林學士兼侍講。熙寧二年。拜參知政事。變行新法。天下騷然。罷爲觀文殿大學士。知江寧府。再起爲相。屢謝病。又罷爲鎮南節度使。同平章事。判江寧府。改集禧觀使。封舒國公。元豐三年。復拜左僕射。觀文殿大學士。換特進。改封于荆。哲宗加司空。卒。贈太傅。謚曰文。配食孔廟。追封舒王。南渡後。始罷從祀。安石少以意氣自許。故詩語惟其所向。不復更爲涵畜。後從宋次道盡假唐人詩集。博觀而約取。晚年始悟深婉不迫之趣。然其精嚴深刻。皆步驟老杜所得。而論者謂其有工緻無悲壯。讀之。久則令人筆拘而格退。余以爲不然。安石遺情世外。其悲壯卽寓閒澹之中。獨是議論過多。亦是一病爾。

元豐行示德逢

四山脩脩映赤日。田背坼如龜兆出。湖陰先生坐草室。看踏溝車望秋實。雷蟠電掣雲滔滔。夜半載雨輸亭皋。旱禾秀發埋牛尻。豆死更蘇肥莢毛。倒持龍骨挂屋敖。買酒澆客追前勞。三年五穀賤如水。今見西

成復如此。元豐聖人與天通。千秋萬歲與此同。先生在野故不窮。擊壤至老歌元豐。

後元豐行

歌元豐。十日五日一雨風。麥行千里不見土。連山沒雲皆種黍。水秧綿綿復多稌。龍骨長乾挂梁柎。鱗魚出網蔽洲渚。荻筍肥甘勝牛乳。百錢可得酒斗許。雖非社日長聞鼓。吳兒蹋歌女起舞。但道快樂無所苦。老翁塹水西南流。楊柳中間棧小舟。乘興欵眠過白下。逢人歡笑得無愁。

純甫出釋惠崇畫要子作詩

畫史紛紛何足數。惠崇晚出吾最許。早雲六月漲林莽。移我翛然墮洲渚。黃蘆低摧雪翳土。鳧雁靜立將儔侶。往時所歷今在眼。沙平水澹西江浦。暮氣沈舟暗魚罟。欵眠嘔軋如聞榜。頗疑道人三昧力。異域山川能斷取。方諸承水調幻藥。洒落生綃變寒暑。金坡巨然山數堵。粉墨空多真漫與。大梁崔白亦善畫。曾見桃花淨初吐。酒酣弄筆起春風。便恐飄零作紅雨。鸞流探枝婉欲語。蜜蜂掇藥隨翅股。一時二子皆絕藝。裘馬穿羸久羈旅。華堂豈惜萬黃金。苦道今人不如古。

招約之職方并示正甫書記

往時江總宅。近在青溪曲。井滅非故桐。臺傾尙餘竹。池塘三四月。菱蔓芙蕖馥。蒲柳亦競時。冥冥一川綠。方坻最所愛。意謂可穿築。欲往無舟梁。長年寄心目。故人晚得此。心事付草木。消搖欄宇新。攬結蹊隧熟。

更能適我願。中水開茅屋。鬼營誅荒梗。人境掃喧黷。濠魚淨留連。海鳥暖追逐。豈無方外客。於此停高躅。憶初桑落時。要我豈非夙。蠶眠忽欲老。一介未言速。當緣東門水。尙澀南浦舳。吾廬雖隱翳。賞眺還自足。橫陂受後澗。直塹輸前瀆。跳鱗出重錦。舞羽墮輕玉。碧筩遞舒卷。紫角聯出縮。千枝孫嶧陽。萬本母淇澳。滿門陶令株。彌岸韓侯藪。尙復有野物。與公新聽矚。金鈿擁蕪菁。翠被敷苜蓿。蝦蟆能作技。科斗似可讀。樞軒俯北渚。花氣時度谷。耘耔聊效顰。締構行可續。荒乘尙不倦。一晝敢辭卜。雖無北海酒。乃有平津肉。脩脩仙李枝。城市久煩促。寄聲與俱來。蔭我臺上穀。

寄吳氏女子

伯姬不見我。乃今始七齡。家書無虛月。豈異常歸寧。汝夫綴卿官。汝兒亦搢縉。兒已受師學。出藍而更青。女復知女功。婉孌有典刑。自吾捨汝東。中父繼在廷。小父數往來。吉音汝每聆。旣嫁遂願懷。孰如汝所丁。而吾與汝母。湯熨幸小停。丘園祿一品。吏卒給使令。膏粱以晚食。安步而車駟。山泉皋壤間。適志多所經。汝何思而憂。書每說涕零。吾廬所封殖。歲久愈華菁。豈特茂松竹。梧楸亦冥冥。芰荷美花實。瀾漫爭溝涇。諸孫肯來游。誰謂川無舲。姑示汝我詩。知嘉此林垌。未有擬寒山。覺汝耳目熒。因之授汝季。季也亦淑靈。

要望之過我廬

念子且行矣。要子過我廬。汲我山下泉。煮我園中蔬。知子有仁心。不忍釣我魚。我池在人境。不與獮獮居。

亦復無蟲蛆。出沒爭腐餘。食罷往遊觀。鱉鱉藻與蒲。清波映白日。擺尾揚其鬚。豈魚有此樂。而我與子無。擊壤謠聖時。自得以爲娛。

遊土山示蔡天啓祕校

定林瞰土山。近乃在眉睫。誰謂秦淮廣。正可藏一鱓。朝予欲獨往。扶僮強登涉。蔡侯聞之喜。喜色見兩頰。呼鞍追我馬。亦以兩黥挾。斂書付衣囊。裹飯隨藥笈。脩脩阿蘭若。土木老山脅。鼓鐘臥空曠。篋簾雕捷業。升堂廓無主。考擊誰敢輒。坡陀謝公冢。藏椁久穿劫。百金買酒地。野老今行饁。緬懷起東山。勝踐比稠疊。於時國累卵。楚夏血常喋。外實備艱梗。中仍費調燮。公能覺如夢。自喻一蝴蝶。桓溫適自斃。符堅方天厭。且可緩九錫。寧當快一捷。彼哉斗筭人。得喪易矜怯。妄言屐齒折。吾欲刊史牒。傷心新城埭。歸意終難愜。漂搖五城舟。尙想浮河楫。千秋籠東月。長照西州堞。豈無華屋處。亦捉蒲葵箒。碎金諒可惜。零落隨秋葉。好事所傳玩。空殘法書帖。清談眇不嗣。陳迹恍如接。東陽故侯孫。少小同鼓篋。一官初嶺海。仰視飛鳶跼。窮歸放款段。高臥停遠蹠。牽襟肘卽見。著帽耳纔壓。數椽危敗屋。爲我炊陳浥。雖無膏污鼎。尙有羹濡箠。縱言及平生。相視開笑靨。邯鄲枕上事。且飲且田獵。或昏眠委翳。或妄走超躐。或叫號而寤。或哭泣而蹶。幸哉同聖時。田里老安帖。易牛以寶劍。擊壤勝彈鋏。追憐衰晉末。此土方岌業。強偷須臾樂。撫事終愁慄。予雖天戮民。有械無接摺。翁今貧而靜。內熱非復葉。予衰極今歲。儻與雞夢協。委蛻亦何恨。吾兒已長鬣。

翁雖齒長我未見白可鑷。祝翁尙難老。生理歸善攝。久留畏年少。譏我兩咕囁。束火扶路還。宵明狐兔慙。蔡侯雄俊士。心慄形亦謀。異時能飛鞚。快若五陵俠。胡爲阡陌間。踈足僅相躡。諒欲交轡語。怯子不能嚼。

再用前韻寄蔡天啓

蔡侯東方來。取友無所挾。脩脩一囊衣。偶以一書笈。定林朝自炊。有匕或無筴。時時羹藜藿。鑊大苦難變。驕頑遂敢侮。有甚觀駢脅。澹然山谷中。變色未嘗輒。始見類欺魄。寒暄粗酬接。從容與之語。爛漫無不涉。奇經可治疾。祕祝可解魘。巫醫之所知。警史之所業。載車必百兩。獨以方寸攝。微言歸易悟。疾若髡赴鑷。天機信卓越。學等何足躡。縱談及既往。每與唐許協。楊雄尙漢儒。韓愈真秦俠。好大人謂狂。知微乃如諜。惟知造文字。人惑鬼愁慄。秦愚旣改臯。新眊仍易疊。六書遂失指。隸草矜敏捷。誰珍檀山刻。共賞蘭亭帖。東京一祭酒。收拾偶予愜。少嘗妄思索。老懶因退怯。侯方習篆籀。寸管靜嘗壓。深原道德意。助我耕且獵。昔功恐唐捐。異味今得饑。京口媚學子。追師嘗劫劫。陸羸淮汴糧。水儼湖海牒。遠求而近遺。如目不見睫。僞鳳易悅楚。真龍反驚葉。聞予再三歎。往往心不厭。或自逸而走。或吐而不嚼。或嚙元郎漫。或訛白翁囁。鑊金徒欲消。韞玉豈愁浥。賢愚有定分。咄汝無喋喋。跨鞍隨我遊。曳屣聯我跼。照泉挹清泚。跋石緣崑嶽。東坡數儵魚。西崦追蛺蝶。翳林窺搏黍。藉草聽批頰。黃尋遠蓮鬚。紅閱鄰杏靨。荏苒光景流。楊園忽無葉。扶痾歸未久。吾見喜寧帖。褰裳告我去。祿仕當隨牒。蕭晨秣款段。歸期得追躡。謂言循東路。覆出西城堞。

行矣忍羈旅。無魚勿彈鋏。天閑久索驥。駿足方騰蹀。長驅勿驕矜。小踈亦勿慄。鵬飛九萬里。勿借風一箠。溟波浩難窮。勉自養鱗鬣。爵祿實天械。功名爲接摺。寧能復與我。搖漾秦淮楫。附書勿辭頻。隔歲期滿篋。鍾山獨歸雨。微冥稻畦夾。岡半黃青疲。農心知水未足。看雲倚木車不停。悲哉作勞亦已久。暮歌如哭難爲聽。而我官閒幸無事。北窗枕簟風泠泠。於時荷花擁翠蓋。細浪颺雪千娉婷。誰能欵眼共此樂。秋港雖淺可揚舲。

獨歸

車載板二首

荒哉我中園。珍果所不產。朝暮惟有鳥。自呼車載板。楚人聞此聲。莫有笑而莞。而我更歌呼。與之相往返。視遇若搏黍。好音而睨睨。壤壤生死夢。久知無所揀。物弊則歸土。吾歸其不晚。歸歟汝隨我。可相蒿里挽。烏有車載板。朝暮嘗一至。世傳鵬似鴉。而此與鴉似。唯能預人死。以此有名字。疑卽賈長沙。當時所遭值。洛陽多少年。擾擾經世意。粗聞方外語。便釋形骸累。吾衰久捐書。放浪無復事。尙自不見我。安知汝爲異。憐汝好毛羽。言音亦清麗。胡爲太多知。不默而見忌。楚人旣憎汝。彈射將汝利。且長隨我遊。吾不汝羹餒。

謝公墩

走馬白下門。投鞭謝公墩。昔人不可見。故物尙或存。問樵樵不知。問牧牧不言。摩挲蒼苔石。點檢屐齒痕。

想此絳長檣。想此倚短轅。想此玩雲月。狼籍盤與罇。井逕亦已沒。漫然禾黍村。摧藏羊曇骨。放浪李白魂。亦已同山丘。緬懷蒔蘭蓀。小草戲陳迹。甘棠詠遺恩。萬事付鬼籙。耻榮何足論。天機自開闔。人理孰畔援。公色無懼喜。儻知禍福根。涕淚對桓伊。暮年無乃昏。

明妃曲二首

明妃初出漢宮時。淚溼春風鬢脚垂。低徊顧影無顏色。尙得君王不自持。歸來卻怪丹青手。入眼平生幾曾有。意態由來畫不成。當時枉殺毛延壽。一去心知更不歸。可憐着盡漢宮衣。寄聲欲問塞南事。只有年年鴻雁飛。家人萬里傳消息。好在氈城莫相憶。君不見。咫尺長門閉阿嬌。人生失意無南北。

明妃初嫁與胡兒。氈車百兩皆胡姬。含情欲說獨無處。傳與琵琶心自知。黃金桿撥春風手。彈看飛鴻勸胡酒。漢宮侍女暗垂淚。沙上行人卻回首。漢恩自淺胡自深。人生樂在相知心。可憐青塚已蕪沒。尙有哀絃留至今。

食黍行

周公兄弟相殺戮。李斯父子夷三族。富貴常多患禍嬰。貧賤亦復難爲情。身隨衣食南與北。至親安能常在側。謂言黍熟同一炊。欸見隴上黃離離。遊人中道忽不返。從此食黍還心悲。

送春

武陵山下朝買船。風吹宿霧山花鮮。萬家笑語橫青天。綺窗羅幕舞嬋娟。小鬟折花叩船舷。玉璫寫酒贖金錢。朱甍飛動浮雲巘。天外箎簫來宛轉。斷橋人行夕陽路。樓觀瑤璃影中見。酡顏未分驂騑催。燭入坐客猶徘徊。豈知閶闔門邊住。春盡不見芳菲開。日月紛紛車走坂。少年意氣何由挽。洞庭浪與天地白。塵昏萬里東浮眼。黑貂裘敝歸幾時。相見綠樹啼黃鸝。榮華俯仰憂患隨。命駕吾與高人期。

酬王伯虎

吾聞人之初。好惡尙無朕。帝與鑿耳目。賢愚遂殊品。爾來百千年。轉化薄愈甚。父翁相販賣。浮詐誰能審。睢盱猴纓冠。狼籍鼠穴寢。滄海恐值到。誰論魚鼈淦。鴞聲雖云惡。革去在食甚。嗟誰職教化。獨使此風稔。恬觀不知救。坐費太官廩。予生少而戇。好古乃天稟。念此俗衰壞。何嘗敢安枕。有時不能平。悲吒失食飲。唯子同我病。亦或涕沾衽。謂予可告語。密以詩來諗。爛然辭滿紙。秋水濯新錦。窮觀何拳拳。靜念復凜凜。賤貧欲救世。無寧猶拾瀋。說窮且版築。尹屈唯烹飪。逢時豈遽廢。避俗聊須噤。徂年幸未暮。此意可勤恁。

送潮州呂使君

韓君揭陽居。戚嗟與死鄰。呂使揭陽去。笑談面生春。當復進趙子。詩書相討論。不必移鱷魚。詭怪以疑民。有若大顛者。高材能動人。亦勿與爲禮。聽之汨彝倫。同朝絃朋友。異姓接婚姻。恩義乃獨厚。懷哉余所陳。

和吳沖卿雪

陽回力猶遭。陰合勢方鞏。填空忽汗漫。造物誰懲慝。輕於擘絮紛。細若吹毛毳。雲連晝已替。風助宵仍洶。憑陵雖一時。變態亦千種。簾深卷或避。戶隘關猶擁。滔天有凍浪。匝地無荒隴。飛揚類挾富。委翳等辭寵。穿幽偶相重。值儉輒孤聳。積慘會將舒。羣輕那久重。紛華始滿眼。消釋不旋踵。槁樹散飛花。空簷落縣鍾。還當困炎熱。以此滌煩壅。共約市南人。收藏不爲冗。

和沖卿雪詩并示持國

地卷江海浮。天吹河漢湧。北風散作花。巧麗世無種。靈昏得照曜。塵滓歸掩擁。荒林無空枝。幽瓦有高隴。分纔一毛細。聚或千鈞重。飛颺窺已眩。摧壓聽還兇。漁舟平繫舫。樵屨沒歸踵。空令物象瑩。豈免川塗壅。爭光姁娥妒。失色羲和恐。賴逢陽氣蒸。轉作水波溶。舞庭稱賀嚴。掃路傳呼寵。衝遊謝壯少。避臥甘閑冗。吳侯絕俗唱。韓子當敵勇。勝負觀兩豪。吾衰但陰拱。

北客置酒

紫衣操鼎置客前。巾韞稻飯隨梁饘。引刀取肉割啖客。銀盤擘臠羹與鮮。殷勤勸侑邀一飽。卷牲歸館觴更傳。山蔬野果雜飴蜜。獐脯豕腊加魚煎。酒酣衆史稍欲起。小胡捧耳爭留連。爲胡止飲且少安。一杯相屬非偶然。

奉使道中寄育王山長老常坦

道人少賈海上游。海舶破散身沈浮。抱金滿篋人所寄。吹簫偶得還中州。羸身歸金不受報。祇取斗酒相獻酬。歡娛慈母終一世。脫棄妻子藏巖幽。蒼煙寥寥池水漫。白玉菡萏吹高秋。夜燃柏子煮山藥。憶此東望無時休。塞垣春枯積雪溜。沙礫盛怒黃雲愁。五更匹馬隨雁起。想見鄧郭花今稠。百年夸奪終一丘。世上滿眼真悠悠。寄聲萬里心綢繆。莫道異趣無相求。

送李屯田守桂陽

泊船香爐峯。始與子相識。寄書邗江上。詒我峰下石。緣以湘水竹。攜持與南北。永懷故人歡。不願百金易。竹枯歸樵蘇。石爛棄沙礫。夷門得邂逅。綠髮皆半白。追思少時事。俛仰如一夕。老矣無所爲。空知念疇昔。常思一杯酒。要子相解釋。出門事紛紛。歸臥意還亂。聞當上溢水。持詔守嶺阨。方爲萬里別。執手先慘戚。茲游信浩蕩。山水多所得。爲我謝香爐。風塵每相憶。

送程公闢守洪州

畫船插幟搖秋光。鳴鐃傳鼓水洋洋。豫章太守吳郡郎。行指斗牛先過鄉。鄉人出郭航酒漿。魚鼈鱸魚炊稻梁。芡頭肥大菱腰長。醕醢喧呼坐滿床。怪君三年滯瞿塘。又驅傳馬登大行。纓旄脫盡歸大梁。翻然出走天南疆。九江左投貢與章。揚瀾吹漂浩無旁。老蛟戲水風助狂。盤渦忽坼千丈強。君聞此語悲慨慷。迎吏乃前持一觴。鄱州歷選多雋良。鎮撫時有諸侯王。拂天高閣朱鳥翔。西山蟠繞鱗鬣蒼。下視城塹真金

湯雄樓傑屋鬱相望。中戶尙有千金藏。漂田種秫出穰穰。沉檀珠犀雜萬商。大舟如山起牙檣。一本無此句輸瀉交廣流荆揚。輕裙利屣列名倡。春風蹋謠能斷腸。平湖灣塢煙渺茫。樹石珍怪花草香。幽處往往聞笙簧。地靈人秀古所臧。勝兵可使酒可嘗。十州將吏隨低昂。談笑指麾回雨暘。非君才高力方剛。豈能跨有此一方。無爲聽客欲霑裳。使君謝吏趣治裝。我行樂矣未渠央。

東門

東門白下亭。摧甃蔓寒葩。淺沙棧素舸。一水宛秋蛇。漁商數十室。門巷隱桑麻。翰林謫仙人。往歲酒姥家。調笑此水上。能歌楊白花。楊花飛白雪。枝裏綠煙斜。舞袖卷煙雪。綺裘明紫霞。風流翳蓬顆。故地使人嗟。迢迢陌頭青。空復可藏鴟。

和王微之登高齋三首

寒雲沈屯白日埋。河漢蕩圻天如籬。衡門兼旬限泥潦。臥聽窾木鳴相挨。蕭辰忽掃纖翳盡。北嶺初出青崑崙。微之新詩動我目。爛若火齊金盤堆。想攜諸彥眺平野。高論歷詆秦以來。觥船淋漓始快意。忽憶歸雲胡爲哉。念君少壯輟游衍。發揮春秋名玉杯。書成不得斷國論。但此空語傳八垓。登臨興罷因感觸。更欲遠引追宗雷。君知富貴亦何有。諂譽未足償譏排。風豪雨橫費調燮。坐使髮背爲黃台。留賓往往夜參半。雖有罇俎無由開。江南佳麗非一日。況乃故園名池臺。能招過客飲文字。山水又足供歡咍。剩留官屋

貯酒母。取醉不竭。當如淮。

六朝人物隨煙埃。金與玉几安在哉。鍾山石城已寂寞。祇見江水雲端來。百年故老有存者。尙憶世宗初。伐淮。魏王兵馬接踵出。旗纛千里相搪挨。當時謀臣非不衆。上國拔取多陪臺。龍騰九天跨四海。一水欲阻爲可哈。降王北歸樓殿圯。棄屋尙鎖殘金堆。神靈變化自真主。將帥何力求公台。山川清明草木靜。天地不復屯雲雷。使君登高訪古昔。傷此陳迹聊持杯。因留嘉客坐披寫。鄙淥笑語傾如籩。酒酣重惜功業晚。老矣萬卷徒兼該。攢峰列壑動歸興。憂端落筆何崔嵬。餘年無歡易感激。亦愧莊叟能安排。青燈明滅照不寐。但把君詩闔且開。

干戈六代戰血埋。雙闕尙指山崔嵬。當時君臣但兒戲。把酒空勸長星杯。臨春美女閉黃壤。玉枝自一作蕊繁如堆。後庭新聲散樵牧。興廢倏忽何其哀。咸陽龍移九州圯。遺種變化呼風雷。蕭條中原碣無水。岬強又此憑江淮。廣陵衣冠掃地去。穿築隴畝爲池臺。吳儂傾家助經始。尺土不借秦人篋。珠犀磊落萬艘入。金壁照耀千門開。建隆天飛跨兩海。南發交廣東温台。中間築業地無幾。欲久割據誠難哉。靈旗指麾盡貔虎。談笑力可南山排。樓船蔽川莫敢動。扶伏但有謀臣來。百年滄洲自潮汐。事往不與波爭迴。黃雲荒城失苑路。白草廢時空壇垓。使君新篇韻險絕。登眺感悼隨嘲哈。嗟予愁懣氣已竭。對壘每欲相劇挨。揮毫更想能一戰。數窘乃見詩人才。

書任村馬鋪

兒童繫馬黃河曲。近岸河流如可掬。任村炊米朝食魚。日暮滎陽驛中宿。投老經過身獨在。當時洲渚今平陸。秣黍冥冥十數家。仰視荒蹊但喬木。冰盤羹美客自知。起看白水還東馳。爾來百口皆年少。歸與何人共此悲。

葛蘊作巫山高愛其飄逸因亦作一篇

巫山高。偃薄江水之滔滔。水於天下實至險。山亦起伏爲波濤。其巔冥冥不可見。崖岸斗絕悲猿猱。赤楓青櫟生滿谷。山鬼白日樵人遭。窈窕陽臺彼神女。朝朝暮暮能雲雨。以雲爲衣月爲褚。乘光服暗無留阻。崑崙曾城道可取。方丈蓬萊多伴侶。塊獨守此嗟何求。況乃低徊夢中語。

和王勝之雪霽借馬入省

泥水填馬不受轍。瓦雪得火猶藏溝。宿霧紛紛度城闕。朔氣凜凜吹衣裘。窮閭閉門無一客。剝啄驚我有前騶。強隨傳呼出屋去。鼻息凍合髭繆繆。投韁馬鬣任欹側。欲出操筆手還抽。行思江南悲故事。溪谷冬暖花常流。前年臘歸三見白。霽色嶺上班班留。杖藜此時將邑子。登眺置酒身優游。豈如都城今日事。祇恐一蹶爲親憂。因知田里駕款段。昔人豈卽非良謀。君家洛陽名實大。談笑枯槁回春柔。平生意氣故應在。白髮未敢相尋求。從容退食想佳節。豈無歌聲相獻酬。奈何亦作苦寒調。歎息朝夕無驍騶。超然遂有

江湖意滿紙爲我書窮愁。相如正應居客右。子路且莫乘桴浮。

和吳沖卿鷓鴣鳴樹石屏

寒林昏鷓相與還。下有跂石蒼孱顏。曾於古圖見髣髴。已怪刀筆非人間。君家石屏誰爲寫。古圖所傳無似者。鷓飛歷亂止且鳴。林葉慘慘風煙生。高齋日午坐中見。意似落日空上行。君詩雄盛付君手。云此非人乃天巧。嗟哉渾沌死。乾坤至造作萬物醜妍巨細各有理。問此誰主何其精。恢奇譎詭多可喜。人於其間。乃復雕鑿刻畫出智力。欲與造化追相傾。拙者婆娑尙欲奮。工者固已窮夸矜。吾觀鬼神獨與人意異。雖有至巧無所爭。所以號山間。埋沒此寶千萬歲。不爲見者驚。吾又以此知妙偉之作。不在百世後。造始乃與元氣并。畫工粉墨非不好。歲久剝爛空留名。能從太古到今日。獨此不朽由天成。世人尙奇輕貨力。山珍海怪採掇今。欲索此屏後出爲君得。胡賈欲價著不識。吾知金帛不足論。當與君詩兩相直。

送李宣叔倅漳州

關山到漳窮地與南越錯。山川鬱霧毒瘴癘。春冬作荒茅篁竹間。蔽虧有城郭。居人特鮮少。市井宜蕭索。野花開無時。蠻酒持可酌。窮年不用客。誰與分杯杓。朝廷尙賢俊。磊砢充臺閣。君能喜節行。文藝又該博。超然萬里去。識者爲不樂。予聞君子居。自可救民瘼。苟能禦外物。得地無美惡。似聞最南方。北客今勿藥。林麓換風氣。獸虵凋毒蠹。如漳猶近州。氣冷又銷鑠。珍足海物味。其厚不爲薄。章舉馬甲柱。固已輕羊酪。

蕉黃荔子丹。又勝楂梨酢。逢衣比多士。往往在丘壑。從容與笑語。豈不慰寂寞。太守好觴詠。嘉賓應在幕。想卽有新詩。流傳至京洛。

韓持國從富并州辟

韓侯冰玉人。不可塵土雜。官雖衆俊後。名字久訇磕。并州天下望。撫士威愛愜。千金棄不惜。賓客常滿閣。遙聞餘風高。爲子置一榻。親交西門餞。百馬驕雜選。子材宜用世。談者爲鳴喏。矧今名主人。氣力足呵飲。推賢爲時輔。勢若朽易拉。會常薦還朝。立子在闔闔。惜哉秣騏驎。賦以升命合。咨予栖栖者。氣象已摧塌。他年佐方州。說將尙不納。況於聲勢尊。豈易取酬答。有如持寸莛。未足感鞶韞。顧於山水間。意願多所合。匡廬與韶石。少小已嘗蹋。風遊會稽春。雲宿天柱臘。淮湖江海上。慣食蝦蟹蛤。西南窮岷嶓。東北盡濟深。身雖未嘗歷。魂夢已稠沓。荆溪最所愛。映燭多廟塔。溪果點丹漆。溪花團繡罽。扁舟信所過。行不廢樽榼。一從捨之去。霜雪行滿頰。思之不能寐。蹙若蟲蚋嚼。方將築其濱。畢景謝噂嗜。安能孤此意。顛倒就衰颯。唯子余所嚮。嗜好比鷓鴣。何時歸相過。遊履尙可蠟。

寄王逢原

北風吹雲埋九垓。草木零落空池臺。六龍避逃不敢出。地上獨有寒崔嵬。披衣起行愁不愜。歸坐把卷闔且開。永懷古人今已矣。感此近世何爲哉。申韓百家爇火起。孔子大道寒於灰。儒衣紛紛欲滿地。無復風

焰空煤炧。力排異端。誰助我憶見。夫子真奇材。榘栴豫章。槩白日。祇要匠石聊穿裁。我方官拘不得往。子有閒暇宜能來。語言相與入聖處。一取萬古光芒迴。

送裴如晦卽席分題以黯然消魂。惟別而已爲韻。擬而字韻作。

十月款水冰。問君行何爲。行不顧斗米。自與五湖期。平生湖上遊。幽事略能知。此後君最樂。窮年得游嬉。彩鯨抗波濤。風作鱗之而。鳴鼓上洞庭。笑看紅橘垂。漠漠大梁下。黃沙吹酒旗。應憐故人愁。回首一相思。

吳長文新得顏公壞碑

魯公之書既絕倫。歲久更爲時所珍。荒壇壞冢朽崖屋。剝落風雨埋煨塵。斷碑數尺誰所得。點畫入紙完如新。延陵公子好事者。拓取持寄情相親。六書篆籀數變改。訓詁後世多失真。誰初妄鑿妍與醜。坐使學士勞骸筋。堂堂魯公勇且仁。出遇世難親經綸。揮毫卓犖又驚俗。豈亦以此誇常民。但疑技巧有天得。不必勉強方通神。詩歌甘棠美召伯。愛惜蔽芾由思人。時危忠誼常恨少。寶此勿復令埋堙。

悼四明杜醇

杜生四五十。孝友稱鄉里。隱約不外求。耕桑有妻子。藜杖牧雞豚。筠筒釣魴鯉。歲時沾酒歸。亦不乏甘旨。天涯一杯飯。夙昔相逢喜。談辭足詩書。篇詠又清泚。都城問越客。安否常在耳。日月未渠央。如何棄予死。古風久凋零。好學少爲己。悲哉四明山。此士今已矣。

哭梅聖俞

詩行於世。先春秋國風變衰。始柏舟文辭感激多所憂。律呂尙可諧鳴球。先王澤竭士已偷。紛紛作者始可羞。其聲與節急以浮。真人當天施再流。篤生梅公應時求。頌歌文武功業優。經奇緯麗散九州。衆皆少銳老則不翁。獨辛苦不能休。惜無采者人名適。貴人憐公青兩眸。吹噓可使高岑樓。坐令隱約不見收。空能乞錢助饋餽。疑此有物司諸幽。棲棲孔孟葬魯鄒。後始卓犖稱軻丘。聖賢與命相楯矛。勢欲強達誠無由。詩人況又多窮愁。李杜亦不爲公侯。公窺窮阨以身投。坎珂坐老常誰尤。吁嗟豈卽非善謀。虎豹雖死皮終留。飄然載喪下陰溝。粉書軸幅懸無旒。高堂萬里哀白頭。東望使我商聲謳。

別孫莘老

逢原不熟我。已與子相知。自吾得逢原。知子更不疑。把手湖上舟。望子欲歸時。茫然乃分散。獨背東南馳。寥寥西城居。邂逅與子期。雞鳴入省門。朱墨來紛披。含意不自得。強顏聊爾爲。會合常在夜。青燈照書詩。往往並衾語。至明不言疲。忽忽捨我去。使我當從誰。送子不出門。我身方羈縻。我心得自如。今與子相隨。隨子在湖上。逢原所嘗嬉。想見荷葉盡。北風卷寒漪。已懷今日愁。更念昔日悲。相逢亦何有。但有鏡中絲。

示平甫弟

汴渠西受崑崙水。五月奔湍射黃矢。高淮夜入忽倒流。碕岸相看欲生髻。萬檣如山屹不動。嗟我仲子行

亦止。自聞留連且一月。每得問訊猶千里。老工取河天上落。伏礫遭沙卷無底。土橋立馬望城東。數日知有相逢喜。牆隅返照媚槐穀。池面過雨蘇篁葦。欣然把手相與閑。所願此時無一詭。豈無他憂能老我。付與天地從今始。閉門爲謝載酒人。外慕紛紛吾已矣。

送董伯懿歸吉州

我來以喪歸。君至因譎徙。蒼黃憂患中。邂逅遇於此。去年服初除。聽赦相助喜。看君數歸月。但屈兩三指。茫然冬更秋。一笑非願始。監輿楊柳下。明月芙蓉水。僮飢屢闕門。客罷方隱几。是非評衆詩。成敗斷前史。時時對奕石。漫浪爭生死。送迎皆幅巾。設席但陳米。亦曾戲篇章。揮翰疾蒿矢。君豪才有餘。我老憊先止。東城景陽陌。南望長干紫。欲斷三畝蔬。於焉寄殘齒。經過許後日。唱和猶在耳。新恩忽捨我。欣悵生彼已。江湖北風帆。振柁卽千里。相逢知何時。莫惜縑與紙。

明州錢君倚衆樂亭

使君幕府開東部。名高海曲人知慕。艤船談笑政卽成。洗滌山川作嘉趣。平泉浩蕩銀河注。想見明星弄機杼。載沙築成天上路。投虹爲橋取孤嶼。掃除荆棘水中央。碧瓦朱甍隨指顧。春風滿城金版舫。來看置酒新亭上。百女吹笙綵鳳悲。一夫伐鼓靈鼉壯。安期羨門相與遊。方丈蓬萊不更求。酒酣忽跨鯨魚去。陳迹空令此地留。

和平甫舟中望九華山二首

楚越千萬山。雄奇此山兼。盤根雖巨壯。其末乃脩纖。去縣尙百里。側身勇前瞻。蕭條煙嵐上。縹緲浮青尖。徐行稍復逼。所矚亦已添。精神去疊疊。氣象來漸漸。卸席取近岸。移船傍蒼兼。窺觀坐窮晡。未覺晷刻淹。江空萬物息。四面波瀾恬。峩然九女鬢。爭出一鏡匳。臥送秋月沒。起看朝陽暹。游氛蕩無餘。瑣細得盡覘。陵空翠纛直。照影寒銜銛。冢木立紺髮。崖林張紫髯。變態生倏忽。雖神詎能占。當留老吾身。少駐誰云蹙。惜哉秦漢君。黃屋上衡灑。等之事嬉遊。捨此何其廉。我疑二后荒。神物久已厭。埋藏在雲霧。不欲登昏儉。又疑避褒封。蔽匿以爲謙。或是古史書。脫落簡與籤。當時備巡遊。今不在緗縑。終南秦之望。泰山魯所詹。天王與秩祭。俎豆羅醯鹽。苟能澤下民。維此遠亦沾。方今東南旱。土脈燥不黏。尙無膚寸功。豈免竊食嫌。神莽吾難知。士病吾能砭。文章巧傳會。智術工飛箝。薦寶互珪璧。論材自栴榘。苟以飾婦妾。謬云活蒼黔。豈如幽人樂。茲山謝閭閻。穴石作戶牖。垂泉當門簾。尋奇出後徑。覽勝倚前簷。超然往不返。舉世徒咕咕。高興寄日月。千秋伴烏蟾。遐追商洛翁。秦火不能炎。近慕楚穆生。竟脫楚人鉗。吾意竊所尙。人謀諒難僉。誰謂九華遠。吾身未嘗詹。唱篇每起予。予口安能箝。憶在秋浦北。空江上新蟾。光潔寫一鏡。迴環兩堤奩。露坐引衣襖。風行欹帽簷。維舟當此時。巨細得盡瞻。試嘗論大略。次乃述微纖。此山廣以深。包畜萬物兼。噓雲吐霧雨。生育靡不漸。巍然如九皇。德澤四海沾。此山相後先。各出羣峰尖。毅然如九官。羅立在堂廉。

挺身百辟上。附麗無姦儉。此山高且寒。五月不覺炎。草樹萋已綠。冰霜尙涵淹。頽然如九老。白髮連蒼髯。此山當無雲。秀色鬱以添。姹然如九女。靚飾出重簾。珮環與巾裙。紺玉青紈縑。遠之妍西施。近或醜無鹽。變態不可窮。詩者徒咕咕。我初勇一往。役世難安恬。浪荒不走職。民瘼當誰砭。乖離今數旬。夢想欲窺覘。自期得所如何。雷釋囚鉗。念昔太白巔。下視海日暹。竭來天柱遊。屐齒尙苔黏。猶之健飲食。屢饗亦云饜。胡爲慕攀踏。已憊且不嫌。豈其仁智心。山水固所潛。男兒有所學。進退不在占。功名苟不諧。廊廟等閭閻。況乃掄掾棧。其誰辨榘杗。歸歟巖崖居。料理帶與籤。得石坐兀兀。逢泉飲厭厭。取舍斷在獨。豈必詢謀僉。子語實慰我。寧殊邑中黔。玉枝將在山。當倚以葭蒹。詩力我已屈。鋒鏑子猶銛。扶復更一戰。語汝其無謙。

和中甫兄春日有感

雪釋沙輕馬蹄疾。北城可遊今暇日。濺濺溪谷水亂流。漠漠郊原草爭出。嬌梅過雨吹爛熳。幽鳥迎陽語啾啾。分香欲滿錦樹園。剪綵休開寶刀室。胡爲我輩坐自苦。不念茲時去如失。飽聞高逕動車輪。甘臥空堂守經帙。淮蝗蔽天農久餓。越卒圍城盜少逸。至尊深拱罷肅韶。元老相看進刀筆。春風生物尙有意。壯士憂民豈無術。不成歡醉但悲歌。回首功名古難必。

寄曾子回

吾少莫與合。愛我君爲最。君名高山嶽。嶠孽嵩與太。低心收憇友。似不讓塵壒。又如滄江水。不逆溝畎澮。

君身揭日月。遇輒破氣霰。我材特窮空。無用補倉廩。謂宜從君久。垢污得洮汰。人生不可必。所願每顛沛。乖離五年餘。牢落千里外。投身落俗穿。薄宦自鉗鉢。平居每自守。高論從誰巧。搖搖西南心。夢想與君會。思君挾奇璞。願售無良儉。窮閭抱幽憂。凶禍費襁褓。州窮吉士少。誰可培諸妹。仍聞病連月。醫藥誰可賴。家貧奉養狹。誰與通貨貝。詩人刺曹公。賢者荷戈投。奈何遭平時。德澤盛汪濊。鸞鳳鳴且下。萬羽來劇劇。呦呦林間鹿。爭出噬苹蘓。乃令高世士。動輒遭狼狽。人事既難了。天理尤茫昧。聖賢多如此。自古云無奈。周人貴婦女。扁鵲名醫帶。今世無常勢。趨舍唯利害。而君信斯道。不閱身窮泰。弃捐人間樂。濯耳受天籟。諒知安肥甘。未肯顧糠粃。龍螭雖蟠屈。不慕蚺蟬蛻。令人重感奮。意勇忘身叢。何由日親炙。病體同砭艾。功名未云合。歲月尤須惕。懷思切劇効。中夜淚霑霑。君常許過我。早晚治車軌。山溪雖峻惡。高眺發蒙昧。峰巒碧參差。木樹青掩藹。桐江路尤駛。飛槩下鳴瀨。魚村指暮火。酒舍瞻晨旆。清醪足消憂。玉鯽行可膾。行行願無留。日夕佇傾蓋。會將見顏色。不復謀著蔡。延陵古君子。議樂耻言鄣。細事豈足論。故欲論其大。披披發鞬囊。懷懷見戈銳。探深犯嚴壁。破惑翻強膾。離行步荃蘭。偶坐陰松檜。宵牀連衾幃。晝食共麤糲。茲歡何時合。清瘦見衣帶。作詩寄微誠。誠語無綵繪。

有感

憶昔與胡子。戲娛西城幽。放斥僕與馬。獨身步田疇。牛豎歌我旁。聽之爲久留。一接田父語。嘆之勝王侯。

追逐恨不恣。暮歸輒懷愁。顧常輕千乘。祇願足一丘。子時怪我少。好此寂寞遊。笙篴不入耳。又不甘醪羞。那知抱孤傷。罷頓不能遒。世味已鮮少。但餘野心稠。乖離今十年。班髮滿我頭。昔興亦略盡。食眠常百憂。每逢佳山水。欲往輒復休。方壯遂如此。況乃高春秋。

白紵山

白紵衆山頂。江湖所縈帶。浮雲卷晴明。可見九州外。肩輿上寒空。置酒故人會。峰巒張錦繡。草木吹竽籟。登臨信地險。俯仰知天大。留歡薄日晚。起視飛鳥背。殘年苦局束。往事嗟摧壞。歌舞不可求。桓公井空在。

九井得盈字

沿崖涉澗三十里。高下瑩确無人耕。捫蘿挽葛到山趾。仰見吹瀉何崢嶸。餘聲投林欲風雨。末勢卷土猶溪阮。飛蟲凌兢走獸慄。霜雪夏落雷冬鳴。野人往往見神物。鱗甲漠漠雲隨行。我來立久無所得。空數石上菖蒲生。中官繫龍沉玉冊。小吏磔狗澆銀觥。地形偶爾藏險怪。天意未必司陰晴。山川在理有崩竭。丘壑自古相虛盈。誰能保此千世後。天柱不折泉常傾。

書會別亭

西城路居人。送客西歸處。年年借問去何時。今日扁舟從此去。春風吹花落高枝。飛來飛去不自知。路上行人亦如此。應有重來此處時。

張氏靜居院

動者利進爲靜者樂止居。物性有偏得。惟賢時卷舒。張侯始出仕。所至多名譽。老矣歸偃休。買地廩荒蕪。屋成爲令名。名實與時俱。南堂棲幽真。晨起瞻像圖。北堂畫五禽。游戲養形軀。燕有諸賓庭。學有諸子廬。問侯年幾何。矯矯八十餘。問侯何能爾。心不藏憂愉。問侯客何爲。弦歌飲投壺。問侯兒何讀。夏商及唐虞。嵩山填門戶。洛水遶階除。疾於山水間。結駟有通衢。我念老退者。古多賢大夫。留侯亦養生。乃欲凌空虛。閉門不飲酒。豈異山中臞。疎傅稍喜客。揮金能自娛。不聞喜教子。滿屋青紫朱。張侯能兼取。勝事古所無。褒稱有樂石。丞相爲之書。而我不自量。聞風亦歌呼。

禿山

吏役滄海上。瞻山一停舟。怪此禿誰使。鄉人語其由。一狙山上鳴。一狙從之遊。相匹乃生子。子衆孫還稠。山中草木盛。根實始易求。攀挽上極高。屈指亦窮幽。衆狙各豐肥。山乃盡侵牟。攘爭取一飽。豈暇議藏收。大狙尙自苦。小狙亦已愁。稍稍受咋嚙。一毛不得留。狙雖巧過人。不善操耒耨。所嗜在果穀。得之常以偷。嗟此海山中。四顧無所投。生生未云已。歲晚將安謀。

杭州修廣師法喜堂

浮屠之法與世殊。洗滌萬事求空虛。師心以此不挂物。一堂收身自有餘。堂陰置石雙巒嶸。石脚立竹青

扶疎一來已覺肝膽豁。況乃宴坐窮朝晡。憶初救時勇自許。壯大看俗尤崎嶇。豐車肥馬載豪傑。少得志願多憂虞。始知進退各有理。造次未可分賢愚。會將築室返耕釣。相與此處吟江湖。

復至曹娥堰寄剡縣丁元珍

溪水渾渾來自北。千山抱水清相射。山深水急無艇子。欲從故人安可得。故人昔日此水上。罇酒扁舟慰行役。津亭把手坐一笑。我喜滿懷君動色。論新講舊惜未足。落日低徊已催客。離心自醉不復飲。秋果寒花空滿席。今年却坐相逢處。悵悵難求別時迹。可憐溪水自南流。安得溪船問消息。

寄贈胡先生并序

孔孟去世遠矣。信其聖且賢者。質諸書焉耳。翼之先生。與予並世。非若孔孟之遠也。聞薦紳先生所稱述。又詳於書。不待見而後知其人也。歎慕之不足。故作是詩。

先生天下豪傑魁。胸臆廣博天所開。文章事業望孔孟。不復睥睨蔡與崔。十年留滯東南州。飽足藜藿安蒿萊。獨鳴道德驚此民。民之聞者源源來。高冠大帶滿門下。奮如百蟄乘春雷。惡人沮服善者起。昔時躡跡今騫回。先生不試乃能爾。誠令得志如何哉。吾願聖帝營太平。補葺廊廟枝傾頽。披旒發纊廣耳目。照徹山谷多遺材。先收先生作梁柱。以次構架桷與榱。羣臣面向帝深拱。仰戴堂陛方崔嵬。

得曾子固書因寄

始吾居揚日。重問每見及。云將自親側。萬里同講習。子行何舒舒。吾望已汲汲。窮年夢東南。顏色不可挹。仁賢豈欺我。正恐事維繫。嚴親抱憂衰。生理賴以給。不然航江外。天寒北風急。無乃山路惡。僕弱馬行澁。孤懷未肯開。歲物忽如蟄。竭來高郵住。巷屋頗卑濕。蓬蒿稍芟除。茅竹隨補葺。苟云禦風氣。尙恐憂雨汁。故人莫在眼。屢獨開巾笈。忠信蓋未見。吾敢誣茲邑。出關誰與語。念子百髮集。眺聽聊自放。日暮城頭立。徐歸坐當戶。使者操書入。時開識子意。如渴得美涪。驪駒日就道。玉手行可執。舊學待鐫磨。新文得刪拾。重登城頭望。喜氣滿原隰。

憶昨詩示諸外弟

憶昨此地相逢時。春入窮谷多芳菲。短垣困困冠翠嶺。躑躅萬樹紅相圍。幽花媚草錯雜出。黃蜂白蝶參差飛。此時少壯自負恃。意氣與日爭光輝。乘閒弄筆戲春色。脫略不省旁人譏。坐欲持此博軒冕。肯言孔孟猶寒飢。丙子從親走京國。浮塵盆並緇人衣。明年親作建昌吏。四月挽船上磯。端居感慨忽自寤。青天閃爍無停暉。男兒少壯不樹立。挾此窮老將安歸。吟哦圖書謝慶弔。坐室寂寞生伊威。材疎命賤不自揣。欲與稷契遐相希。旻天一朝畀以禍。先子泯沒予誰依。精神不離肝肺絕。背血被面無時唏。母兄呱呱泣相守。三載厭食鍾山薇。屬聞降詔起羣彥。遂自下國趨王畿。刻章琢句獻天子。鈞取薄祿歡庭闈。身著青衫手持版。奔走卒歲官淮沂。淮沂無山四封瘴。獨有廟塔尤峩巍。時時憑高一悵望。想見江南多翠微。

歸心動蕩不可抑。霍若猛吹翻旌旆。騰書漕府私自列。仁者惻隱從其所。暮春三月亂江水。勁櫓健帆如轉機。還家上堂拜祖母。奉手出涕縱橫揮。出門信馬向何許。城郭宛然相識稀。永懷前事不自適。卻指舅館排山扉。當時髻兒戲我側。于今冠佩何頎頎。況復丘樊滿秋色。蜂蝶摧藏花草腓。令人感嗟千萬緒。不忍倉卒回驂騑。留常開樽強自慰。邀子劇飲毋子違。

東臯

起伏晴雲徑。縱橫暖水陂。草長流翠碧。花遠沒黃鸝。楚製從人笑。吳吟得自怡。東臯興不淺。游走及芳時。

歲晚

月映林塘澹。風含笑語涼。俯窺憐淨綠。小立佇幽香。攜幼尋新酌。扶衰坐野航。延緣久未已。歲晚惜流光。

半山春晚卽事

春風取花去。酬我以清陰。翳翳陂路靜。交交園屋深。牀敷每小息。杖屨或幽尋。惟有北山鳥。經過遺好音。

歇眠

翠幙卷東岡。歇眠月半牀。松聲悲永夜。荷氣馥初涼。清話非無寄。幽期故不忘。扁舟亦在眼。終自懶衣裳。

定林

漱甘涼病齒。坐曠息煩襟。因脫水邊屨。就敷巖上衾。但留雲對宿。仍值月相尋。真樂非無寄。悲蟲亦好音。

送張宣義之官越幕

會稽遊宦鄉。海物錯句章。土潤箭萌美。水甘茶串香。今君誠暫屈。他日恐難忘。唯有西興渡。靈胥或怒張。

送鄧監簿南歸

不見驪塘路。茫然四十春。長爲異鄉客。每憶故時人。水閣公三世。雲浮我一身。濠梁送歸處。握手但悲辛。

卽事

徑暖草如積。山晴花更繁。縱橫一川水。高下數家村。靜憩雞鳴午。荒尋犬吠昏。歸來向人說。疑是武陵源。

示耿天隲

挾策能傷性。捐書可盡年。弦歌無舊習。香火有新緣。白土長岡路。朱湖小洞天。望公時顧我。於此暢幽悁。

北山暮歸示道人

千山復萬山。行路有無間。花發蜂遞繞。果垂猿對攀。獨尋寒水度。欲趁夕陽還。天黑月未上。兒童初掩關。

烏塘

地僻居人少。山稠伏獸多。怒狸朝搏鴈。噉虎夜窺騾。籬落生孫竹。門庭上女蘿。未應悲寂寞。六載一經過。

欲歸

水漾青天暖。沙吹白日陰。寒垣春錯莫。行路老侵尋。綠稍還幽草。紅應動故林。留連一杯酒。滿眼欲歸心。

壬辰寒食

客思似楊柳。春風千萬條。更傾寒食淚。欲漲冶城潮。巾髮雪爭出。鏡顏朱早雕。未知軒冕樂。但欲老漁樵。

宿雨

綠攪寒蕪出。紅爭暖樹歸。魚吹塘水動。雁拂塞垣飛。宿雨驚沙盡。晴雲晝漏稀。却愁春夢短。燈火著征衣。

題友人郊居水軒

田中三畝宅。水上一軒開。爲有漁樵樂。非無仕進媒。槎頭收晚釣。荷葉卷新醅。坐說魚腴美。功名挽不來。

江亭晚眺

日下崦嵫外。秋生沆碭間。清江無限好。白鳥不勝閑。雨過雲收嶺。天空月上灣。歸鞍侵調角。回首六朝山。

自白上村入北寺二首

木杪田家出。城陰野逕分。溜渠行碧玉。畦稼臥黃雲。薄槿胭脂染。深荷水麝焚。夕陽人不見。雞鶩自成羣。雨過百泉出。秋聲連衆山。獨尋飛鳥外。時渡亂流間。坐石偶成歇。看雲相與還。會須營一畝。長此聽潺湲。

題朱郎中白都莊

蕭灑桐廬守。滄洲寄一廛。山光隔釣岸。江氣雜炊煙。藜杖聽鳴鶻。籃輿看種田。明時須共理。此興在他年。

次韻冲卿過睢陽

宮廟此神鄉。留親泊楚桴。天開今壯麗。地積古悲涼。不改山河舊。猶餘草木荒。還聞足賓客。誰是漢鄒陽。
崑山慧聚寺次張祐韻

吳江

峰嶺互出沒。江湖相吐吞。園林浮海角。臺殿擁山根。百里見漁艇。萬家藏水村。地偏來客少。幽興祇桑門。
莽莽昔登臨。秋風一散襟。地留孤嶼小。天入五湖深。柑橘無千里。魚蝦有萬金。吾雖輕范蠡。終欲此幽尋。

世事

世事一何稠。論心日已偷。尙蒙今士笑。宜見古人羞。老圃聊須問。良田亦欲求。非關畏黻冕。無責易身修。

寄純甫

塞上無花草。飄風急我歸。稍林聽澗落。卷土看雲飛。想子當紅藥。思家上翠微。江寒亦未已。好好着春衣。

招丁元珍

默默不自得。紛紛何所爲。晝埭聊取食。獵較且隨時。秋入江湖暗。風生草樹悲。黃花一杯酒。思與故人持。

江上二首

潮連風浩蕩。沙引客淹留。落日更清坐。空江無近舟。共看蒹葭宅。聊卽稻梁謀。未敢嗟艱食。凶年半九州。
書自江邊使。鄉隣病餓稠。何言萬里客。更作百身憂。補敗今誰卹。趨生我自羞。西南雙病眼。落日倚扁舟。

暮春

春期行腕晚。春意賸芳菲。曲水應修禊。披香未試衣。雨花紅半墮。煙樹碧相依。悵望夢中地。王孫底不歸。

送鄆州知府宋諫議

盛世千齡合。宗工四海瞻。天心初籲俊。雲翼首離潛。德望完圭角。儀形壯陸廉。徐鳴蒼玉佩。盡校碧牙籤。綸掖清光注。鑾坡茂渥霑。文明誠得主。政瘼尙煩砭。右府參機務。東塗贊景炎。廟謨資石畫。兵略倚珠鈐。坐鎮均勞逸。齋居養智恬。謳謠喧井邑。惠化穆蒼黔。進律朝章舊。疏恩物議僉。通班三殿邃。徙部十城兼。申甫周之翰。龜蒙魯所詹。地靈奎宿照。野沃汶河漸。首路龍旗盛。提封虎節嚴。賜衣纏紫艾。衛甲綴朱綬。海谷移文省。谿堂燕豆添。班春回紺纓。問俗卷彤襜。舟楫商巖命。熊羆渭水占。治裝行入覲。金鼎重調鹽。

歲晚懷古

先生歲晚事田園。魯叟遺書廢討論。問訊桑麻憐已長。按行松菊喜猶存。農人調笑追尋壑。稚子歡呼出候門。遙謝載醪祛惑者。吾今欲辨已忘言。

段氏園亭

欵眠隨水轉東垣。一點炊煙映水昏。漫漫芙蓉難覓路。脩脩楊柳獨知門。青山呈露新如染。白鳥嬉游靜不煩。朱雀航邊今有此。可能搖蕩武陵源。

次韻致遠木人洲

迷子山前漲一洲。木人圖志失編收。年多但有柳生肘。地僻獨無茅蓋頭。河側鮑生乾尙立。江邊屈子稿將投。未妨他日稱居士。能使君疑福可求。

次韻龔龔深甫

握手東岡雪滿簷。後期惆悵老吳蠶。芳辰一笑真難值。暮齒相思豈久堪。他日杜詩傳渭北。幾時周宅對漳南。百年邂逅能多少。且可勤來共草菴。

次韻酬朱昌叔三首

點也自殊由與求。旣成春服更何憂。拙於人合且天合。靜與道謀非食謀。未愛京師傳谷口。但知鄉里勝壺頭。嗟予老矣無一事。復得此君相與游。

去年音問隔淮州。百謫難知亦我憂。前日杯盤共江渚。一歡相屬豈人謀。山蟠直瀆輸淮口。水抱長干轉石頭。乘興舟輿無不可。春風從此與公遊。

烏榜登臨興未休。共言何許更消憂。聯裾蕭寺尋真覺。方駕孫陵弔仲謀。語罷每開歡笑口。詩來仍掉苦吟頭。已知軒冕真吾累。且可追隨馬少游。

次韻送程給事知越州

千騎東方占上頭。如何誤到北山遊。清明若覩蘭亭月。暖熱因忘蕙帳秋。投老始知歡可惜。通宵豫以別爲憂。西歸定有詩千首。想肯重來賁一丘。

次韻酬徐仲元

投老逍遙屺與堂。天刑眞已脫桁楊。緣源靜翳無魚淦。度谷深追有鳥顏。每苦交遊尋五柳。最嫌尸祝擾庚桑。相看不厭唯夫子。風味眞如顧建康。

送程公闢得謝歸姑蘇

東歸行路歎賢哉。碧落新除寵上才。白傅林塘傳畫去。吳王花鳥入詩來。唱酬自有微之在。談笑應容逸少陪。少保元絳謝事居姑蘇。又王中甫善歌詞。與相唱酬燕集。除此兩翁相見外。不知三逕爲誰開。

登寶公塔

倦童疲馬放松門。自把長筇倚石根。江月轉空爲白晝。嶺雲分暝與黃昏。鼠搖岑寂聲隨起。鷗矯荒寒影對翻。當此不知誰客主。道人忘我我忘言。

重登寶公塔復用前韻

空見方墳涌半霄。難將生死問參寥。應身東返知何國。瑞像西歸自本朝。遺寺有門非輦路。故池無鉢但僧瓢。獨龍下視皆陳迹。追數齊梁亦未遙。

紙暖閣

聯屏蓋障一尋方。南設鈎簾北置牀。側座對敷紅絮暖。仰牕分啓碧紗涼。氈廬易以梅烝壞。錦幄終於草野妨。楚穀越籐真自稱。每糊因得減書囊。

小姑

小姑未嫁與蘭支。何恨流傳樂府詩。初學水仙騎赤鯉。竟尋山鬼從文狸。繽紛雲襪空棠檝。綽約煙鬟獨桂旗。弄玉有祠終或往。飛瓊無夢故難知。

呈陳和叔并序

嘉祐末。和叔以集賢校理判登聞鼓院。同知太常禮院。皮場街有園數畝。中置二椽。輒表丈。北戶臨溝。略約通街。旁作小屋。毀輜車爲蓋。某以直集賢院爲三司度支判官。以知制誥糾察在京刑獄。同管勾三班院。問度約飯車蓋下。隨所有無。坐臥輒上。笑語常至夜。如此三歲。而和叔遭太夫人憂。未幾某亦喪親。以去時。永昭陵尙未復土也。後與和叔皆蒙今上拔用。數會議。語皆憂傷之餘。責厚事叢。無復故情。元豐元年。某食觀使祿居鍾山南。和叔經略廣東。道舊悵然。某作詩以敘其事。

毀車爲屋僅容身。三歲相要薄主人。晝寓椽輒常至夜。冬泐溝約復尋春。南陔不泊公歸里。蒼墓垂成我喪親。後會縱多無此樂。山林投老一傷神。

全椒張公有詩在北山西庵僧者漫之悵然有感

十年悵悵躡山阡。終欲持杯滴到泉。東路角巾非故約。西州華屋漫修椽。幽明永隔休炊黍。眞俗相妨久絕弦。遺墨每看疑邂逅。復隨人事散如煙。

讀眉山集次韻雪詩二首

若木昏昏未有鷓。凍雷深閉阿香車。搏雲忽散徒爲屑。翦水如分綴作花。擁帚尙憐南北巷。持杯能喜兩三家。戲按弄榭輸兒女。羔袖龍鍾手獨叉。戲搖微縞女鬢鴟。試咀流酥已頰車。歷亂稍埋冰揉粟。消沉時點水圓花。豈能舴艋眞尋我。且與蝸牛獨臥家。欲挑青腰還不敢。直須詩膽付劉叉。

次韻奉和蔡樞密南京種山藥法

蔡詩井序云。蒙見索南都種山藥法。井以生頭數十莖送上。輒成小詩。青青正是中分天。區種何妨試玉延。

潤。即見引須綠夏木。定知如躡薦冬筵。俗傳種時以足按之。即如人足。區種何妨試玉延。潤。還御水冰霜結。蔭近幾雲雨露偏。自裹自題還自媿。振苗應笑宋人然。

區種拋來六七年。春風條蔓想宛延。難追老圃莓苔徑。空對珍盤玳瑁筵。嘉種忽傳河右壤。靈苗更長闕西偏。故畦穿斲知何日。南望鍾山一慨然。

上已聞苑中樂聲書事

苑中誰得從春游。想見漸臺瓦欲流。御水曲隨花影轉。宮雲低繞樂聲留。年華未破清明節。日暮初回祓

覆舟更覺至尊思慮遠。不應全爲拙倡優。

用樂道舍人韻書十日事呈樂道舍人聖從待制

東門人物亂如麻。想見新羈照路華。午鼓已傳三刻漏。從官初賜一杯茶。忽忽殿下催分首。擾擾宮前聽賣花。歸去莫言天上事。但知呼客飲流霞。

詳定試卷

童子常誇作賦工。暮年羞悔有楊雄。當時賜帛倡優等。今日論才將相中。細甚客卿因筆墨。卑於爾雅注魚蟲。漢家故事真當改。新詠知君勝弱翁。

奉酬楊樂道

邂逅聯裾殿閣春。卻愁容易卽離羣。相知不必因相識。所得如今過所聞。近代聲名出盧駱。前朝筆墨數淵雲。與公家世由來事。愧我初無百一分。

送李質夫之陝府

平世求才漫至公。悠悠羈旅士多窮。十年見子尙短褐。千里隨人今北風。戶外屨貧虛自滿。樽中酒賤亦常空。共嫌欲老無機械。心事還能與我同。

次韻吳季野題岳上人澄心亭

高亭五月尙寒生。回首塵沙自鬱蒸。砌水亂流穿石底。檻雲高出蔽山層。躋攀欲絕人間世。締搆知從物外僧。腸胃坐來清似洗。神奇未怪佛圖澄。

送彥珍

挾筴窮鄉滿鬢絲。陂田荒盡豈嘗窺。未應谷口終身隱。正合菑川舉國推。握手百憂空往事。還家一笑卽芳時。柘岡定有辛夷發。亦見東風使我知。

寄張先郎中

留連山水住多時。年比馮唐未覺衰。篝火尙能書細字。郵笳還肯寄新詩。胡牀月下知誰對。蠻榼花前想自隨。投老主恩聊欲報。每瞻高躅恨歸遲。

寄黃吉甫

朱顏去似朔風驚。白髮多於野草生。挾筴讀書空有得。求田問舍轉無成。解鞍烏石岡邊坐。攜手辛夷樹下行。今日追思眞樂事。黃塵深處走鷄鳴。

卽席次韻微之泛舟

畫舸幽尋北果園。應將陳迹問桑門。地隨牆壁行多曲。天著岡巒望易昏。故國時平空有木。荒城人少半爲村。悠悠興廢皆如此。賴付乾愁酒一樽。

示長安君

少年離別意非輕。老去相逢亦愴情。草草杯盤供笑語。昏昏燈火話平生。自憐湖海三年隔。又作塵沙萬里行。欲問後期何日是。寄書應見雁南征。

次韻微之卽席

釀成吳米野油囊。卻愛清談氣味長。閑日有僧來北阜。平時無盜出南塘。風亭對竹酬孤峭。雪逕尋梅認暗香。江水中灑應未變。一杯終欲就君嘗。

思王逢原三首

布衣阡陌動成羣。卓犖高才獨見君。杞梓豫章蟠絕壑。騏驎騷跨浮雲。行藏已許終身共。生死那知半路分。便恐世間無妙質。鼻端從此罷揮斤。

蓬蒿今日想紛披。冢上秋風又一吹。妙質不爲平世得。微言唯有故人知。廬山南墮當書案。滙水東來入酒卮。陳迹可憐隨手盡。欲歡無復似當時。

百年相望濟時功。歲路何知向此窮。鷹隼奮飛凰羽短。騏驎埋沒馬羣空。中郎舊業無兒付。康子高才有婦同。想見江南原上墓。樹枝零落紙錢風。

季春上旬苑中卽事

輦路行看斗柄東。簾垂殿閣轉春風。樹林隱翳燈含霧。河漢欹斜月墜空。新蕊漫知紅簌簌。舊山常夢直叢叢。賞心樂事須年少。老去應無日再中。

與微之同賦梅花得香字三首

漢宮嬌額半塗黃。粉色凌寒透薄妝。好借月魂來映燭。恐隨春夢去飛揚。風亭把盞酬孤豔。雪徑回輿認暗香。不爲調羹應結子。直須留此占年芳。

結子非貪鼎鼐嘗。偶先紅杏占年芳。從教臘雪埋藏得。卻怕春風漏洩香。不御鉛華知國色。祇裁雲縷想仙裝。少陵爲爾牽詩興。可是無心賦海棠。

淺淺池塘短短牆。年年爲爾惜流芳。向人自有無言意。傾國天教抵死香。鬢疊黃金危欲墮。蒂圍紅蠟巧能裝。嬋娟一種如冰雪。依倚春風笑野棠。

度磨嶺寄莘老

區區隨傳換冬春。夜半懸崖託此身。豈慕王遵能許國。直緣毛義欲私親。施爲已壞生平學。夢想猶歸寂寞濱。風月一歌勞者事。能明吾意可無人。

送遜師歸舒州

山川相對一悲翁。往事紛紛夢寐中。邂逅故人恩意在。低徊今日笑言同。看吹陌上楊花滿。忽憶巖前蕙

帳空亦見桐鄉諸父老。爲傳衰颯病春風。

次韻酬宋玘二首

洗雨吹風一月春。山紅漫漫綠紛紛。褰裳遠野誰從我。散策空陂忽見君。青眼坐傾新歲酒。白頭追誦少年文。因嗟涉世終無補。久使高材雍上聞。山陂疇昔從吾親。諸父先生各佩紛。零落長年誰語此。遲回故地卻逢君。衣冠偶坐論經術。襤褸當時刺繡文。更怪高材終未遇。有司何日選方聞。

夢張劍州

萬里憐君蜀道歸。相逢似喜語還悲。江淮別業依何處。日月新阡卜幾時。自說曲阿猶未穩。卽尋湓水去猶疑。茫然卻是陳橋夢。昨日春風馬上思。

次韻張唐公馬上

揭節初悲力不任。賜身終愧謬恩臨。病來氣弱歸宜早。偷取官多責恐深。膏澤未施空謗怨。瘡痍猶在豈謳吟。黃昏信馬江城路。欲訪何人話此心。

上元戲呈貢父

車馬紛紛白晝同。萬家燈火暖春風。別開闔闔壺天外。特起蓬萊陸海中。盡取繁華供俠少。祇分牢落與

衰翁不知太乙遊何處。定把青藜獨照公。

和楊樂道見寄

宅帶園林五畝餘。蕭條還似茂陵居。殺青滿架書新繕。生白當牕室久虛。孤學自難窺奧密。重言猶得慰空疎。相思每欲投詩社。只待春蒲葉又書。

次御河寄城北會上諸友

客路花時祇攪心。行逢御水半晴陰。背城野色雲邊盡。隔屋春聲樹外深。香草已堪回步履。午風聊復散衣襟。憶君載酒相追處。紅萼青附定滿林。

寄友人三首

萬里書歸說我愁。知君不忘北城幽。一篇封禪才難學。三畝蓬蒿勢易求。欲與山僧論地券。願爲鄰舍事田疇。應須急作南征計。漠北風沙不可留。

水邊幽樹憶同攀。會約移居向此間。欲語林塘迷舊逕。卻隨車馬入他山。飛花著地容難冶。鳴鳥窺人意轉閑。物色可歌春不返。相思空復慘朱顏。

一別三年至一方。此身漂蕩只殊鄉。看沙更覺蓬萊淺。數日空驚霹靂忙。渺渺水波低赤岸。濛濛雲氣淡扶桑。登臨舊興無多在。但有浮槎意未忘。

寄張諤招張安國金陵法曹

我老願爲臧丈人。君今少壯豈長貧。好須自致青冥上。可且相從寂寞濱。深谷黃鸝驕引子。曲碕翠碧巧藏身。尋幽觸靜還成興。何必區區九陌塵。

欲往淨因寄涇州韓持國

紫荆山下物華新。只與都城共一春。令節想君攜綠酒。故情憐我踏黃塵。泔魚已悔他年事。搏虎方收末路身。欲寄微言書不盡。試尋僧閣望西人。

送別韓虞部

客舍街南初著巾。與君兄弟卽相親。當年豈意兩家子。今日更爲同社人。京洛風塵嗟阻闊。江湖杯酒惜逡巡。歸帆嶺北茫茫水。把手何時寂寞濱。

懷舒州山水呈昌叔

山下飛鳴黃栗留。溪邊飲啄白符鳩。不知此地從君處。亦有他人繼我不。塵土生涯休盪滌。風波時事只飄浮。相看髮禿無歸計。一夢東南卽自羞。

寄袁州曹伯玉使君

宜春城郭繞樓臺。想見登臨把一盃。濕濕嶺雲生竹筩。冥冥江雨熟楊梅。政成定入邦人詠。詩就還隨驛

使來錯莫風沙愁病眼。不知何日爲君開。

再至京口寄漕使曹郎中

漂流曾落此江邊。憶與詩翁賦浩然。

浩然堂名

鄉國去身猶萬里。驛亭分首已三年。北城紅出高枝靚。南浦

青回老樹圓。還似昔時風露好。只疑談笑在君前。

次韻平甫金山會宿寄親友

天末海門橫北固。煙中沙岸似西興。已無船舫猶聞笛。遠有樓臺祇見燈。山月入松金破碎。江風吹水雪崩騰。飄然欲作乘桴計。一到扶桑恨未能。

次韻再遊城西李園

京師花木類多奇。常恨春歸人未歸。車馬喧喧走塵土。園林處處鏤芳菲。殘紅已落香猶在。羈客多傷涕自揮。我亦悠悠無事者。約君聯騎訪郊圻。

予求守江陰未得酬昌叔憶江陰見及之作

黃田港北水如天。萬里風檣看賈船。海外珠犀常入市。人間魚蟹不論錢。高亭笑語如昨日。末路塵沙非少年。強乞一官終未得。祇君同病肯相憐。

奉寄子思以代別

南北蹉跎成兩翁。悲歡邂逅笑言同。全家欲出嶺雲外。匹馬肯尋山雨中。趨府折腰嗟踽踽。聽泉分手惜
怱怱。寄聲但有加飡飯。才業如君豈久窮。

留題微之廨中清輝閣

故人名字在瀛州。邂逅低回向此留。鷗鳥一雙隨坐笑。荷花十丈對冥搜。水涵樽俎清如洗。山染衣巾翠
欲流。宣室應疑鬼神事。知君能復幾來遊。

元珍以詩送綠石硯所謂玉堂新樣者

玉堂新樣世爭傳。況以蠻溪綠石鐫。嗟我長來無異物。愧君持贈有佳篇。久埋瘴霧看猶濕。一取春波洗
更鮮。還與故人袍色似。論心於此亦同堅。

金陵懷古四首

霸祖孤身取二江。子孫多以百城降。豪華盡出成功後。逸樂安知與禍雙。東府舊基留佛刹。後庭餘唱落
船窗。黍離麥秀從來事。且置興亡近酒缸。
天兵南下此橋江。敵國當時指顧降。山水雄豪空復在。君王神武自難雙。留連落日頻回首。想像餘墟獨
倚窗。卻怪夏陽纔一葦。漢家何事費罌缸。

地勢東回萬里江。雲間天闕古來雙。兵纏四海英雄得。聖出中原次第降。山水寂寥埋王氣。風煙蕭颯滿

僧窗廢陵壞冢空。寇劍誰復沾纓。醉一缸。

憶昨天兵下蜀江。將軍談笑士爭降。黃旗已盡年三百。紫氣空收劍一雙。破堞自生新草木。廢宮誰識舊軒窗。不須搔首尋遺事。且倒花前白玉缸。

次韻舍弟遇子固憶少述

時舍弟在臨川

歸計何時就一塵。寒城回首意茫然。野林細錯黃金日。溪岸寬圍碧玉天。飛兔已聞追騷屢。太阿猶恨失龍泉。遙知更憶河濱友。從事能忘我獨賢。

次韻答平甫

高蟬抱殼悲聲切。新鳥爭巢諄語忙。長樹老陰欺夏日。晚花幽豔敵春陽。雲歸山去當簷靜。風過溪來滿坐涼。物物此時皆可賦。悔予千里不相將。

金明池

宜秋西望碧參差。憶看鄉人褰飲時。斜倚水開花有思。緩隨風轉柳如癡。青天白日春常好。綠髮朱顏老自悲。跋馬未堪塵滿眼。夕陽偷理釣魚絲。

葛溪驛

缺月昏昏漏未央。一燈明滅照秋床。病身最覺風露早。歸夢不知山水長。坐感歲時歌慷慨。起看天地色

淒涼。鳴蟬更亂行人耳。正抱疎桐葉半黃。

泛舟青溪入水門登高齋奉呈康叔

簿領紛紛惜此時。起攜佳客散沈迷。十圍但見諸營柳。九曲難尋故國溪。牽埭欲隨流水遠。放船終礙畫橋低。子猷清興何曾盡。想憶高齋更一躋。

九日登東山寄昌叔

城上啼鳥破寂寥。思君何處坐岿峩。應須綠酒釀黃菊。何必紅裙弄紫簫。落木雲連秋水渡。亂山煙入夕陽橋。淵明久負東籬醉。猶分低心事折腰。

寄吳成之

綠髮溪山笑語中。豈知翻手兩成翁。辛夷屋角搏香雪。躑躅岡頭挽醉紅。想見舊山茅徑在。追隨今日板輿空。渭陽車馬嗟何及。榮祿方當與子同。

寄曾子固

斗粟猶慙報禮輕。敢嗟吾道獨難行。脫身負米將求志。戮力乘田豈爲名。高論幾爲衰俗廢。壯懷難值故人傾。荒城回首山川隔。更覺秋風白髮生。

寄王回深甫

少年倏忽不再得。後日歡娛能幾何。顧我面顏衰更早。憐君身世病還多。牕間暗淡月含霧。船底飄飄風送波。一寸古心俱未試。相思中夜起悲歌。

寄闕下諸父兄兼示平甫兄弟

父兄爲學衆人知。小弟文章亦自奇。家勢到今宜有後。士才如此豈無時。久聞陽羨溪山好。頗與淵明性分宜。但願一門皆貴仕。時將車馬過茅茨。

鍾山西庵白蓮亭

山亭新破一方苔。白帝留花滿四隈。野豔輕明非傅粉。秋光清淺不憑材。鄉窮自作幽人伴。歲晚誰爲靜女媒。可笑遠公池上客。卻因松菊賦歸來。

次韻舍弟賞心亭卽事

檻折簷傾野水傍。臺城佳氣已消亡。難披梗莽尋千古。獨倚青冥望八荒。坐覺塵沙昏遠眼。忽看風雨破驕陽。扁舟此日東南興。欲盡江流萬里長。

送張仲容赴杭州孫公辟

萬屋相誇漆與丹。笑歌長在綺紈間。綵船春戲城邊水。畫燭秋尋寺外山。憶我屢隨遊客入。喜君今赴辟書還。遙知曼倩威行久。赤筆應從到日閑。

次韻春日卽事

人間尙有薄寒侵。和氣先薰草樹心。丹白自分齊破蕾。青黃相向欲交陰。潺潺嫩水生幽谷。漠漠輕煙動遠林。病得一官隨太守。班春無助愧周任。

江上

村落家家有濁醪。青旗招客解祗裯。春風似補林塘破。野水遙連草樹高。寄食舟車隨處弊。行歌天地此身勞。遲回自負平生意。豈是明時惜一毛。

午枕

百年春夢去悠悠。不復吹簫向此留。野草自花還自落。鳴禽相乳亦相酬。舊蹊埋沒開新徑。朱戶欹斜見畫樓。欲把一盃無伴侶。眼看興廢使人愁。

寄石鼓寺陳伯庸

鯨海無風白日閑。天門當面險難攀。塵埃掉臂離長陌。琴酒和雲入舊山。仁義未饒軒冕貴。功名莫信鬼神慳。郭東一點英雄氣。時伴君心夜斗間。

姑胥郭

誤褫雲巾別故山。抵吳由越兩間關。千家漁火秋風市。一葉歸舟暮雨灣。旅病恹恹如困酒。鄉愁脉脉似

連環情知帶眼從前緩。更恐顛毛自此斑。

太湖恬亭

檻臨溪上綠陰圍。溪岸高低入翠微。日落斷橋人獨立。水涵幽樹鳥相依。清遊始覺心無累。靜處誰知世有機。更待夜深同徙倚。秋風斜月釣船歸。

次韻酬吳彥珍見寄

時彥珍爲教授。有右軍墨池。

君作新詩故起予。一吟聊復報雙魚。杖藜高徑誰來往。散帙空堂自卷舒。樹外鳥啼催晚種。花間人語趁朝墟。春風處處堪攜手。何事臨池苦學書。

自金陵如丹陽道中有感

數百年來王氣消。難將前事問漁樵。苑方秦地皆蕪沒。山借揚州更寂寥。荒埭暗雞催月曉。空場老雉挾春驕。豪華祇有諸陵在。往往黃金出市朝。

讀詔書

慶曆七年。

去秋東出汴河梁。已見中州旱勢強。日射地穿千里赤。風吹沙度滿城黃。近聞急詔收羣策。頗說新年又亢陽。賤術縱工難自獻。心憂天下獨君王。

除夜寄舍弟

一尊聊有天涯憶。百感翻然醉裏眠。酒醒燈前猶是客。夢回江北已經年。佳時流落真何得。勝事蹉跎只可憐。唯有到家寒食在。春風同泛瀕溪船。

送王補之行風忽作因題四句於舟中

淮口西風急。君行定幾時。故應今夜月。未便照相思。

離蔣山

出谷頻回首。逢人更斷腸。桐鄉豈愛我。我自愛桐鄉。

江上

江水漾西風。江花脫晚紅。離情被橫笛。吹過亂山東。

秣陵道中口占二首

經世才難就。田園路欲迷。慙慙將白髮。下馬照青溪。歲熟田家樂。秋風客自悲。茫茫曲城路。歸馬日斜時。

雜詠二首

證聖南朝寺。三年到百回。不知牆下路。今日幾荷開。桃李石城塢。餉田三月時。柴荆常自閉。花發少人知。

梅花

牆角數枝梅。凌寒獨自開。遙知不是雪。爲有暗香來。

歌元豐

豚糲雞疇。掩靄間。暮林搖落。獻南山。豐年處處人家好。隨意飄然得往還。

九日

九日無歡可得追。飄然隨意歷山陂。蔣陵西曲一作面風塵慘澹一作澹也有黃花一兩枝。

初晴

幅巾慵整露蒼華。度隴深尋一徑斜。小雨初晴好天氣。晚花殘照野人家。

翛然

翛然三月閉柴荆。綠葉陰陰忽滿城。自是老年遊興少。春風何處不堪行。

竹裏

竹裏編茅倚石根。竹莖疎處見前村。閑眠盡日無人到。自有春風爲掃門。

隨意

隨意柴荆手自開。沿岡度壑復登臺。小橋風露扁舟月。迷鳥羈雌竟往來。

初夏卽事

石梁茅屋有彎碕，流水濺濺度兩陂。晴日暖風生麥氣，綠陰幽草勝花時。

光宅寺

梁武帝宅也。其北齊安。隔淮齊武帝宅也。宋興又在其北。

齊安孤起宋興前，光宅相仍一水邊。蜂分蟻爭今不見，故窠遺塚尙依然。

與寶覺宿龍華院絕句

舊有詩云。京口瓜州一水間。鍾山只隔數重山。春風自綠江南岸。明月何時照我還。

世間投老斷攀緣，忽憶東遊已十年。但有當時京口月，與公隨我故依然。

自定林過西庵

午鷄聲不到禪林，栢子烟中靜擁衾。忽憶西巖道人語，杖藜乘興得幽尋。

謝安墩

我名公字偶相同，我屋公墩在眼中。公去我來墩屬我，不應墩姓尙隨公。

山陂

山陂院落今按種，城郭樓臺已放燈。白髮逢春唯有睡，睡聞啼鳥亦生憎。

北山有懷

香火因緣寄北山，主恩投老更人間。傷心躑躅岡頭路，明月春風自往還。

北陂杏花

一陂春水遶花身。花影妖嬈各占春。縱被春風吹作雪。絕勝南陌碾成塵。

江梅

江南歲盡多風雪。也有江梅漏洩春。顏色凌寒終慘澹。不應搖落始愁人。

北山

北山輸綠漲橫陂。直塹回塘澗澗時。細數落花因坐久。緩尋芳草得歸遲。

楊柳

楊柳杏花何處好。石梁茅屋雨初乾。綠垂靜路要深駐。紅寫清波得細看。

出郊

川原一片綠交加。深樹冥冥不見花。風日有情無處著。初迴光景到桑麻。

呈陳和叔

數椽生草覆莓苔。一作數椽牢落長莓苔。一徑牆陰斷雪開。玉匣囊衣新徙舍。杖藜從此爲君來。數椽庫屋茨生草。三畝荒園種晚蔬。永日終無一杯酒。可能留得故人車。

與耿天騫會話

邯鄲四十餘年夢。相對黃梁欲熟時。萬事祇如空鳥迹。怪君強記尙能追。
庚申正月遊齊安

水南水北重重柳。山後山前處處梅。未卽此身隨物化。年年長趁此時來。
庚申正月遊齊安。有詩云。水南水北重重柳。壬戌正月再遊。

招提詩壁漫黃埃。忽忽籠紗兩過梅。老值白雞能不死。復隨春色破寒來。

壬戌正月晦與仲元自淮上復至齊安

風暖柴荆處處開。雪乾沙淨水洄洄。意行卻得前年路。看盡梅花看竹來。

悟真院

野水從橫漱屋除。午牕殘夢鳥相呼。春風日日吹香草。山北山南路欲無。

鍾山晚步

小雨輕風落棟花。細紅如雪點平沙。權籬竹屋江村路。時見宜城賣酒家。

勘會賀蘭溪主

賀蘭溪洛京地名。陳繹買地築居。於郵中間之。

賀蘭溪上幾株松。南北東西有幾峯。買得住來今幾日。尋常誰與坐從容。

書湖陰先生壁

茆簷長掃靜無苔。花木成畦手自栽。一水護田將綠繞。兩山排闥送青來。

書何氏宅壁

有興提魚就公煮。此言雖在已三年。皖瀟終負幽人約。空對湖山坐惘然。

示公佐

殘生傷性老耽書。年少東來復起予。各據槁梧同不寐。偶然聞雨落塔除。

送黃吉父將赴南康官歸金谿二首

柘岡西路白雲深。想子東歸得重尋。亦見舊時紅躑躅。爲言春至每傷心。還家一笑卽芳辰。好與名山作主人。邂逅五湖乘興往。相邀錦繡谷中春。

金陵卽事三首

水際柴門一半開。小橋分路入青苔。背人照影無窮柳。隔屋吹香併是梅。結綺臨春歌舞地。荒蹊狹巷兩三家。東風漫漫吹桃李。非復當時仗外花。昏黑投林曉更驚。背人相喚百般鳴。柴門長閉春風暖。事外還能見鳥情。

烏塘

烏塘渺渺綠平隄。隄上行人各有攜。試問春風何處好。辛夷如雪柘岡西。

柘岡

萬事紛紛祇偶然。老來容易得新年。柘岡西路花如雪。迴首春風最可憐。

金陵

金陵陳迹老莓苔。南北遊人自往來。最憶春風石城塢。家家桃杏過牆開。

午枕

午枕花前簟欲流。日催紅影上簾鉤。窺人鳥喚悠颺夢。隔水山供宛轉愁。

州橋

州橋蹋月想山椒。迴首哀湍未覺遙。今夜重聞舊嗚咽。卻看山月話州橋。

觀明州圖

明州城郭畫中傳。尙記西亭一橫船。投老心情非復昔。當時山水故依然。

和張仲通憶鍾陵二首

一夢章江已十年。故人重見想幡然。祇應兩岸當時柳。能到春來尙可憐。

逸少池邊有一丘。西山南浦慣曾遊。殘年歸去終無樂。聞說章江卽淚流。

鍾山卽事

澗水無聲繞竹流。竹西花草弄春柔。茅簷相對坐終日。一鳥不鳴山更幽。

隴東西二首

隴東流水向東流。不肯相隨過隴頭。祇有月明西海上。伴人征戍替人愁。
隴西流水向西流。自古相傳到此愁。添卻征人無限淚。怪來嗚咽已千秋。

重將

重將白髮旁牆陰。陳迹茫然不可尋。花鳥總知春爛熳。人間獨自有傷心。

楚天

楚天如夢水悠悠。花底殘紅漫不收。獨遶去年揮淚處。還將牢落對滄州。

送和甫至龍安微雨因寄吳氏女子

荒煙涼雨助人悲。淚染衣巾不自知。除卻春風沙際綠。一如看汝過江時。

與北山道人

詩果疏泉帶淺山。柴門雖設要常關。別開小徑連松路。祇與鄰僧約往還。

江寧夾口

落帆江口月黃昏。小店無燈欲閉門。側出岸沙楓半死。繫船應有去年痕。

夜直

金爐香燼漏聲殘。翦翦輕風陣陣寒。春色惱人眠不得。月移花影上欄干。

金陵報恩大師西堂方丈

蕭蕭出屋千竿玉。靄靄當牕一炷雲。心力長年人事外。種花移石尙慇懃。

獨臥

茆簷午影轉悠悠。門閉青苔水亂流。百疇黃鸝看不見。海棠無數出牆頭。

孟子

沉魄浮魂不可招。遺編一讀想風標。何妨舉世嫌迂闊。故有斯人慰寂寥。

臘享

明星慘澹月參差。萬竅含風各自悲。人散廟門燈火盡。卻尋殘夢獨多時。

杏花

垂楊一徑紫苔封。人語蕭蕭院落中。獨有杏花如喚客。倚牆斜日數枝紅。

泊姚江

山如碧浪翻江去。水似青天照眼明。喚取仙人來住此。莫教辛苦上層城。

遊鍾山

兩山松櫟暗朱藤。一水中間勝武陵。午梵隔雲知有寺。夕陽歸去不逢僧。
杭州望湖樓回馬上作呈玉汝樂道

水光山氣碧浮浮。落日將歸又少留。從此祇應長入夢。夢中還與故人遊。

春日席上

十年流落負歸期。臨水登山各有思。今日樽前千萬恨。不堪頻唱鷓鴣辭。

戲贈育王盧白長老

白雲山頂病禪師。昔日公卿各贈詩。行盡四方年八十。卻歸荒寺有誰知。

無錫寄正之

健席高牆送病身。亂山荒隴障歸津。應須一曲千回首。西去論心更幾人。

初晴

一抹明霞黯淡紅。瓦溝已見雪花融。前山未放曉寒散。猶鎖白雲三兩峯。

越人以幕養花因遊其下

尙有殘紅已可悲。更憂回首祇空枝。莫嗟身世渾無事。睡過春風作惡時。

鄞縣西亭

收功無路去無田。竊食窮城度兩年。更作世間兒女態。亂栽花竹養風煙。

